



奉天靖難推誠宣力武臣特進榮祿大夫右柱
國太子太傅成國公追封東平王謚武烈朱公
神道碑銘

楊士奇

天命仁聖為下民主必生文武材畧恢傑弘偉之士
為之輔翼相與協力一心靖暴亂致治平以建非常
之功夫肇創之績難矣中興尤非易也故前史贊勲
臣率以肇創中興竝言若我太宗文皇帝龍興北
藩安宗社於將危保洪業於永固其功蓋又有難
者以一隅之衆而應四方強盛之敵靡堅不摧靡剛
不馴固天之所定亦必有材畧恢傑弘偉之佐以

效夫䟽附先後奔走禦侮之能是以大功之成勃然莫之能禦也若時東平武烈王其偉然傑然特出者乎王姓朱氏諱能字士弘世家鳳陽之懷遠曾祖考其妣某氏父亮後太祖皇帝征伐有功累陞武毅將軍燕山中護衛副千戶謹持行善撫士有譽於時母某氏王生有令質自少喜讀書事父母至孝洪武甲戌襲父職事太宗皇帝於藩邸小心慎恭未嘗少懈而撫恤下人一如其父甚為上所信任旦夕侍不去側奉天靖難之師初與幄帷密議惟河間忠武王與王預焉時北平三司之文構造禍者王與忠

武建議率麾下首擒之遂奪城九門撫綏城內外三日人以大定引兵攻薊州擒其將都指揮馬宣等遂取遵化永平密雲從上攻灤河既還從克雄縣首破其東門敵衆敗走追及於月漾橋執其總帥都督楊松潘忠等復追其餘衆於鄭州斬獲不可數計乘勝長驅入真定大敗長興侯耿秉文兵時王獨與敢死士三十餘騎追奔至滹沱河秉文衆尚數萬復列陣嚮王王奮勇大呼衝入敵陣敵衆披靡自相蹂躪死者無算棄甲來降者三千餘人上大悅賜書褒諭永平馳報江陰侯吳高以遼東兵攻城急王從

上赴援高遁走王追及之多所殺獲遂從定大寧戮其拒命撫輯其衆而還時曹國公李景隆率兵攻北平城王從上至鄭村垵與景隆兵遇大戰敗之進攻其營又敗之景隆兵列營九門者連敗之城出亦出兵夾擊景隆狼狽走王從攻廣昌薊州大同次第悉下景隆復收潰散之卒號百萬來攻上親拒之王為前鋒午至白溝河敗其都指揮平安軍及申又與敵兵戰大敗之明日王領左哨當前鋒又大敗敵兵盡克其砦柵敵走保濟南王率衆追之至鐔山敵嚴兵列陣以待王連破之敵衆釋兵降者萬餘人王

以聞上悉撫而縱之蓋自是敵兵戴德皆願來歸無復鬪志然上得之即遣之不留王從攻滄州先破其東門入城斬首六萬餘級敵震懼遂獲其總帥徐凱進攻東昌敵列陣決戰上以數千騎出陣後敵圍上數匝王奮力翼上以出進戰夾河王為奇兵先鋒大敗敵將盛庸兵又敗平安兵于藁城追奔至真定戰其東門斬首萬餘級遂畧彰德及定州勦西水寨已而敗敵將李文於德州遂克東阿東平破汶上諸寨設伏淝河敗平安兵十餘萬進戰小河為敵所乘稍却諸將遽請旋師獨王力勸上行曰

用兵未必常勝豈可因小挫繫自沮項羽百戰百勝
竟亡漢高屢敗而終興自 殿下舉兵來克捷多矣
此小挫何足置意但當以 宗社為重整兵前進耳
上撫掌嘆曰尔言深合吾心遂行至靈璧敵盛兵
迎戰王先登陷陣大敗之生擒其副總兵陳暉平安
叅將馬溥徐真及都指揮三十餘人獲馬二萬敵衆
死者屍蔽原野降者數十萬人悉縱遣之進克泗州
渡淮敗盛庸兵遂克盱眙下揚州從 上渡江入京
師內難平諸王臣民推戴 上承大統論靖難功王
居首賜號奉天靖難推誠宣力武臣特進榮祿大夫

右柱國左軍都督府左都督封成國公食祿三千五
百石子孫世襲賜誥券追封三代考皆成國公妣皆
成國夫人永樂二年 命兼太子太傅四年安南黎
季犛弒其國主毒虐下人拒遏 詔使數諭弗悛遂
發兵討罪 命王總兵佩征夷大將軍印率左右副
將軍左右叅將及神機橫海驃騎游擊鷹揚五將軍
兵八十萬討之瀕行 上親送之龍江師至廣西
上顧侍臣曰朕夜察天象西帥有憂其未能乎然能
足辦斯事朕第慮氣候非其所習耳踰旬訃聞 上
震悼輟視朝五日一時同王從舉義者永康侯徐忠

等十數人皆入奉慰上灑泣曰方艱難時協力一心相濟能其首也且其素存心行事皆應遠到曷遽止此言已益酸楚左右皆流涕莫敢仰視蓋王至龍州嬰疾薨十月初二日也春秋三十有七上親為文祭之宸衷悲愴溢於言表讀者皆為泣下賻卹特厚追封東平郡王賜謚武烈拜加贈其三代皆王爵仁宗皇帝臨御特詔王配享太宗廟廷賜祭之文尤極褒重蓋當時元功之首也王頎然魁碩勇力過人器宇宏博智識高遠雍容端重辭氣溫裕廣坐群議王析衷之詞簡理當無不心眼善馭將士

教訓撫恤親若父子紀律明肅無敢踰越每遇勁敵大呼馳鬪以一當百敵皆望風辟易懷綏降附恩惠周至出謀制勝靡有遺策尤善用才人率歸心雖古良將不過是也塋昌平北澤山之原配王氏累封東平郡王夫人子男若干長勇襲封成國公太子太保篤實公忠祇勤弗懈歷事四朝國所倚重次某某官女若干某官某某壻也孫男若干孫女若干永樂初某侍講禁林凡軍國事預陪下廷議恒與王接知之有素至是太保公屬書神道之碑敬叙而為銘銘曰

明聖之興天實命之必有名世輔翼攸資 文皇
大聖奉藩恭恪天將啓之內難奄作有不得已義
旗載揚彬彬文武風雲奮興于時東平雄才弘畧
夜寐夙興密侍帷幄刈違撫順式宣德音環城中
外有截一心金戈所嚮漁陽風靡永平不固大寧
傾圯後顧無虞前驅翩翩折朽雄鄭摧堅中山益
都追奔滄州殲逆咸奮先登電掃霆擊青齊既帖
踊躍而南持志決往 宗社為心靈壁疾下長淮
飛渡茫茫圻甸有迓無拒大江無險內難廓清翼
龍升御天開日明國有元良遂兼儲傳端肅之
行寬仁之度南交弗靖奉 命徂征師未出疆大
星墮營天不憖遺堂柱遽仆帝聞盡傷卹典隆厚
忠存 社稷勲 簡編偉哉嗣興顯顯象賢河山
有誓追崇有詔 皇明萬年永配 清廟

太子太傅成國公追封東平郡武烈王墳誌

梁潛

王諱能姓朱氏世爲鳳陽懷遠縣樂河鄉人父諱亮
爲燕山中護衛副千戶歿王襲其職洪武三十二年
七月 皇上起兵平內亂王以藩邸之臣首擒奸慝
奪九門以功陞護衛指揮同知遂領兵攻薊州擒其
將都指揮馬宣等進攻遵化取密州從 上攻灤河
蹴大寧之兵攻雄縣先以兵破其東門衆敗走追之
執其將楊松又執都指揮潘忠殄餘衆於漠州入真
定長興侯之衆敗走王乘之與敢死者三十餘騎追
之至滹沱河敵兵數萬列陣以待王與其騎望見即

奮入其陣敵衆大潰相蹂藉死者無筭降者凡三千餘人九月還陞北平都指揮僉事復從上趨永平克大寧十一月敵兵窺北平復從上還至鄭村埧敗敵兵凡營于九門者悉攻破之十二月從取廣昌明年正月克蔚州攻大同四月二十四日暮至白溝河王爲前鋒與敵將平安遇敗之明日整衆復戰王又爲前鋒大敗之克其營長驅擣濟南至鐸山其衆陣而待與戰又敗之降者萬餘人以降者入至軍門上命皆縱遣之南兵自是急則降無復固志矣九月陞都指揮同知復從取滄州破其東門引兵自門

入斬首陸萬餘級敵兵聞震懼戰于東昌已而從上還三十四年至夾河上以王爲奇兵先鋒大敗敵將盛庸兵橐城又敗之至真定戰東門斬首七萬餘級掠彰德還定州勦西水寨十一月陞右軍都督府僉事明年正月入衡水引兵追敵兵于德州破之進克東阿東平汶上諸寨三月伏兵肥河敗敵將平安兵十餘萬人復連戰我兵小不利諸將請班師王勸上進兵遂攻敵銀牌兵敗之又敗其餽運軍馬尋而東都督將軍兵來會王即以其衆奮戰敵大敗明日進拔其諸營克泗州長軀渡淮盛庸兵敗走

入盱眙下揚州從 上渡江先登克金川門盛庸等
兵望見披靡散去六月十三日 上入京城畿甸既
寧四方底定論次諸臣之功王之功為最賜號奉
天靖難功臣進階特進榮祿大夫勳右柱國爵成國
公食祿貳千五百石仍命為左都督賞賚甚厚永樂
二年 月進兼 太子太傅五年 月拜征夷將軍
總兵討安南至廣西龍州得病而薨 月 日也其
生洪武庚戌四月六日享年凡三十有七訃報至
上深悼之為罷朝封東平郡王謚武烈夫人某氏自
成國夫人進封東平郡王夫人曾祖某祖某父亮皆

自成國公進封東平郡王曾祖母某氏祖母某氏皆

自成國夫人進封東平郡王夫人母某氏成國太夫

人進封東平郡王太夫人 詔以其柩歸葬于北京

遂以 年 月 日葬于都城之西南幾里 某山 某

向子幾人長曰 某襲封成國公次曰 某 某 女幾人惟

王以豪傑之才負果敢之志灼知天命深識事機用

能協贊 聖謨仰遵神笑由是舉無遺策取無堅城

受命於帟幄之內而取勝於百萬之中所謂雲龍風

虎之會卒定大艱為國元勳遭遇之盛真千載一時

也至于死生之際哀榮之典光賁乎幽壤而延及乎

後人則又王之蓋忠純誠始終不二者有以得之夫

豈偶然之故哉夫惟王之功德如此是宜勒之金石
昭示將來以彰著 聖上知人用人之効如古所謂
旂常之銘者今姑載其征伐大槩爵秩次第納于壙
中以掩諸幽以識其歲月於永久云

武安侯追封漳國公謚忠毅鄭公神道碑銘

楊榮

宣德甲寅二月乙丑奉天靖難推宣誠力武臣特進榮祿
大夫柱國中軍都督府左都督武安侯鄭公薨于大同
訃聞 上嗟悼輟視朝二日遣官致祭賜棺及賻命有司
營塋追封漳國公謚忠毅某年某月某日歸葬北京之
西山葵里其子能既襲侯爵遂具公平生之槩來求神
道碑銘予嘗叨總史職不獲辭乃為序次之曰公諱亨
世家廬州合肥曾祖五乙祖大凡父用以貴俱追封武
安侯曾祖母劉氏祖母張氏母英氏俱追封夫人昔我
太祖高皇帝龍興淮甸公之先君子自和州率先應

募積軍功授平陽右衛百戶陞大興衛副千戶歲癸亥
公襲父職公天資剛毅純篤壬申出使漠北至幹難河
撫輯韃靼還以勞陞密雲衛指揮僉事乙卯秋太宗
文皇帝舉兵靖難命公攻薊州時_都指揮馬宣城守不下
公百計破克之遂生擒宣歸旋攻雄縣討真定俱大克
捷陞指揮使及遼東軍圍永平上親率諸將援之公
賈勇奮進敵遂披靡旋師收大寧陞北平都指揮僉事
未幾戰鄭村塢克紫荆關復廣昌所向無前明年庚辰
取蔚州下大同大戰白溝河乘勝逐北直抵濟南陞都
指揮同知滄州之役公軍北門北門芻糧所聚兩軍

必爭之地公力戰破之又明年辛巳敗順德軍於深
州夾河決戰勦戮尤盛藁城西水寨連戰俱捷遂擢
兵廣平略地彰德所至皆下是冬陞中軍都督僉事
歲壬午從上南嚮歷取諸縣及東平汶上等堡對
敵小河塵鋒靈壁擣泗州取鎮淮渡江克金川門內
難既平上正大統策勲頒爵封公武安侯階勲如
前白金文綺襲衣前後賜賚不可勝計永樂癸巳夏
奉命出關巡視山川險易撫輯軍士時關外軍衛統
攝無紀遇有邊警猝難制敵公因奏調大同前衛帶
管東勝等_衛措置得宜自是各衛皆從所隸以聽調用

尋奉勅領士卒築長安嶺城規畫有方人不知勞未
逾月而城成歲庚寅以來上屢親征北虜公扈從
每著勞績仁宗皇帝嗣位念公舊德特賜佩征西
前將軍印充總兵官鎮守大同嚴斥候固屯守胡騎
遠遁不敢窺邊居常以清介自將服食之奉泊如也
用是下人毋擾邊境輯寧宣宗皇帝倚任尤重屢
降璽書褒異之公生元至正丙申至是享年七十有
九配夫人張氏子男三人長即能次熙次嘉女二人
長適王友賢次尚幼孫男一孫女一於戲自古帝王
之興必有才雄智勇之臣為之左右以戡靖大難垂
不刊之功故其子孫亦世有壽邑與國咸休永無窮
之聞若公遭遇太宗竭誠效力奮不顧身崎嶇戰
陣以佐助翊戴真安宗社迨扈從北征鎮安邊陲其
奇能偉績輝映後先者何其盛哉是宜勒銘豐碑昭
示後世焉銘曰

於皇太宗有臣忠毅克殫心膂助順舉義崎嶇
戰陣奮不顧身祇奉神謀用成大勳皇帝曰吁
有臣如唯天所生皇考所遺從征漠北屢效驅
馳出鎮邊陲虜不敢窺長安之嶺其城萬堵營之
築之士不知苦盛福遐齡逮事四朝功成不有位

高不驕天不怒遺殞傷元老時論興嗟聖情悲悼
聖情悲悼慨念元功式昭褒典賜謚追封婺里之
原西山之麓鬱鬱松楸佳城是卜祀行有史銘功
有詞後百千祀視此豐碑

後軍都督府右都督鎮遠侯贈夏國公謚武毅

顧公神道碑

楊士奇

永樂十二年五月二十五日鎮遠侯顧公薨於貴州
訃聞上震悼遣官賜祭追封夏國公賜謚武毅贈
如制命有司治喪葬遂命其嫡孫興祖襲封興祖奉
柩歸葬于揚州之原顧氏之先居湘潭公之曾大考
百四妣周氏大考千二妣朱氏始家江都考萬一妣
周氏公諱成字景韶天性仁厚自少能給恤鰥寡負
直氣遇以橫逆加人者必摧辱使畏服乃已其大考
嘗訖於衆曰是孫必興吾門公資貌魁偉步知書通

大義而膂力絕人善武事尤精騎槊射命中元未嘗
遊燕都有強寇十數劫其舟同載者皆驚愕公獨奮
出鬪寇皆披靡走既歸張士誠起泰州僭王號公知
其無能為乙未歲我太祖高皇帝渡大江明年公未
歸附至鎮江皆號勇士十一人轉鬪入城莫敢嬰其
鋒者既敵益衆而後絕悉為城中人所繫十人者皆
被殺公奮躍起繫絕蹴持刃者什之脫走歸語衆曰
鎮江城中之皆庸夫可取也遂導衆攻其城克之授百
戶從攻常州宣州皆克之簡元旅正還從克江陰從
寧河王克通州陞千戶攻雙刀趙於樅陽攻安慶江

州池州興國諸北寨皆下之庚子敗陳友諒兵於龍
江公得其戰艦及馬特賜白金友諒退仍據安慶江
州公隨大將軍悉復之并得其八陣營諸寨從克南
昌援安豐敗元兵進攻廬州從克武昌荊州衡州從
開平王下襄陽還取秦州番守興化從中山王破舊
館克湖州蘇州洪武元年陞堅城衛指揮僉事二年
領軍克信陽唐光四年從臨江侯取西蜀道遇敵公
手殺敵伯餘人生擒二十餘人進攻羅江生擒其偽
元帥及其下二十餘人悉送軍門斬以徇入漢州偽
官戴丞相向知院者盛兵迎戰公揮衆奮進戴向皆

狼狽還走追北至城郭圍其城竟降之蜀平調成都
後衛總帥以公守之六年率兵赴重慶擒妖賊王玄
保及偽萬戶李邦祖等八年調貴州衛明年甕傍等
山寨蠻寇叛公率兵討之斬首百餘級俘獲人馬尤
衆夷懾服叩首請歲納租賦公從之其僻遠山峒有
負固未下者次第平之群夷叛服不常公連歲出兵
平之前後俘戮不
十四年後潁川侯征雲南
率步騎兵為前鋒首克普定番公守之且為後繼公
部將士樹柵以守明年公出兵克西堡行是諸蠻合
數萬攻圍普定諸將皆欲出戰公持不可曰賊衆我

寡一出即為賊所窺必俟其攀柵乃出賊及柵公披
甲上馬出北門率戰士奮進手殺賊騎之迎戰者十
數人賊衆引却諸將遂乘勝出東門西門戰敗賊衆
時南門之圍未解公取所生擒者千八斬之而縱其
一人歸曰吾以夜二鼓及殺爾矣及期賊聞官軍舉
銅角鏡鉤皆惶懼奔走圍悉解獲賊甲兵無筭時有
中使在普定見公勇略絕群還奏特遣賜龍衣金帶
陞世襲指揮使凡普定所隸諸蠻公悉平之十七年
平阿黑螻螂等十餘寨及降尾瀝蠻酋馬乃之衆西
堡蠻攜貳復平之廿一年總戎檄公討平西扒古

里谷勞金網等寨遂擒閔索嶺首賊葛蓬及叛寇阿
東皆誅之士官阿宗叛焚劫驛舍乘虛將攻公勢張
甚時官軍精銳悉駐東川公率餘衆及士兵深入賊
地據關口屢敗之賊既遁衆以暑瘴非士卒便欲退
師公不聽未幾賊黨殺阿宗降遂奏革普定府而黜
其守之懷二心者建兵衛以屬其民析其地爲州三
長官司六而公統理焉自是公悉意撫綏大恩布信
諸夷嚮服二十五年夏入朝賜文幣二十有副鈔三
千貫白金四百兩日錫宴會同館陞鎮國將軍貴州
都指揮使司同知公至貴州首征康佐叛蠻破阿老
諸寨峒二十七年平都勻豐寧西梁瓦材等寇斬首
萬四千餘級俘生口三千八百有奇而撫其良善二
十九年陞驃騎將軍右軍都督府僉事官其長子統
普定衛指揮使是歲命公佩征南將軍印總兵征水
西叛寇生首敬德斬之餘寇悉降三十年五開
蠻反公率兵臻剖天峒悉破之進勅天柱天堂春
花金井滿頭大小坪等生苗及螃蟬米毫灣溪萬潮
等寇皆破之三十二年普定西堡及貢州光金谷勞
里金石番美唐諸夷復叛公次第親行誅其叛首而
撫其衆既歸明年高廟上賓又明年太宗文皇帝

靖難之師起北方公受命往禦至真定靖難之師禁公
以獻文皇識公先朝舊人解其繫與之語曰豈非皇
考之靈以汝授我乎因語以不得已興師之故言已
泣下公亦泣遂遣人護送北京令輔仁宗皇帝居守
時姚廣孝奉命輔居守有腹心之寄姚素不習兵事
與公議多不合會南兵圍城仁皇於軍旅調度恒從
公言城中文武之臣競進曰顧城南將其中莫測不
可專任然公所言計皆合機用皆有效數命公出將
兵固辭曰使臣侍左右日陪論議得效分寸足矣賜
公甲冑刀劍弓矢皆不受南兵數圍城卒以敗去者
多用公謀也洪武三十年九月論公功賜號奉天翊
運推誠宣力武臣特進榮祿大夫柱國後軍都督府
右都督封鎮遠侯食祿千五百石子孫世襲賜鈔三
千貫白金一百兩綵幣三十四副遂賜誥券是冬命
公鎮守貴州蓋以公威信素行於彼云永樂元年春
至貴蠻夷聞公至歡趨出拜叛者皆歸境內靖寧公
上書論大計謂國家宜早建儲以正名分北邊官軍
有功者爵賞既定宜制以禮法降勅褒答賜鈔五千
貫綵幣八加副申賜鈔萬貫白金二百兩綵幣如前
三年賜誥追封三代考皆鎮遠侯妣皆侯夫人永寧

土官宣府為其弟謀殺致其下亂公執其弟送京師
罪之而後土俗奏以宣府妻襲職其衆遂靖六年車
駕將巡狩北京豫召公副儲君監國既至上慰勞丹
四且諭所以召公之意公言皇太子仁厚恭勤明達
足任付託且左右文武之臣其智識深長皆非愚臣
所及蠻夷雖今帖服小競爭即持兵為亂愚臣非
敢決意去留惟陛下命之上付知公意嗟嘆累日賜
鈔四萬貫白金二百兩綵幣三十有六幅命還貴州
陛辭退辭文華殿曰殿下於事君父恤民兵數行有
誠惟於小人當真度外萬事有天理不足計蓋是時

懷奪嫡志者不樂公在京師公燭知故先幾引去也
時土官奏款為公建生祠從之公之赴召也播州貴
州蠻作亂公歸遣子勇率兵勦之悉平時思州臺羅
等蠻亦亂公遣人諭其酋普亮即服於是公病事聞
遣醫馳視竟不起春秋八十有五公自少壯履行陣
挺身戰鬪奮勇無前雖身被十數創不稍引却必致
俘馘見功效深於籌略料敵制變百不爽一於謀國
事明大體不瑣屑細故竭誠奉公至老死不倦諸葛
公所云鞠躬盡瘁斃而後已者公蓋有焉朝廷既追
封三代考皆夏國公妣皆夏國公夫人元配彭氏再

追封夏國夫人繼室穆氏李氏子男七長統先公卒
洪熙中以其子貴追封鎮遠侯次銑次銓次銳次勇
累官貴州都指揮僉事次亮次源孫男九興祖襲封
鎮遠侯效用三朝克繩祖武凱再興德旺興能貴州
衛指揮同知先卒琮琦玗曾孫男六玄孫男一至是
興祖具事狀屬士奇書神道之石士奇永樂洪熙中
官翰林日侍二聖實聞公事故不辭敬次第書之而
係以銘曰大明奉天肇迹淮土公奮從龍來歸皇祖
金戈鐵馬桓桓四征鏟暴鋤彊疇之敢嬰函夏既寧
報功錫命崇爵豐祿徃綏南境逖彼南境毒虺妖狐

憑阻弗馴跳踈嘯呼公奉天威霆驅電掃夷藪室穴
屢征乃妥乃登督府乃衛禁垣居無幾何遄北其轅
天祐其公俾作聖輔惟聖知公曰時舊老明明二聖
任公心腹蓄疑盈庭公任愈確公不尤人公處有道
秉誠從恭謀猷屢告卒底厥功為報益隆金貂玉鞶
亞于上公帝謂爾成予懷南徼汝徃申撫公拜奉詔
夷獠迓公父母歸止焦者以需仆者以起孰其恃兇
敢于刑誅小者擒俘大者戮屠公身在外心存廷陛
匭函有陳皆國大計當宁聖明嘉公忠言寵賚華褒
誕自天降國有老成謂且百歲曷不憇遺營星奄墜

雄蓋萬夫智名勇功公福簡簡衣榮始終慶澤之貽
綿綿來嗣篤 先祖祇于世世

奉天靖難推誠宣力武臣特進榮祿大夫柱國
前軍都督府左都督永康侯追封蔡國公謚忠
烈徐公神道碑銘 楊士奇

公諱忠字仲達姓徐氏世家廬州之合肥父諱用元
季守宣城我 太祖皇帝兵至宣率衆歸附命仍其
職遂從征討以功實授管軍百戶從守南昌進武略
將軍河南衛副千戶洪武壬戌自陳老疾命公代之
丁卯從征北虜至哈剌哈之地還城大寧無幾調大
寧備禦戊辰從征金山之虜之為邊患者屢戰敗之
獲其馬牛輜重賜白金鈔幣庚午運兵饗數十萬斛

赴温口遂從征乃兒不花大敗虜衆俘獲其人口萬
餘總兵遣公護送入關公悉心撫卹俘者如歸陞濟
陽衛世襲指揮僉事乙亥城懷安萬全丙子率兵從
征北虜至驢駒河而還丁丑往填開平己卯太宗
皇帝舉靖難之師公首從義旗克密雲克雄縣真定
取永平克大寧還戰鄭村坨取廣昌薊州戰白溝河
皆竒功進攻濟南克滄州大戰東昌及夾河攻彰德
破西水寨克東阿東平汝上大戰靈璧遂從渡淮及
江至京師公臨戰奮勇百夫莫當出入敵陣率在衆
先白溝之戰敵揮刃斫公兩指未殊公自斷指擲地

裂衣帛裹創仍奮進戰其馭士卒撫卹誠至人人歸
心而號令嚴明所過無擾上行師恒飭諸將毋妄
殺曰吾奉天弔民厲民違天何望有濟公承命顛顛
惟執兵迎拒者不容而誘諭招徠綏撫降附多效力
焉其以功進官自指揮同知歷都指揮僉事授奉天
靖難推誠宣力武臣特進榮祿大夫柱國前軍都督
府左都督永康侯食祿千一百石子孫世襲賜誥券
追封曾祖六二祖七九及考皆永康侯曾祖妣陶祖
妣王妣張皆永康侯夫人永樂己丑暨癸巳車駕
巡狩北京仁宗皇帝監國上以公敦厚老成留

之南京兵政一以任公公小心寅畏清靜簡易上下咸宜之一日夙興盥擲衣冠坐都督府得風疾遽卒癸巳八月二十四日也 上在北京聞訃震悼輟視朝一日遣官賜祭給賻命有司治喪葬追封蔡國公謚忠烈并加封其三代考皆蔡國公妣皆蔡國夫人配亦蔡國夫人 仁宗皇帝在東宮遣祭賚賜甚厚公沉毅質恪有孝行旦暮出入必先詣家廟事繼母敬愛兼至小有訓責必跪受雖貴不變所得 上賜必謹視之約已守法未嘗有過接人恭謙和氣滿容語簡而誠洞見底裏春秋五十有二而卒卒之歲十

一月二十七日葬江寧縣安德鄉長岡之原子男二安山壽安叅侯爵女二長適指揮使孫竑次適沐儼安奉國子祭酒貝公泰所述事狀求文刻神道之碑士竒與公同 朝有十餘年後同侍 監國相厚知公之行加詳故為序而銘之銘曰

桓桓徐公為時虎臣叅家之勲奮武以振 天啓 聖明義旗爰舉挺誠來從股肱之輔 皇麾所指公迅前驅誰抗誰禦拉朽折枯神武不殺公行 聖志來迓來歸撫綏勤至仁施如春義行如秋 公實左右威懷並流艱危既安氛翳咸廓 宗社

再隆褒功命爵悃悃無譁厚重靡遷貂蟬充庭孰
愈公賢 鑿與北狩 聖儲監國峙武以衛孰優
公德肅肅小心溫恭靖嘉巋然老成為國之華維
孝維忠在公允蹈宜貴宜富曷不耆耄都門之南
聿崇起墳過者下車眎茲刻文

興安伯世家

歸有光

興安伯徐祥興國大冶人初為陳氏萬戶至正辛丑
江州附隸傅友德軍興從征黃梅東勝數有功洪武
八年由西安護衛馬軍小旗除金吾左衛百戶從征
松花江黑山乃兒不花塔灘里陞副千戶庚辰燕兵
起祥首議帥師奪九門克居庸關陞燕山左護衛指
揮僉事尋改左衛指揮僉事授兵懷來破雄縣按兵
月樣橋追敗大軍於漠州復敗之於真定出劉家口
破大寧敗齊尚書軍於鄭村塢陞指揮同知尋陞北
平指揮僉事破廣昌辛巳克蔚州攻大同大戰於白

溝攻濟南陞指揮同知壬午敗長圍軍於雄縣敗大
軍於夾河大戰藁城復敗之攻順德至彰德破保定
西水寨敗援軍癸未破東阿東平汶上至鳳陽奪河
南橋小河埧鳳凰山與大軍戰於齊眉山敗漕軍於
靈壁復敗大軍於營寨取泗州盱眙渡江入金川門
是歲冬封功臣 皇帝制曰昔我 皇考太祖高皇
帝峻德廣運格於皇天光天之下用集大成亦有能
罷之士不貳心之臣庸作股肱心膂左右弼成悉視
功載懋之官賞列爵宗報萬世有辭 皇考升遐建
文即位自絕於天改更成憲屢造大愆圖任側媚咸

劉宗親禍延以朕朕不獲已以爾有衆底天之罰咨
爾都指揮使徐祥事朕藩邸首獲奸覘內奪九門外
攻居庸追戰漠州真定應援永平走遼東兵從下大
寧捷於壩上白溝大戰遂取滄州威深夾河藁城西
水小河靈壁每有功能克堪用武輔成大勳疇咨於
衆惟良顯哉是用授爾奉天翊衛宣力武臣特進榮
祿大夫柱國興安伯食祿一千石子孫世世承襲乃
與爾誓除逆謀不宥其餘若犯死罪爾免二死子免
一死以報爾功於戲位不期驕祿不期後其益遜乃
志弘乃量以持乃祿位朕無忘爾功爾亦無忘朕訓

常以暇逸思其艱難常以富貴思其貧賤欽哉惟克
永世永樂二年興安伯祥卒孫亨嗣十一年亨從駕
北征至紅嘴山敗瓦剌於蒼堆峽二十年至渠列兒
河天城等地二十一年至陰山二十二年至半邊山
西路奉駕南還宣德二年興黔國公征交趾失利正
統九年征兀良哈三衛出界嶺口河北川敗賊師麥
鹵獲賜誥券進封興安侯興安侯常守閔中侯弟愷
居京師一日 天子集諸武臣及子弟馳騎命懸本
爵牙牌奪得公者與公奪得侯者與侯直馳豐城
侯奪其牌豐城初不覺既而請於侯侯顧愷解還之

人及其不競天順四年興安武襄侯卒子賢嗣為興
安伯賢卒子盛嗣盛卒從弟良嗣良祖母故小妻也
良父既生而其祖繼娶定襄伯女及是節氏之孫與
良爭襲朝議以節氏初嘗適人法不得為正嫡良竟
得襲良年五十猶日於大中橋受雇為人汲水比都
督府求為興安伯嗣乃謝其鄰而去良食南京中軍
都督府事奏請給其祖父母誥命尚書楊一清議以
私親不宜干大宗不許嘉靖癸巳良卒子勳嗣也未
勳卒先是賢以跛足免朝叅革去半俸劉瑾時革去
折色二百石才得食祿三百石折色五百石迄良之

世不能復也祥季子麟金吾衛指揮同知洪武末胡
騎臨城內外震怒麟挺身出閉午門亦以功世官南
京 贊曰予至南京嘗館於興安伯家興安有兩鉄
券及讀鐵榜板榜累朝 誥命嗚呼盛矣是時興安
伯良已歿門第蕭然所謂世祿之家蓋名存而實亡
矣 天子方隆繼絕之義國初元勲以廢起者四五
家當此時興安伯勲齎千金入京以求爲嗣至質宅
於人吾不知其何以也

追封奉天靖難推誠宣力武臣特進榮祿大夫
右柱國榮國公加封河南王謚忠武張公神道

碑碑銘

楊士奇

王諱玉字世美姓張氏世家河南開封之祥符曾祖
某祖某父天佑皆追封榮國公曾祖妣某祖妣劉妣
王皆追封榮國夫人王初仕元爲樞密知院已而灼
知天命洪武乙丑自拔來歸我 太祖高皇帝禮遇
甚厚王感奮思效戊辰從征卜漁海子哈喇哈之地
以功授濟南衛副千戶又從勦粉紅帖木兒至延安
川還陞明威將軍安慶衛指揮僉事庚午從征永順

散毛諸洞辛未逐北虜之侵邊者至鴉寒山而還調
燕山左護衛發酉追虜至黑松林甲戌征野人等處
陞都指揮同知戊寅 朝廷用讒加兵親藩事急
太宗皇帝不得已舉靖難之師帷幄謀畫悉以任王
王推誠致慮夙夜不懈事可否進止衆論紛紛未定
者王正色數語決之咸中機宜故凡舉措必咨於王
首用王策奪北平九門撫順討逆三日城內外悉定
師將南出王曰不先定薊州將為後患薊平餘不足
平時薊州府馬宣謀起兵迎拒 上命王討之王至
諭之不下環城攻之宣率衆出戰遂執宣殺之并執

指揮毛某王知其可用釋不殺送詣北平遂撫輯軍
民是夜急趨遵化豫戒將士止殺曰師得行以人心為
本遂簡敢勇士四鼓登陴開其城門將士皆入城中
始覺守將率衆拒戰執其將斬之餘不傷一人將吏
悉隨王上謁遂移師永平密雲皆望風輸款從至灤
河王進曰都督潘忠楊松在莫州阨者南路宜先禽
之上悅遂親發兵命王為先鋒用其計取涿州雄
縣生擒潘楊時長興侯耿秉文率兵二十萬屯真定
王自請往覘之還言軍無紀律且其上有敗氣無能
為 上至無極以敵衆我寡欲試諸將勇怯召問今

舉兵所嚮日度可必勝否衆未有通說王曰今當徑趨真定彼雖衆然新集未齊我軍乘勝一鼓可破之上曰王言合吾意吾倚王一人足辦明日抵真定接戰東文大敗幾被禽獲其左副將軍駙馬都尉李堅右副將軍都督寧忠及都督顧成等斬首三萬餘級獲馬二萬復敗安陸侯吳傑軍上召王諭曰汝之功也非汝與吾意合不及此永平馳報江陰侯吳高等以遼東兵攻圍城急又謀報曹國公李景隆引兵數十萬將攻北平城上與王謀先援永平既至高等望風棄輜重遁王從上追之斬獲甚衆王言

大寧去此不遠請移軍襲之可免後顧從之遂從攻大寧自辰至午城破斬其都督指揮朱鑑執都指揮房寬下令安撫城中頃刻而定北平報李景隆兵圍城遂旋師王請先攻其營然後歸援從之徑搗景隆營大戰三日城中亦鼓譟出表裏夾攻景隆軍不支大敗遁去從攻廣昌蔚州進攻大同悉下謀報景隆收潰散卒號百萬且復至王言兵貴神速先事者勝請往駐白溝河以逸待勞可必勝也上命王率衆馳往駐三日景隆兵至王以精騎馳擊之斬馘無算景隆復大敗收餘卒退保濟南乘勝追擊圍其城既

而解圍還攻滄州獲其大將徐凱進攻東昌敵列陣
決戰上以數千騎繞出陣後敵圍數匝上已衝
擊而出王不知上所在突入敵陣大戰連殺百數
十人王亦被創而歿十二月廿五日云春秋五十有
八上哭之慟既旋師諸將皆侍語及東昌事上
曰勝負兵家常事不足計所恨艱^難之際失張玉良輔
吾至今寢不帖席食不下咽隕涕不已諸將皆泣言
上既正大統行報功之典顧侍臣曰張玉才備智勇
論靖難功當第一惜其蚤^沒贈奉天靖難推誠宣力武
臣特進榮祿大夫右柱國追封榮國公謚忠顯追封

其三代考妣

仁宗皇帝在春宮數與侍臣言張玉

識見謀畧卓然老成非諸將所及且端方有匡直之
益誠難得也既嗣位加封河南王改謚忠武告於廟
以配享太宗親制祭王之文有秉義懷忠一心為
國靖難之際發謀奮勇百戰當前所嚮風靡大功垂
成挺身陷陣惟義所在視死如歸忠精貫于星日功
烈揚於竹帛之褒蓋王為人庄重果毅涉獵書史明
其大義而識慮高遠治家禮法秩然奉命行師紀
律嚴肅與士卒同甘苦未嘗妄戮一人每語麾下曰
為將當踐血戰袍流芳汗簡蓋其殉國之志素定古

名將何過焉配王氏樞密院判執中之女有令德累封王夫人子男三長輔起武功累進奉天靖難推誠宣力輔運佐理武臣特進光祿大夫左柱國英國公太師監修國史知經筵事功德茂碩為國元臣次輓神策衛指揮使次軌錦衣衛指揮同知女一永樂中冊為貴妃孫男六長忠授勳衛次鑑次瑾次瑄次斌次某孫女八長洪熙中冊為敬妃次適清平伯吳英餘在室余陪太師公在史館經筵久以余未樂洪熙從臣實聞二聖所嘗論王者屬銘神道之碑敬叙而銘之銘曰

文皇奉天中興邦國桓桓忠武奪起羽翼惟幄密勿長策深畫上契淵衷魚水之得義旗筆舉伏劍先驅欽城九門功其權輿取薊遵化如探穴雖執其抗鋒摧朽折枯龍馭既南大旆在前連下雄鄭端奮常山長河無險鐵城不堅撫降殲逆德威竝宣決志敵愾運血厥躬精誠貫日勁氣吐虹聊城之鏖髮怒上衝先軫戰旗千載一忠王勞在國王績在史王嗣象賢益闕以偉帶礪山河廷有明誓清廟陟配逾千萬祀

太師掌中軍都督府事英國公贈定興王謚忠

烈張公傳

彭韶

王諱輔字文弼河南祥符人父王元樞密知院洪武
初歸附累官燕山護衛指揮同知戰歿追封河間王
謚忠武王器宇雄壯顧盼有威太宗皇帝靖內難時
屢立戰功封信安伯加新城侯永樂五年安南國陳
王為^季犁篡弒命王為總兵官統軍八十萬往問其罪
既入境賊沿江列柵六七百里水陸拒守王師扼江
口破其堅壁遂拔多邦城進攻交州入之乘勝引兵
虜清化城覆其巢穴降夷民十餘萬季犁遁入海王

此兵賊子闕賊未襲逆擊敗之繼督舟師往攻斬賊
數萬級窮追奇羅海口生擒李犁并其二子倉澄餘
衆降附交南平得郡縣一百三四十戶三百一十二
萬王建議復古郡縣置交趾都布按三司統鎮一之
凱還進爵英國公食祿三千石七年餘孽簡定僭偽
號煽衆復叛惟交州完守又命王征之王率師二十
萬獲叛簡定于吉利柵之山而歸九年賊陳季擴倡
亂假復陳氏再命王討任賊聞王師至走海洋據險
荷花口王率兵促之至愛子江登岸賊設象伏以俟
王偵知之以戒先驅群象來衝一矢落其象奴再矢

披其象鼻象奔還自相蹂踐大軍乘之賊大敗擒斬無
算遂獲陳季擴以獻是役也取勝於至險之中衆以
為神既而以王鎮守其地盡平餘寇乃還朝仁廟即
位拜太師宣德初漢府遣人邀王與謀王即縛其人
以白事得早覺宣廟甚重之顧佐為都御史謂宜保
全功臣去王兵權而寵眷無虛日正統時亦然天下
倚以為重四夷莫不知名王振專權視大臣如屬吏
獨加禮於王王亦依違以避禍十四年死於土水之
難年七十三追封定興王謚忠烈贊曰桓桓太國之
柱石討平南交以廣禹迹吏于其治職方是入反側

連衡餘蘖復息再勞戎行以靖疆場百蠻聞風來貢
重譯美哉斯勲名昭罔極

應城伯追封翼城侯孫公神道碑銘 楊榮

世之瓌傑英偉之士遭遇 聖明屢建勲績致有名
爵老而復能感激思奮竭忠賈勇力効勞勩弘濟艱
難其光烈著于當時聲華及于後世者吾於故應城
伯孫公見之公諱巖字某世家鳳陽之於皇里曾大
父某大父某父重四三世皆務本力穡周貧卹患鄉
以善人長者稱母周氏有懿德公生元至正己卯十
一月十有一日幼時有術者異其狀謂其親曰是兒
不凡宜善視之既長性豪爽膂力絕人輕財好義為
族里愛重元季兵興仗劍歸 太祖高皇帝于淮甸

在軍中以驍勇聞乙未從渡江采石定金陵收兩
浙自是南取江廣北定中原咸與有功擢金吾左衛
百戶調守鳳陽已而陞武德將軍燕山中護衛正千
戶洪武庚申從太宗皇帝之國于燕公誠直不欺
甚見親信藩國之事多委任焉乙亥公引羊致政而
以子亨代已卯太宗舉義靖難以宿將知兵特起
守通州是歲南兵大至城圍數周起土山臨城攻西
門燬樓堞公率眾極力捍禦城賴以完未幾兩軍合
戰公操戈身先士卒大呼陷陣士氣爭奪追奔逐北
斬馘不可勝紀得饋運船三百餘艘資糧無筭以功

陞明威將軍指揮僉事仍鎮通州辛巳兵復至攻城
益急公勵將士登城力戰天石交下敵乃退走論功
陞都指揮僉事壬午春南帥平安督遼東兵十餘萬
逼城公語將佐曰彼眾我寡若城守不出自示弱也
不若及其始至而擊之彼必敗亡乃率敢死士數百
犯其鋒而城上亦合勢大呼安眾大潰自是畏公無
敢復來攻者是歲夏六月太宗入正大位以通城
屏蔽冀方使六師南進而無北顧之憂者皆公之功
於是進封奉天翊衛宣力武臣特進榮祿大夫柱國
應城伯歲食祿千石給誥券子孫世繼自曾祖考而

下勲號階爵皆如公封曾祖妣而下悉如夫人永樂
戊戌六月二十日以疾卒于正寢享年八十訃聞
太宗悼念不已命有司給棺歛治墳塋累遣官致祭
贈翼城侯謚威武歲十月葬通州東馮家村之原配
劉氏封夫人先公卒子男六曰亨曰忠曰旺曰喜曰
泰曰榮亨由都指揮僉事襲公爵女二長適武德將
軍正千戶徐亨次適昭勇將軍指揮使房斌孫男十
五人英傑教圮貴瑀琳勉斌建禮智綱雲綸英襲父
爵早世傑今嗣為應城伯孫女十四人一適太師英
國公男忠一適金吾衛指揮桑華餘幼在室曾孫五

人公歿葬二十有二年傑奉公之事行謁予告曰傑
賴先祖餘休嗣膺封爵顧墓道之碑未立無以昭功
烈垂不朽乞不靳而畀以文庶後世子孫知先世成
立之難兢慎自持不敢廢墜厥家予昔獲侍 太宗
左右備悉公之勲蹟有可書者今傑又具述公始終
之詳謁請益堅詎不容辭乃叙次如右而系之辭曰
明明 太祖順天應人奮自淮甸汛掃胡塵公於
是時仗劍來附從殄群雄克用其武功成位升弗
究厥施武德之階養銳蓄威 太宗龍濟天鑒明
德內難構興 皇怒斯赫乃張義旗乃舉義師起

公于家知公有為言言通城寔國屏蔽命公鎮之
邦域之計維公桓桓振我師千士勇民和戰克守
完東兵之來其勢十倍薄而擊之一鼓而清京師
既寧四方既平皇命報功顯爵是膺礪山帶河
金書鐵券子孫繩繩頌大蕃衍惟公之功唯皇
之德世其承之有永無斃馮村之原峩峩穹碑用
詔後人刻此銘詩

平江伯壙誌

楊榮

公諱瑄字彥純姓陳氏世為廬州合肥人曾祖某祖
某世積善父諱聞洪武間為四川成都右衛指揮同
知茂著勲績既歿公襲其職以勞累陞右軍都督府
都督僉事督操舟師於龍江太宗文皇帝舉兵靖
內難至江北公知天命有歸即率舟師迎濟論功授
奉天翊運宣力武臣特進榮祿大夫柱國平江伯食
祿一千石仍兼舊職賜白金鈔幣給誥贈其曾祖祖
考俱如公爵曾祖妣某氏祖妣某氏母某氏俱夫人
封其妻湯氏夫人永樂元年奉命董海舟運糧百萬

石給北京及遼東三年以舟師達百萬倉於直沽遂
築天津衛城四年復董海運遼東回至沙門島倭
寇犯境追勦至金州白山島寇敗走屢承命往福建
緣海備倭寇聞公至匿不敢出十年復領海運以海
道空闊舟行往往眩惑失據奏於太倉海口築土山
高三十餘丈周十餘里為表識以便往來既成賜名
寶山詔為立碑十一年築海門捍海堤岸已而朝議
以海運艱險濬山東舊河通北京公奉敕於湖廣江
西造舟二千餘艘以從河運公建議造平底淺舟時
甚便之歲凡運三百餘萬石蓋視海運加二倍焉又

建議於淮安城北開清江浦河由管家湖入鴨陳口
達清河置四閘以免風濤及掣壩之艱又緣管家湖
築堤十餘里蓄水且便行者又於河畔置常盈倉五
十座以貯江南歲運之糧徐州臨清通州亦各致倉
貯所運糧儀真瓜州二壩潮港歲久淤塞咸疏濬之
呂梁徐州三洪險峻數壞舟公請於水涸時鑿去傍
石導水中流復置三閘蓄水往來便之又於沛縣南
刁陽湖口置閘於濟寧北南望湖堤築三十餘里以便
挽舟慮舟膠淺則緣堤置鋪夫專指示淺處自濟寧
至臨清各置閘以時蓄洩凡所經營具有條理仁

宗皇帝嗣位首言經國利民也事協于宸衷降勅
獎論賜以鈔幣命其子孫世承伯爵 皇上即位以
公老成仍命總督漕運兼鎮淮安公益竭心效勞推
其謀猷屢賜勅獎勞蓋饒運重事公任之既久積思
彌深上益 國家下便軍民以是簡在 上心去年
冬來朝備承嘉勞賜宴於禮部陞辭加賜以鈔至淮
安疾作 上聞之又賜勅勞諭命其子儀偕名醫往
視已而少瘳踰月疾復作自知不可起封所佩漕運
印及制勅付其長子佐具奏遂卒宣德癸丑十月十
一日也訃聞 上深悼歎輟朝一日追封為平江侯
賜謚恭襄遣官賜祭令有司治喪葬以明年某月某
日葬于應天府江寧縣大山之原子男五人佐儼儀
倫侃女三人長適豐城侯李彬第二子方次適江陰
衛指揮同知張瑛一尚幼孫男二豫裸女也皆幼嗚
呼公以明敏之識幹濟之才遭遇 聖明戮力效勞
榮膺封爵光昭先世福及後嗣而身歿之後隆被寵
息加封賜謚昭著史冊耿耿不磨夫復何憾用書此
納諸壙中以貽不朽云

奉天翊衛推誠宣力武臣特進榮祿大夫柱國

追封平江侯謚恭襄陳公神道碑銘

楊奇

太宗皇帝初自北藩靖內難至江上都督陳公瑄具
舟迎濟內難平上正大統錄功賜公奉天翊衛推
誠宣力武臣特進榮祿大夫柱國封平江伯賜誥券
陳氏家合肥其先世具余所著其先公墓碑公字彥
純自少穎敏不凡好善惡惡內篤孝行洪武中侍父
官成都習兵畧精騎射以武臣子選侍大將嘗從出
郊遙望孤鴈謀鵠羣命衆從者射不中最後命公發
一矢斃之有鷗翔于上命公射應弦而墜自是屢試

皆竒中衆大服而公不自為能。朝廷命總兵者作
蜀府宮城遣將伐材於山所行失律且材不中度又
所經瘴地士多死總戎察公可用遂命之公善撫綏
明號令別取善道七百里以入先期而還士不病所
得材皆適用總戎者嘉之又命董繕作具有條理遂
從征南番岩州中亭及散毛鎮南咸建勞績代父職
為成都右衛指揮同知父坐舊累謫戍遼陽公伏闕
奏請代行特詔父子並免復職衛卒數輩驪諛狙詐
挾制上下為衆患公次第悉去之善類以安從征越
嵩討建昌酋長月魯帖木兒踰梁山平天星寨破寧
番諸蠻駐西河口諭降夷人數千從總帥復征鹽井
平三山寨及小伯夷進攻卜木瓦寨據要害立堡以
斷賊路官軍分三隊進公居中已而左右兩隊弗支
奔還公所統僅百餘人冒險先登賊數千圍公公下
馬率衆且射且斫賊疲稍却公亦傷足裹創進戰自
已至酉賊敗走公全所統而還復從征餘寇賈哈刺
時寇衆數萬據嶮以拒官軍分三道公軍後進由番
西涉打中河得問道乃出竒兵作浮梁渡河既渡撤
梁以固士志遂壓寇境寇憑嶮迎敵一百十三戰奪
其嶮明日復力戰凡七合寇大敗遂入其壘簡銳卒

出哨今望見前軍旌旗即舉砲俾知已敗寇仍遣五百軍斷寇走路寇窮出降械送賈哈刺京師撫輯其餘衆公及麾下加被陞賚從蜀獻王巡邊招撫邊夷兼理茶馬之政邊人悅戴灌口都江堰壞民苦水患公修其隄防躬督工作為堅久計矜恤無告出賞置義田二百畝於成都積所入租凡貧不能衣食不能婚嫁及死不能斂葬者皆給之會雲南兵征百夷以功陞四川行都司都指揮同知遂進右軍都督府都督僉事 太宗皇帝知公才可任時北京軍儲不充命公歲董運百萬石道海給之公措置井井勅建百

萬倉於直沽尹兒灣城天津衛藉兵萬人戍守公善任使均勞逸秋豪無取於下凡漕途姦弊掃滌一清漕舟所經海島夷人畏憚官軍悉閉匿公下令俾出為市而遣官監臨平其直軍無敢譁人兩使之舟還值倭寇劫沙門島公率衆追至朝鮮境上焚寇舟殆盡寇以殺溺死者甚衆奉 命率舟師於閩海備倭寇者三海溢冊沒隄岬起揚之海門歷通泰北至鹽城凡八百里奉 命以四十萬卒修之航海至者茫洋莫知所停泊往往膠淺公於太倉相可泊處以二十萬卒築高丘二十丈延亘十里為表識衆便之稱寶

山事聞上親製文樹碑焉既建北京罷海漕浚濟寧
臨清河通南北往來仍屬公董餉運公建議造淺艦
二千艘初歲運二百萬石為之有方後增至五百萬
石國用以足若疏清江浦引水由管家湖入鴨陳口
達淮以免淮河風濤之患統管家湖築隄亘十里以
便引舟浚儀真瓜洲二埧潮港之堙鑿呂梁徐州二
洪巨石以平水勢築沛縣刁陽湖濟寧南望湖長隄
開泰州白塔河通大江築高郵湖隄隄內鑿渠亘四
十里以通舟南北造梁以便陸行自淮至臨清相水
勢高下建隄四十有七以時啓閉皆舟楫通行永遠

之利於淮濱作常盈倉五十區以貯江南輸稅於徐
州臨清通州皆建倉以便轉輸慮漕舟昧河深淺自
淮底通州濱河置舍五百六十八所舍置卒俾導舟
可行處緣河隄鑿井樹木以便夏月行者凡於事慮
之周而為之果 仁宗皇帝初臨御下詔求言公首
言七事大槩謂南京國之根本宜為久遠鞏固之計
選將益兵以嚴守備長民長兵皆宜擇賢能然後政
舉而下不失所賢能在推舉推舉在覈實乞選朝臣
之公正者分巡天下考察百司政事得失進 能黜
貪鄙則官得人而治可興今府州縣學教官多不得

入乞令風憲考察罷黜別選今中外軍伍多缺蓋由
所管頭目私役擾害不勝其致逃逸乞勅都府兵部
都司嚴切禁約就行清理老疾者令戶丁代逃逸者
責限追捕戶絕者驗實除豁伍籍又邊防之要在兵
食足近歲如開平等處城不足兵兵不足食所守何
由完固乞選武臣之有方畧者授以精兵足其衣食
給之堅利器械俾日教習如有沃壤令兼務耕守今
漕運惟江西湖廣浙江及蘇松諸郡去北京甚遠漕
河又有洪暵淺凍之阻往復踰年謀費數倍正糧上
逋公租下妨農務乞自今令運於近便淮安徐州等
處收貯別令官軍運至北京則民力可蘇農務不妨
各處官軍每歲漕運畢財力殫乏到家又修理壞船
運來歲糧勞動可憫其所管頭目又加別役以重困
之乞行禁約今後漕運軍士不得再有別役馬船快
船惟二三百料者可行於漕河所載不過五六十石
每船已有額設水夫今又於緣河拘集軍民聽候其
至接遞聽候日久衣食艱難有至行丐者乞自今罷
之上覽奏嘉嘆命有司咸即施行賜勅獎諭有老
成忠愛之誠之褒加之重賚賜誥追封其曾祖省三
祖重一考聞皆平江伯曾祖母孫祖母朱嫡母王生

母王故妻湯皆夫人命子孫世襲宣宗皇帝臨御
命公鎮守淮安兼督漕運公至察宿弊之為民厲者
悉革之豪猾姦宄皆斂避境內以寧時已嬰疾而躬
勤旦莫靡有滯事疾間入朝深被嘉勞賜宴賚還
至淮安無幾疾復作上聞特勅勞問時子儀在侍
衛令挾醫馳驛往侍竟薨宣德癸丑十月十一日也
春秋六十有九訃聞上悼嘆輟視朝一日追封平
江侯謚恭襄賜祭命工部營葬公為人閭閻英毅弘
度偉畧稠人廣會譚論疊疊倫輩推服公餘披閱載
籍考知往古成敗治亂之故喜近逢掖士時相講議

善交際能推利為義所至以濟人為心多所建置人
用德之不忘家有樂善堂恒舉鄒孟氏仁義忠信樂
善不倦之語以勉子孫配其人封夫人子男五佐龔
平江伯後公數歲卒次儼次儀今為勲衛好文事精
武畧次倫次侃女三李芳江陰衛指揮同知張英其
婿也一未行孫男三裕今龔平江伯祐裸女七公葬
以薨之明年三月墓在江寧縣大山之原余與公同
朝三十餘年相知且好於是儀以狀求著神道之
碑故按狀叙而銘之銘曰

繫公挺出何桓桓武無勇智追前聞材藝夙試卓

寘倫莪冠三品承考勲蠻谿獠响獫狷羣負嶮弗
擾寧且趨公奮掃刮迅被塵湔滌腥穢寧邊民有
截譽望齊岷岷歛微來東衛宸垣遭承與運效駁
奔錄勞䟽封昭鴻恩貂蟬鞶玉衣繡麟報賜志企
古蓋臣單心畢慮靡夕昕滄溟茫洋渺涯沂歲漕
萬艘奄然臻有梗于海威共震斬鯨戮鱷焚甲鱗
崇表海岬亘長雲雲章龍彩天垂文南賦北貢艮
以辛踰淮歷濟底天津䟽堙鑿堅劬且勤坦行如
砥戚者忻猗嗟公篤孝與仁厥施諸時績弗泯愛
國亦有嘉謨陳功載冊府被後昆大江之陽歸有

墳太史銘之昭不刊

奉天靖難推誠宣力武臣特進榮祿大夫柱國
豐城侯追封茂國公謚剛毅李公神道碑銘

李賢

公諱彬字文質姓李氏鳳陽定遠人父信善騎射少
從太祖高皇帝征伐以戰功累官明威將軍濟川
衛指揮僉事後以老疾致仕公方弱齡補父官即如
老成人上下交譽之洪武庚午率所部兵從穎國公
征北虜歷朶顏鴉兒諸山追襲虜酋阿剌失里至洮
兒河獲人馬數十復歷黑嶺寒山諸處至熊皮山追
襲虜酋兀刺罕時太宗文皇帝居潛邸聞公智勇

深嘉賞之明年遣公巡視宣府與河保安隆慶懷來諸邊城尋以公父信為遼東都司都指揮使癸酉命公率兵築宣府德勝口城巡視邊關明年復命公率兵築萬全懷安城又明年命公率兵征哨泥河營黑松林諸處至哈刺之地乃還胡虜遠遁庚辰 文皇帝舉兵靖難命公率兵攻薊州遵化克之以功陞指揮同知又攻雄縣莫州克之陞都指揮僉事復克大寧城又克敵於鄭村坨克廣昌蔚州大同諸城明年夏於白溝河大戰以功陞都指揮同知進克滄州壬午於滹沱河單橋藁城諸處克敵追至彰德出哨定

州陞右軍都督僉事又於楊村交戰被鎗 上即遣醫視之賚予優厚俾還北平公奏曰臣本戰士豈以微傷自餒願隨軍效犬馬之力 上不允命輔世子守城癸未命公率兵護中宮至京師永樂甲申 上以四方既平乃論功行賞念公之勞居多封奉天靖難推誠宣力武臣特進榮祿大夫柱國豐城侯食祿一千石子孫世襲自是委托益重乙酉命鎮江西丙戌命巡皂君山下酉命征交趾有功加祿五百石乙亥勦平東海倭寇庚子督操江尋命往長沙討賊李法良獲之辛丑命捕福建海寇癸卯命佩征虜前將

軍印總兵守甘肅大振軍威胡虜驚伏丁未隨駕
至京命佩征夷將軍印總兵守交趾遠人莫不仰德
畏威南陔晏然在鎮六年以疾卒時永樂二十年正
月十五日也文人莫不罷市巷哭其德澤及人深矣
訃聞上為之震悼輟視朝一日加賜賻儀追封茂
國公謚曰剛毅遣官諭祭復追封三代祖考皆上公
妣皆公夫人勅葬宛平縣西安里之原蓋四十有四
年於今矣配其氏累封公夫人子男四人長曰賢故
嗣封豐城侯次曰芳次曰恭次曰禎女二人長適彭
旭次適豐潤伯曹義孫男二人長曰勇今嗣封豐城
侯次曰鉞孫女二人長適指揮戴瑄次適都督子陳
珣嗚呼公以武士遭遇龍飛之運乃能建勳庸昨茅
土東征西討迨無寧戚可謂國之勞臣矣是豈可以
不銘輒因勇之請序而銘之銘曰

桓桓李公慶時之逢奮武揚威克效其忠統其父
兵所向無敵長驅虜巢左右搏擊胡塵既清武備
是營飭彼邊城大振軍聲靖難之師惟公秉義奉
戴真人不震不悚通侯之爵帝寵是加世澤
之延與國無涯公復何心殫其智力奉命周旋
曾不少息或鎮邊方或殄強梁意氣之盛泰華軒

昂終于炎荒葬于畿土史臣勒銘光照千古華神

之公與國無異公身同公報其言公卒命國死

之公與國無異公身同公報其言公卒命國死

之公與國無異公身同公報其言公卒命國死

之公與國無異公身同公報其言公卒命國死

之公與國無異公身同公報其言公卒命國死

之公與國無異公身同公報其言公卒命國死

之公與國無異公身同公報其言公卒命國死

之公與國無異公身同公報其言公卒命國死

之公與國無異公身同公報其言公卒命國死

奉天靖難推誠宣力武臣特進榮祿大夫柱國

太保寧陽侯追封濟國公謚武靖陳公神道碑

銘 李賢

永樂初靖難功臣不下數十人然克享祿位於悠久

者鮮矣惟太保寧陽侯陳公歷事五朝出藩入衛凡

六十餘年而以令終嗚呼盛哉公諱懋字舜卿鳳陽

壽州人高祖萬曾祖福三祖大一俱追封涇國公妣

皆涇國夫人父亨從太祖高皇帝定天下以功陞

都指揮使洪武三十二年從太宗文皇帝靖內難

復以功進都督同知卒贈奉天靖難推誠宣力武臣

特進榮祿大夫柱國追封涇國公謚襄敏母韓氏涇國夫人襄敏公三子長恭嗣為都督同知次忠府軍前衛指揮使季即公也器宇宏遠識見超卓尤負膽氣工騎射年弱冠即從父領兵為前行凡壩上廣昌蔚州大同白溝濟南之戰與父同功又禦敵于單橋藁城西寨東平固鎮小河戰尤力累陞右都督永樂初論功行賞進封奉天翊衛宣力武臣特進榮祿大夫柱國寧陽伯食祿一千石子孫世襲 賜誥券賚予甚厚六年受 詔佩征西將軍印總兵鎮守寧夏賜寶鏐白粲牛羊以為戒嚴之費公至鎮號令一

新凡胡人降附者親撫綏之務得其歡心乃已七年選精兵自將大敗虜于境外由是殘孽遠遁邊塵為之一清捷聞加封奉天靖難推誠宣力武臣特進榮祿大夫柱國寧陽侯食祿一千三百石子孫世襲復賜誥券及貂蟬冠服錦綺寶鏐八年春 上親征北虜公將左掖兵十一年冬還鎮十二年春 上復親征公仍將左軍俘馘甚衆明年還鎮十四年夏有報虜酋馬哈木死者公未之信曰是欲懈我邊備也即申飭諸將固守已而虜衆果來見有備而退二十年春 上復北征公率所部兵以從還京 賜玉帶金

綺龍衣且聞公有女賢淑禮聘入宮冊封麗妃尋命
歸寧父母賚予駢蕃當世無與為比二十一年詔
公統陝西寧夏甘肅三鎮兵出勦叛虜公率衆直抵
賀蘭山擣其巢穴盡收其酋長也先王干部落及其
牛馬駝羊數萬凱還上大悅寵賚有加二十二年
復隨上北征師還以公為殿至京遂領前軍都督
府事仁宗皇帝登極以公勛戚有勞加太保復官
其長子昭為勛衛宣宗皇帝臨御待公尤厚樂安
州之平公領京營兵衛上有功還有金帛人口之賜
二年復鎮寧夏三年春奏徙靈州城以便防守四年
春得玄白二兔以進上賜璽書獎諭兼有玉帶龍
衣馬圖之賚六年還京十年命佩平羌將軍印移鎮
甘肅正統改元今上皇帝嗣位念公勛戚之舊召
還奉朝請十三年冬福建民鄧茂七作亂偽稱閩王
勢甚猖獗上曰此賊非老将不能平特命公率
師往討之至浙江有欲分兵先守海口者公曰如此
是絕其生路則為死寇矣不從明年春師次建寧有
欲屠沙尤二縣者公曰如此則益堅賊心矣乃下令
諭之俾各復業能斬賊首者官賞與王師同於是降
者日衆公曰賊勢已孤無能為也乃五路進兵一鼓

而收之凱還賞勞加等命領中軍都督府事尋兼領
宗人府事景泰中加太子太師天順改元皇帝復
位思遇益隆固辭宮師許之六年春忽得疾踰秋不
能起上言臣老死不足恨惟陛下以生民為念任
賢用能以圖太平之治則國家幸甚上覽之惻然
曰看卿所奏足見忠誠宜尚加調治以副朕懷久之
醫藥弗効遂薨時天順癸未七月十六日也距生洪
武乙未二月九日享年八十有五訃聞上震悼輟
視朝一日追封濬國公謚曰武靖遣官諭祭加賻及
營葬事東宮及諸王亦各致祭公偉觀脩髯語音

洪亮胸懷磊落敬禮文士雖位極人臣未嘗妄自尊
大而南征北伐口不言功當為中興名將稱首配嚴
氏封寧陽侯夫人早卒子男六人長即昭次曰福寧
俱早卒次曰晟為勳衛次曰潤次曰瑛次曰昂女五
人長適應城伯孫傑次即恭順榮穆廉妃次適東
勝右衛指揮使張昭次適府軍左衛指揮使張輪次
適都督同知馬良潤等下以是歲某月某日與嚴夫
人合葬于都城西香山之原銘曰
壽有陳宗父子傑特涇公濬公後先開國文皇
靖難孰多勳勞涇公輔之首秉節旄奮武桓桓所

向披靡大事垂成星殞于壘濬公承之以篤世忠
鼓勇前馳涇公是同躍馬揮戈到處喋血乃伯乃
侯成此茂烈金符虎節屢鎮邊陲于征于狩無遠
不隨闔寇助勦東南震恐濬公征之遂輯其衆巍
巍勛 歷事五朝龍衣玉帶惟 帝之褒壽嘏既
經允顯六紀容與承平宿將無幾煌煌愍冊貴此
令終生死哀榮孰如濬公西山嗟峨佳城在側史
臣勒銘千載輝赫

右柱國掌行後軍都督府事定國公徐公墓誌

銘

楊士奇

上天命聖人為天下主必生文武之賢為之輔佐用
成大勳建大業若身都將相享富貴榮名終傳被子
孫久而勿替又必本於盛德焉元之既衰寇盜充斥
生民塗炭極矣我太祖高皇帝以至仁大聖躬膺天
命仗一劍以起淮右舉湯武吊伐之事有識之衆雲
附景從義旗所之東征西怨不數年四方肅清天下
歸戴遂造萬世太平之業於時股肱心膂之臣皆英
武傑特超邁之才若純誠厚德顓顓焉尊王庇民之

心者中山武寧王徐公其首也天監厥德報福彌厚
延慶後人愈遠愈盛非一時同輩所可擬也蓋王四
子長輝祖襲爵魏國公次增壽當太宗皇帝靖難之
際有翼戴功而竟死非命初追封武陽侯進定國公
謚忠愍公其嫡嗣也時年十五召見賜名景昌遂命
襲爵定國公授欵承祖業推誠奉義武臣特進榮祿
大夫右柱國食祿二千五百石子孫世襲命吏部慎
簡儒師道之學問公天資穎敏已嶷嶷負智識從師
講授日謹和度其師豐城丁秀恒重厚雅則公惟其
教之率未嘗或違而寒暑朝夕所以事師禮成備踰

年始趨朝參上察其進退恭謹喜遂欲任以事永樂
四年命掌左軍都督府雖細務必親而智日廣明年
汴河溢命公代祀河惠以寧十三年車駕幸北京以
公事入見顧問再三進帝對稱旨賜御廐馬三疋欵
六萬緡十七年脩鳳陽皇陵宮殿命公董之益竭祇
勤撫綏獎勵人競勸功十八年侍仁宗皇帝入朝洪
熙元年命掌行在後軍都督府是年丁母太夫人沐
氏憂宣德初起復高煦構逆宣宗皇帝下詔親征命
公等守北京師還賜賚良厚後車駕三出巡邊公皆
扈從祀嶽瀆及冊封宗室皆秉虔將命先是仁宗皇

帝篤念外家孜孜勉公兄弟子姪於學公祇體德意
克力進脩朝退閉門手不釋卷遂多識古人言行之
善與凡治亂興壞之由閒暇吟咏自適家居事親孝
為人簡靜寡所交處惟名儒賢士過之必起趨迓相
與傾寫極懽未嘗苟附權貴正統二年六月十二日
以疾終於正寢其生洪武戊辰六月十八日享年五
十計聞上命某官賜祭賜賻勅有司治塋將以卒之
歲九月九日塋宛平縣京西鄉黃家臺之原公上世
及三代已具先塋之碑其配張氏封定國夫人其子
男二長顯忠次顯義女一歸金吾衛指揮同知盧能

於是顯忠奉國子助教謝濟所撰事狀介太醫院判
蔣主善求余銘墓嗟夫公生佐命元勳之家遭逢列
聖爵位崇而寵祿盛而心之所存躬之所蹈凡以嗣
先烈垂後裔者其可無憾矣遂為銘曰菽菽中山尚
文敦武翼聖承運弘靖天下功存社稷德施生民配
祀清廟衍祚後人維賢仲子忠愍克肖中遭非命帝
用允悼崇爵華褒寵光隆隆大國豐祿命公嗣封煌
煌貂蟬加公卞角拜頤受命嶷特恭恪篤念天寵亦
篤孝思圖惟弗忝肆勵書詩前言徃行心在躬蹈曰
予操志敢昧忠孝承官惟祇蒞事惟勤雍容在廷有

像循循躬事四聖歲歷三紀鞠躬一節忠終猶始既
文全歸壽豈必多夷考平素行罔缺點宛平西鄉卜
歲斯吉悼示悠遠太史有述

推誠輔運宣忠效力武臣柱國後軍都督府左
都督西寧侯宋公神道碑銘

楊士奇

永樂五年七月某日推誠輔運宣忠效力武臣柱國
後軍都督府左都督西寧侯宋公終于肅州訃聞
天子悼歎遣官賜祭勅有司給傳還其喪明年夏至
京師葬聚寶門外其考之塋之次公諱晟洪武中所
賜名其字景暘宋世家鳳陽之定遠元季我太祖
皇帝龍興歲壬辰公隨父朝用兄國興來歸明年從
克濠州又從戰敗賈魯父兄並以功授萬戶甲午從
張天佑克五河泗州盱眙又並進總管乙未從上克

和州渡江下采石太平總管邵榮等潛有異謀國典
察知以聞榮等伏誅從克溧陽進攻南臺國興戰沒
命公襲兄職丙申從攻陳也先水寨克之遂從克南
臺公父陞廣德元帥丁酉隨廣德公克宣州還改廣
德公天寧翼元帥以老留建康公從鄧愈克徽州受
功賞戎戎召入侍衛己亥襲天寧翼元帥庚子調征
饒州及江西諸郡以次平賜襲衣文綺命克統兵官
平諸山寨洪武元年克建寧遂留守禦新定官制實
授武德將軍建寧衛正千戶四年陞懷遠將軍建寧
都指揮使司都指揮同知冬召還陞江西都指揮使

九年調大同授龍虎將軍十一年調陝西所至治兵
撫民不嚴而肅十二年掌涼州衛十三年逐北虜至
白城獲其人馬甚衆十五年父病詔公還侍又三年
父沒既襄事復填涼州虜時數為邊患公率兵討之
追至亦集乃之地斬其克渠也速兒監等及其衆無
算餘悉生繫送京師又招降虜偽國公吳把都等萬
八千人而送其首長不答兒等百五十人詣京師簡
其壯者傳卒伍餘悉處之善地俾耕牧自便驛召公
還京獎諭再四賜賚甚厚復填涼州十九年召還陞
驃騎將軍右軍都督府都督僉事賜鈔文綺以其官

贈其三代仍填涼州廿三年夏遣中使就賜白金及鈔至秋復三遣賜鈔文綺授制諭充總兵官征哈密里破之哈密者去肅州千餘里虜所城也誅其偽王子別列怯等三十餘人獲虜衆千三百人及金印一銀印二悉送京師所獲馬牛羊咸給將士二十五年復充總兵官征罕東西叛番寇誅禽七千五百餘人獲馬二千五百牛羊十萬遂還京師二十七年調中軍都督府是歲虜寇遼東命充副總兵率兵討之遇戰腦溫江獲虜衆千餘馬倍之明年廣西悞懷諸寨連結為亂命充右副總兵徃征之誅禽七千餘人賊

平還京又明年總羽林八衛兵徃平五開龍里十三洞之寇三十一年率師城萬全諸衛歸二年出填甘肅太宗皇帝初臨御公朝京師陞後軍都督府左都督永樂元年授平羌將軍充總兵官仍填甘肅三年虜日益聚近邊公遣人諭以朝廷德意其酋長把都帖木兒倫薦兒灰率部衆五千馬駝萬六千來歸邊境底寧事聞賜勅獎諭命都督徐庸緒尚書趙玘持節即軍中封西寧侯賜推誠輔運宣忠效力武臣柱國仍後軍都督府左都督食祿千一百石加賜田若干頃又二年以疾終享年若干公曾祖某贈

其官妣某氏贈其官夫人祖一公及考皆再贈其官
祖妣朱氏妣陳氏皆再贈其官夫人公之配丁氏許
氏皆封西寧侯夫人子男幾某某瑄府軍右衛指揮
使先公卒琥駙馬都尉尚安成公主瑛駙馬都尉尚
咸寧公主永樂中琥駙西寧侯 仁宗皇帝嗣位琥
坐事改命瑛駙西寧侯孫男幾某某傑金吾左衛指
揮使偉羽林左衛指揮同知俊天策衛指揮僉事儼
旗手衛正千戶佐龍驤衛正千戶嗚呼公勲著 國
家貴聯戚里慶澤被于後嗣名聲施于無窮固本於
際遇 聖明千載之幸會亦必其忠義之行閱遠之

材克勤始終有以迓承之矣故既述其事於碑又系
之銘曰

天運 皇明龍興淮土魁智傑能如雲泛附定遠
密比猶漢沛豐父兄偕來有偉宋公義旗所嚮仗
劍先驅神武不殺迎降懽呼長江飛渡金陵定鼎
分命股肱出綏四境于宣于歛于番于閩公從總
戎聲威日振甌寧既靖公留奠之進奠藩垣大江
之西雲中在左分陝在右公來填撫煌煌旌棨虜
窺西陲公徃遏之斬繫其渠招懷其餘繫胡遼陽
薙孽崩表如燎滅枯如鐵摧朽馬跡所歷幾周四

遐桓桓之志無康于家 文皇臨御親任舊老自
西來朝蒼顏白首 天子曰嘻卿宜在廷紓予西
顧孰乎愈卿公曰臣職及臣未衰西人忻忻迓公
復來鞠躬盡瘁遑敢怠寧邊人情公屹然長城宣
上德思洽于遐外耄倪畢歸如川赴海 天子
曰嘻維時茂勲崇爵豐祿予慰乃勤維公遭際寔
多父兄偉績賢稱晚而益閑存沒榮哀歸從先兆
來世莫京繇公所肇墓道有石其崇九尺太史述
銘亦耀無極

右柱國太傅征南將軍黔國公贈定遠王謚忠
敬沐公神道碑 楊士奇

正統四年三月十八日黔國沐公薨于雲南之楚雄
訃聞上悼念輟視朝加隆卹典遣官賜祭者再追封
定遠王謚忠敬親王亦再遣祭其子護喪歸南京公
卿文武群臣及所過方岳大臣皆祭以薨之歲十一
月廿六日葬江寧縣長寧北鄉觀音山先塋之次沐
氏鳳陽定遠人其先所自具前翰林學士王景所著
黔寧昭靖王神道之碑王之高祖考曾祖考祖考以
昭靖貴皆追封黔寧王高祖妣曾祖妣祖妣妣耿皆

追封黔寧王夫人昭靖四子伯諱春襲封西平侯歿
謚惠襄仲即王叔昂右軍都督府同知季昕駙馬都
尉王諱晟字景茂自少氣宇閎厚端慤凝重聰悟過
人而博學遠識恭慎寡言喜愠不形於色高皇帝重
之既冠授後軍都督府僉事夙夜祗勤陞授特進榮
祿大夫左都督惠襄繼昭靖鎮雲南薨王嗣封西平
侯仍奉命鎮雲南王承父兄之後秉誠殫慮益弘遠
圖威服德懷恪勵夙夜先是麓川不靖諸蠻逐宣慰
使而分據其地王適至奏發兵平之復奏以其地置
孟養木邦孟定三府鎮沅威遠二州干崖潞江灣甸

大侯者樂五長官司而歲徵其貢賦又於潞江之西
置騰衝千戶所以控制之夷遂帖息太宗皇帝臨御
之三年八百蠻酋侵邊王遣將先率兵討之躬率兵
繼之後及蒙自縣蠻聞王來遂遁進禽其首誅之事
聞賜璽書白金勞王四年安南叛命征夷將軍率兵
師及湖廣等都司兵討罪命王佩征夷副將軍印克
左副將軍率雲南等都司兵分道進討王率兵由蒙
自經野蒲斬木通道以入先遣偏裨攻奪猛烈棚華
關隘賊徒悉遁遂築堡駐兵造舟分遣諸將出宣光
江口奪澳沕寺沙昇舟夜出洮水陣師遂遣將引兵

沂沭攻賊之富良江自旦鏖戰抵暮賊引却翼旦諸將咸歆奮擊王曰受命吊伐所欲得兇渠數人而已縱殺非皇上好生之心乃止遂造浮梁渡師時征夷將軍大兵亦至廼合攻寇之多邦城柵繼擣其東西二都及盤灘因枚檣江仙侶等寇悉破之寇首黎季犛父子狼狽棄其衆獨挈家屬及左右心腹遠遁于海王合征夷將軍兵追至日南州奇羅海口禽俘無遺械送京師凡得郡四十八縣百八十六戶三百十二萬五千九百獲象馬牛畜軍資器仗安南平六年春班師入朝賜號顯忠輔運推誠宣力武臣特進榮

祿大夫右柱國封黔國公食祿二千石賜誥券玉帶金幣命子孫世襲既大宴上親製詩褒嘉又日賜宴于便殿還鎮雲南是冬安南餘寇攜二命王佩征夷將軍印總兵討之王師壓境寇遁入安海島追至占城之境禽寇首陳季擴阮師鄧容等送京師誅之師還仍鎮雲南十七年富州蠻酋積逋賦不入朝廷命王發雲南貴州兵討之蠻據險以抗王遣兵斷其後諸將請急攻王曰威服不若德服遂使人諭以禍福蠻即遣子詣京師謝罪悉償所逋仁宗皇帝嗣位重王勲德老成詔兼太傅召至息禮加厚遂命佩征

南將軍印還鎮宣宗皇帝初嗣位遣使齎璽書及金幣勞之皇上嗣位恩禮視宣德之初明年改元正統賜金幣加厚是年冬四川會川黎溪蠻合底洎等蠻為亂奏遣弟都督昂討平之二年冬馬龍他即甸蠻不靖復奏遣昂平之三年麓川思任發擾邊侵掠騰衝南甸遣人諭之不下奏躬率兵討之兵至潞江王勉諸將曰出兵尚謀不專恃勇且逼瘴月非用武之時今官軍已集如賊能畏威悔過摠誠謝罪請命赦之斯亦可也遂復遣人諭之不下乃命弟昂及都督方政等率兵前進王尤戒其慎重時王整兵在後政

等夜渡江破賊柵賊衆奔北官軍乘勢追至景罕等寨斬首三千餘級獲象三十餘政奮勇獨進賊伏兵四散政力戰死之時春已半王慮瘴發非官軍利遂旋師將駐金齒會有旨命王還鎮王至楚雄疾遂薨方疾革時顧弟昂曰吾父子兄弟受國家周極之恩吾不能報矣吾弟勉之吾一家子子孫孫世堅忠誠保臣節無忝君親又顧昂曰斯役也雖偏將失利固吾總師之過此賊不可不貸汝勉之勉之言訖而逝歸視所過道路城郭無貴賤小大皆拜哀慟蓋王在鎮久惠愛之被于下者深也王忠孝之誠本乎天

性無或弗盡與子弟言亦惓惓斯道友二弟甚厚教
子孫勤以禮法家政秩然位極人臣而禮賢重士虛
已聽納寬裕有容未嘗面及人過凡文武屬吏有過
者惟恐王知務自掩蓋其因自悔徙行者亦多王明
於韜畧然以仁為主蠻夷有罪未嘗輒加兵誅必諭
導使改數諭弗悛乃奏發兵遣兵入境若夷能知懼
罪亦曲貸之與之更新雖臨陳必戒麾下毋縱殺戮
賞罰明信威愛並行至於完城池飭武備訓將士理
屯田通水利實倉庾恒謹成法若輕徭賦問疲瘵尤
勤致意學舍弊陋具材儻工葺之不以煩下治公有

暇手不釋卷稽古明道動師昔賢蓋從容其文武之
才仁義之師也配程氏追封定遠王夫人子男一儼
襲封黔國公孫男一圯至是王之子以事狀求余書
神道之碑謹按狀叙而銘之銘曰天啟皇明于淮之
右配天與地篤生帝后二聖至仁作民父母心存萬
方包含徧覆矧孤在里靡敢怙恃二聖矜惻曰其予
子鞠之誨之勞劬備周以長以成有偉才猷帝有息
言爾復爾氏懋乃樹立爭乃先祀嗚呼昭靖盛德豐
功皎日之誠持孝與忠嗚呼忠敬績乃烈考惟孝之
執惟忠之蹈發軔都府簡在宸心夙夜弗違秉其慎

欵徃綏漠人幾五十年率考之行敷帝之恩俾食俾
衣免其寒飢重學崇師導之尊卑平其政令時其作
止人戴惠慈淪骨浹髓有或弗惠以諭以誨溥誨弗
悛式劉以戒友人悖兇披猖為狂遣天毒氓軼我邊
疆奉詔出師徃行天討桓桓疾馳雷驅電掃富良飛
渡如履坦途兩師窮追縛寇海隅解維脅從宣布教
條爰整師旅凱歌歸朝飲至策勛上公錫爵嘉寵元
臣龍章輝灼滇人之思瞻望旆旌帝不忘遠申命南
行祗事五朝鞠躬小心奉國忘家志如堅金寸棘未
剪躬不寧處過自徧禪于躬引咎終于王事德善孔
多顯顯華褒千歲弗磨沐世子孫奕奕象賢萬忠與
孝永光其傳

奉天靖難推誠宣力武臣特進榮祿大夫柱國
太保陽武侯追封鄆國公謚忠武薛公神道碑

銘

楊士奇

宣德五年五月太保楊武侯薛公奉命城隆慶永寧
赤城獨石竣事將歸以疾聞上遣中官以御醫往
視且賜勅諭勞至京猶力疾入見上慰諭再三既
歸第日賜御藥遣中官臨問無幾竟不起七月廿三
日也訃聞上震悼親為文祭之追封鄆國公賜謚
忠武詔有司治喪葬凡喪葬之儀皆優等蓋特恩云
公諱祿姓薛氏世家山東膠州之新興社曾祖諱

安妣劉祖考諱大妣金考諱遇林妣張公兄弟六人而公第六自少傑持有大志未冠籍戎伍上官皆竒之從北征金山及哈刺哈之地又從征迤都山乃兒不花等處自是屢出西北二邊涉萬里而還太宗皇帝舉兵靖內難公首從義旗攻九門克薊州遵化援密雲攻雄縣追敵漢州威奮勇先驅以一當百戰真定公生擒敵左副將軍駙馬都尉李堅超陞燕山右護衛指揮僉事賜白金文綺從援永平攻下大寧富峪會州寬河時南兵已圍北平城公還先遇其哨騎薄戰敗之車駕繼至從戰鄭村埧大敗陞指揮

同知從克廣昌蔚州攻大同率兵前哨獲敵人馬遂從南征大戰白溝河追奔至濟南陞指揮使從克滄州大戰東昌公以五十騎前哨遇敵兵數百與戰敗之獲馬三十餘疋敵悉衆來追公復奮戰大敗之獲馬二百餘匹敵於威縣及深州伏兵以要旋師皆擊走之從戰夾河大捷戰滹沱河右軍力屈公率衆馳赴之出入敵陣數十合戰敵敗走公追至夾河斬馘無算獲馬五百餘匹明日戰單家橋公馬蹶為敵兵所得拔刀斬敵兵復上馬督戰遂敗敵將平安軍以次攻下順德大名彰德及攻西水寨公生擒敵都指

揮一人斬獲尤多從攻東阿平東汶上皆下之繼戰
淝河大店小河汴隄靈壁率勇先諸軍遂渡淮渡江
從車駕入京師太宗皇帝為臣民推戴既正大
位論功行賞陞驃騎將軍後軍都督府都督僉事以
其官秩贈三代永樂六年陞都督同知八年從車
駕北征至玄溟河以功進榮祿大夫右軍都督府右
都督兼左軍都督府事以其官秩加贈三代時四方
選至幼軍數萬悉命隸公操習十二年從車駕北
征十五年初建北京宮殿命公董營繕十八年成加
奉天靖難推誠宣力武臣特進榮祿大夫柱國封陽
武侯食祿千五百石追封其三代皆侯爵賜誥券二
十一年從車駕北征還奉命討捕湖州叛寇二十
二年復從車駕北征是年八月仁宗皇帝嗣大
位加公太子太保子孫世襲侯爵奉命巡北邊遼虜
寇雲州公率兵追至大松嶺斬獲甚衆事聞賜勅
嘉獎遣中官及鴻臚卿即軍中勞之既還賜白金紗
幣加歲祿五百石洪熙元年佩鎮朔大將軍印率師
巡北邊宣德元年庶人高煦反車駕親征命公為
前鋒先二日圍其城罪人既得留公撫綏城中軍民
還賜銀幣甚厚明年秋從車駕巡邊出會州解后

虜寇塞下與戰敗之生擒其酋斬獲其餘衆遂鎮薊
州永平冬還賜銀幣加厚四年率師護兵餉開平者
再五年春佩鎮朔大將軍印巡邊至竒黃嶺遇虜拒
戰悉斬之盡收其家口孳畜陞太保賜鈔幣居三月
董築城之役蓋從公之言以便戍守公平居無事未
嘗忘危每計邊務言之疊疊或謂其瑣屑者終不為
變蓋其志奉國惟恐不盡為將勇智兼備常先事籌
畫用心之至以夜繼日故所嚮成功未嘗敗北間一
二臨陣中矢石裹創赴鬪有進無退其率師所過紀
律嚴明秋毫無化而撫卹士卒人人歸心若董繕作

規置有方力不煩費功率堅久人亦罕及蓋一代之
興必有一代之臣公祗事三聖涉歷多用志篤鞠
躬盡瘁以效臣職故能建功國家流光簡冊致身貴
富垂慶後昆其非古名將之流而今之不可多見者
歟公壽七十有三年其配李累封至侯夫人子男三
長勲先卒次某次其孫男三長誠先卒次某次某以
是年十月三日葬公于其鄉某原銘曰

明聖之興有命自天必有輔翼名世之賢氣機翕
會雲龍風虎有勲有烈左文右武桓桓薛公始奮
從義大呼迅馳金戈鉄騎智明幾先勇蓋萬夫疇

其膺之折朽摧枯 宗社載安功書冊府在 帝
左右股肱心膂公於事 上一誠不貳知竭臣職
死且無怠公於馭衆有紀有綱撫如春和令如秋
霜歷事 三聖麟衣蟬冠廷有老成 國有屏翰
丹書鐵券傳韻來裔公如長城曷不百歲英靈升
遊九原在此太史作銘式昭無已

廣寧伯追封廣寧侯謚忠武劉公神道碑銘

楊榮

昔我 太宗文皇帝舉義靖難一時英傑智勇之臣
乘運奮興竭忠宣力共成大功若故廣寧伯劉公其
一馬公在行伍中姿貌豐偉智識過人 上察知之
屢有委任以功授密雲衛百戶未半歲復以功四遷
至指揮僉事庚辰春從克蔚州攻大同大戰白溝河
陸指揮同知是冬與驍將朱榮等統邏兵哨滑口籌
筭協機功最諸將辛巳春加授都指揮僉事是後
上益知公材勇可專任用特命領兵制敵若滹沱河

之奪浮橋館陶曹州之擒敗戍卒平村之交戰永平
之解圍與夫懷家庄之俘獲遼東鐵騎前後所獲功
居多再遷都指揮使內難既平 上正大統第功行
賞陞中軍都督府都督僉事優賜白金文綺永樂改
元陞都督同知戊子陞右都督庚寅春扈從 大駕
征北至靜虜鎮公先入賊陣敗阿魯台軍陞左都督
甲午復扈從至和林公率前鋒追奔虜酋馬哈木王
沙漠為之肅清是固 太宗謨烈之盛而亦公効力
所致也尋勅公鎮守遼東備倭寇至即相地形勢請
於金線島西北之望海塢築城堡立烟墩一日瞭者
言東海島夜舉火光公計寇將至亟遣馬步軍赴塢
上小堡備之翌日倭船三十餘艘泊馬雄島寇相屬
登岸徑奔塢上公親督諸將伏兵堡外山下預遣一
裨將領馬隊要其歸路一裨將領步隊與之逆戰公
舉炮伏發寇大敗奔入櫻桃園空堡中合軍圍之自
辰至酉擒戮無遺生獲百餘人斬首千餘級事聞賜
璽書褒諭徵公至京面慰勞之公對曰受任禦寇分
所當為此皆奉行 陛下成筭又諸將士効力所致
臣不敢當其功 上嘉其謙抑既而封公為奉天翊
衛宣力武臣特進榮祿大夫柱國廣寧伯食祿千二

百石子孫世世承襲仍遣赴鎮公疏將士有功者陞
賚有差先是倭寇出沒海上焚民居掠財貨殺虜生
口北自遼東山東南抵閩浙海濱州郡無歲不被其
害官軍猝不能制往往有坐失機罪死者至是寇害
屏息傍海十餘里兵民安生樂業以至於今受封之
明年是為永樂庚子四月辛酉薨于鎮享年六十有
一訃至上深嗟悼輟視朝三日遣官諭祭追封廣
寧侯謚忠武官為營葬賜卹甚厚復給舟車歸其喪
令所經州郡皆致祭以其年某月某日葬金口御河
鄉公諱榮世居邳州宿遷曾祖諱二公祖諱小大父

諱江俱追封廣寧伯曾祖妣余氏祖妣張氏母張氏
繼母馬氏俱贈夫人配馬氏子湍襲伯爵早卒繼室金
氏封夫人子淮早卒安繼襲伯爵側室高氏子麟陳
氏子正通四人女一人在室孫若干人嗚呼自古英
傑之士逢時奮興身躋顯榮者固多有之然求其功
施國家澤被生民又克始終保全者良鮮矣公遭際
聖明茂建勲績存膺封爵誠千載一時之幸也然
其芳譽慶澤與國咸休亦自處有其道哉公沒之十
有六年其子安乃奉武進伯朱冕所狀事行采求碑
銘以昭永世子素知公者不敢辭遂擬其大者次第

而銘之曰
龍飛在天六合雲從聖作物覩千載奇逢赫赫
文皇靖難舉義桓桓武臣爭效才智有偉劉公既
勇且雄摧堅斲銳孰當其鋒
宗社既安海宇寧
謚惟彼北虜惡盈罪溢屢從天討沙漠肅清維
帝之謨維公之能倭醜肆害公往鎮禦設奇殄殲
茂蹟益著金書鍊券廣寧錫封匪惟侈榮以勵有
功海邦無警戶不夜閉維
帝之威維公之惠琅
琅厥勲濯濯厥聲鼎彝有紀信史足徵益嚴益慎
保全終始生榮死哀同儕鮮比御河之鄉有封其

崇樹茲石刻垂耀無窮

新建伯贈新建侯謚榮僖李公墓誌銘 楊溥

公李姓諱玉孟輝字也先世居真定之曲陽至孝士
中徙河間文河今為文河人高祖誠曾祖德榮志田
園不求聞達祖雄元上都萬戶士有孝行樂賑施以
醫藥濟人所治輒效賞青報鄉人德之皆以公貴贈
中軍都督僉事曾祖妣祖妣皆贈夫人母趙氏封夫
人公生而英敏異常兒甫成童代父戍營州洪武乙
卯太宗皇帝舉兵靖難自太寧歸附從征所至皆捷
若鄭村埧白溝河東昌威縣夾河藁城靈壁大戰皆
有功隨駕至淮大江入南京扈從北征至玄冥河追

殺胡虜本雅失禮由靖虜鎮出廣漢戍敗阿魯台湖
州卓寇嘯聚奉命率南京軍合陽武侯所統軍討平
之上每北征皆扈從嘗命總後營宣宗皇帝征武定
州總軍扈從北還命守彰德復命從征兀良哈亦預
有功公起行伍以奉天將士由總旗陞百戶再陞指
揮僉事壬午冬陞真定衛指揮同知永樂庚寅以殺
胡虜功陞指揮使調府軍前衛領幼軍隨侍皇太孫
洪熙乙巳仁宗即位念公能陞都指揮同知丙午陞
中軍都督僉事己酉春進封奉天翊衛宣力武臣特
進榮祿大夫柱國新建伯歲祿八百石賜券誥是冬

奉命巡陝西明年往湖廣改調西安武昌護衛正統
初命總禁軍公歷仕四十年小心敬畏受知列聖金
帛甲冑器皿諸物恒有賜賚而能約以自處人以是
多之辛酉夏以疾告命太醫院給醫藥疾亟自序遺
際息榮愧無以報遺訓子孫永世無忘八月庚午卒
壽七十三計聞上嗟悼輟視朝一日遣禮部尚書胡
公諭祭于其第勅有司給齋糧麻布治棺塋塋追封
新建侯謚榮僖配趙氏封夫人相成厥家族里稱賢
子男七長英次源先卒次海次賢次良次女二長
適府軍前衛百戶范達次在室孫男十二曰竒曰信

曰佐曰倫曰儼曰儉曰儔曰三孫女三皆在室曾孫
二曰政曰卒之年月日莖懷柔縣鄉原英奉中書舍
人張弘所述行狀請墓銘銘曰維公展也多才詡歷
事四朝勲日著厚祿榮封甲眷顧貂蟬光接夔龍武
鉞昔駿奔義旗舉風虎雲龍千載遇玄冥河北廣漠
戎瞻望白旄殲醜虜歸侍東朝司禁旅有備其休約
以處全而歸之有道裕爵謚褒嘉駢錫與子孫振振
厥緒懷柔之原良膺膺千百億年安以固

會寧伯李公神道碑

丘濬

西夏李氏出自元魏唐李拓跋思恭以平黃巢功賜
姓李氏世長西土歷宋元至今以武功顯者代不乏
人其居西寧者曰尚哥元初王府官子孫傳襲至管
吉祿為司馬司馬生南哥為西寧州同知國初內附
授西寧衛管軍所鎮撫衛治城池皆所躬置招撫西
番八族有功陞衛鎮撫後累功進指揮僉事夫人王
氏生子二人長即公也公諱英字士傑資稟英特體
貌魁傑雖生武胄而雅好經術未樂初以父老嗣職
歲辛卯文廟親率六師出巡沙漠勦本雅失里於

玄冥河敗阿魯台於廣漠戎公皆與焉還論功陞指
揮同知賞鈔二百錠銀六十兩又明年八月老的沙
據沙金地亂涼州永昌 詔公截捕公率偏師至擺
通與賊遇力戰敗之獲人口駝馬牛羊十四萬有奇
上賜手勅曰爾收捕叛賊克效勤勞特陞都指揮食
事乙未 駕復北征公率所部從以捕獲過當賜
勅獎諭仍有銀鈔鍍金銅佛之賜自是扈 駕者再
公夙負才畧有膽氣部下皆西邊精銳士故所當者
無不破敗而所虜獲者比諸將恒多用是為 上所
簡注而賜賚之典獨厚焉凱還陞都指揮同知賜鈔

三萬六千貫絲段三十二表裏銀二錠繡春刀一事
馬一匹羊三十羖洪熙改元安定曲先莽處強寇害
使臣掠賜物邊境騷動 詔公率番漢兵勦之副將
以下咸聽節制公即分據要害設伏出奇直擣其巢
穴虜安定王生擒男女千餘人駝馬十有三萬邊境
悉平捷至 賜勅褒嘉有曰朕嗣位之初方任將帥
以靖邊境使皆如爾盡心何寇不滅何功不成雖古
良將又何以過也遣禮部主事楊鏞齎勅往勞之就
以得所駝馬給賞士卒仍趣入 覲冬十月公 陞
見超陞右軍都督府左都督宣德二年西番即兒加

族擾邊公奉命勦平之朝廷最其前後功進勲
推誠宣力武臣階特進榮祿大夫柱國封會寧伯食
祿一千一百石錫誥券俾子孫世襲賜第一區田百
頃追贈曾祖父某祖父吉祿父南哥皆會寧伯曾祖
妣吳祖妣某妣王皆夫人明年制諭克總兵官偕
陽武侯修築宣府懷來沿邊城堡六年事竣還時親
屬有爭職者毆傷人詞逮公目坐免英廟登極念
公舊勲賜冠帶支祿米如故方將進用不幸以七年
十月二十六日終于正寢歸葬西寧享年六十配朵
氏先公卒贈會寧伯夫人次劉氏夏氏以子貴封太

夫人子男一曰杲夏所出也今署左軍都督府都督
僉事女二長朵出適恭順侯吳瑾次劉出適某衛指
揮吉祥孫男六人曰某曰瑜曰瑚曰珊曰瑾曰某夏
氏故神武右衛千戶某之姪有懿德年若干歸公若
干年公棄世時杲年甫十二家道益落太夫人惡笄
疏服常如初喪時無毫髮驕奢態所以教訓其子冀
其成之以圖回先世之基業者無所不用其心憂幽
艱險蓋備嘗之矣杲用能服其教誨克有成之以復
其先人之勲業者太夫人之功也不幸以成化年日
疾卒于家享年六十有四杲時掌右軍都督府事得

請扶夫人柩西歸祔公墓于西寧之祖塋念惟墓道
之碑未立以予忝有一日之雅特以見屬若公者豈
非一代雄傑之士乎遭際盛時屢建武功受知列聖
以有爵土致仁廟有古名將不過之褒亦可謂奇
特不群者矣家道不幸中微又得賢內助以佑稟厥
子允厥宗以復其公侯之始是皆可尚也已銘曰

關西出將從古則然厥氣勁強質厚以堅烈烈會
寧挺生其間為國虎臣雄視河源當文皇世有
事于邊公於是時操戈以先掃穴犁庭蕩滌腥膻
大功告成帝心注焉歷仁暨宣屢著奇勳

綸音褒嘉謂古將及爵土是封誥券是錫威聲振
揚恩典洋溢中焉一毒咎匪已出養高卧恬居然
自適山川歛靈壽止六十歸葬于西孰不洒泣名
聞當世功紀太常公雖云逝有所不亡有崇斯岡
厥土燥剛有閔斯丘伉麗並藏史臣刻銘播美揚
芳百世之下耿耿有光

定西侯贈汪國公謚武勇蔣公神道碑 錢溥
蔣周公之胤以國氏漢末有諱子文者淮南人仕為
秣陵尉遂盜至鍾山下而亡大著靈異隆于祀典子
孫散處于淮代有聞人而公其裔也然未有如公之
顯者公諱貴字大富揚之江都人父從龍當元之季
以義勇附太祖起淮甸洪武十一年隸燕山中護衛
侍親王之國即太宗也公生有大志恒念父功屈人
下甫官即代役三十一年舉義克雄縣攻大寧戰鄭
村塢取廣昌蔚州白溝河戰勝圍濟南回取滄州戰
夾河蕞城克西水寨敗敵將平安軍于肥河戰靈壁

收泗州遂渡江入京師功成論次自十夫長升至昌
國衛指揮同知後征交趾四征沙漠敗阿魯台于九
龍口洪熙元年復至大松嶺擒殺賊衆升都指揮僉
事調掌彭城衛事宣德二年四川松潘夷叛以公充
右叅將率軍捕之首募鄉道從東路險絕處攀緣而
進賊驚曰兵從天上來邪一日戰數十合以全勝聞
賜勅有奪橋斬關如古良將之譽明年升都指揮同
知鎮守密雲諸關番夷復叛仍充叅將討之尋陞左
軍都督僉事充副總兵公謂夷性變詐非長驅撲滅
患未可弭乃大闔士連破黑虎等四十餘寨斬首千

五百級生擒稱是投崖箐死者無筭夷遂寧謐賜勅
獎諭陞都督同知充總兵官佩平蠻將軍印鎮守其
地凡事有利害悉奏罷行之就威州千戶所建州治
興儒學使知所教列屯而耕易水桐以後遠近堡壘
相望使知所守廩庾以足人心大安正統改元召還
陞右都督時西戎偽王阿台等寇甘涼邊將屢失利
命公佩平虜將軍印率京營五千騎征勦凡陝西及
甘肅涼州等處官軍悉聽節制兵至鎮番出魚兒海
子哨還時虜酋把秃孛羅率衆犯莊浪公命將禦之
生縛孛羅等百人又謀報阿台也伏河西遂躡踪倍

道至亂山奮勇衝人且追且殺至石城泉斬首二百
餘盡獲其馬駝衣械虜有逃奴來言阿台府在公議
即往副將李安沮之公拔劍厲聲曰汝任邊寄肉食
且數年坐視其縱橫不制尚掉三寸舌以撓我師敢
復諫者死乃策馬前驅見賊遂整陣而前生擒男婦
數十人送營謀復知其不遠令軍士疾走至兀魯猝
見虜牧馬逐約衝馬羣以鞭擊箭橐聲驚之馬盡佚
虜既失馬皆輓弓步戰不決即令衆躍馬揮刀齊入
以旗牌手督之遂大捷內擒一胡譯審自石城泉敗
衄止餘八百精勇者公得其情乃分為犄角勢列五

百騎為左右翼縱百騎登高峻疑之既遇賊夾擊戰
逾九十里阿台亦窘死西土遂寧捷聞遣中官齎綵
段白金宴勞封奉天翊衛推誠宣力武臣特進榮祿
大夫柱國定西伯食祿千二百石給世襲誥券追封
其曾祖三公祖八公父從龍皆定西伯曾祖妣楊祖
妣杜妣程皆伯夫人晉鎮甘涼四年召還以雲南麓
川宣慰思任茲屢寇邊六年命公充總兵官佩平蠻
將軍印賜蟒袍銀盔甲以行公與總督兵部尚書王
驥至雲南衆謂瘴發不宜進公謂尚書曰賊毒吾民
其可坐視邪遂遣兵勦之賊勢稍却師集金齒分三

路進而公與尚書從中路令上江兵夾攻會南風大作縱火四炭矢石俱下如雨公乃擐甲鼓勇而前賊大潰斬首十萬餘級江流盡赤移屯騰衝賊據水籠山為連環七寨又驅象為陣合數十萬人于馬鞍山公悉破之勢如拉朽直搗巢穴蕩無遺氛賊父子僅以身遁凱還詔戶部侍郎王質持羊酒迎犒臨清至則上親慰勞遣中官賜金幣羊酒于家擇日御奉天門設教坊樂部勞平夷功陞定西侯三代考妣復封如其爵賊父子既遁聞被擊于緬甸八年命公與尚書下緬取賊仍寵賜以行時緬人數報送至而潛以

金樓船載賊離五十里而不至尚書謂公曰此給我也過江則絕我歸路且瘡瘍將發不乘此而剪之可乎於是誘緬人聽賞公則往焚其舟大戰一晝夜其賊首已先去賊子思機發之在孟牙者亦遁去盡俘其妻孥象馬以還破其賊寨二百餘處燹夷遂平九年還上復親宴勞加祿二百石賜白金百兩綵段十表裏楮幣一萬貫金酒器一副鞍馬一疋以寵異之公之子雄見賊去亟率漢達官軍三十人追殺不及而賊已阨其後衆寡不日刎沉于江時年二十四其十八亦從之死上嘉其忠勇贈懷遠將軍彭城衛指揮

揮使十二年尾刺遣使來朝諜者知脫脫不花及也
先侯使回即分兵入寇上命公總兵禦之公至境嚴
耀威武賊引去召還嘉勞甚至十四年正月二十一
日忽感風疾薨于家距其生洪武庚申十一月二十
九日享年七十計聞上震悼罷朝遣禮部尚書胡濙
等諭祭前後十四壇及賜齋糧孝布明器等物進封
汪國公謚武勇命工部營兆域于榆河鄉泥井里先
塋之次而以其年七月六日葬焉既葬越月而尾刺
復寇遂有土木之變使公在豈遽至是哉其冬以公
之孫琬襲爵掌左軍都督府事成化初佩平寇將軍

印充總兵官節制甘涼諸軍既而守備南京管中軍
都督府事忠毅簡亮克繩祖武而雅好文學達古今
事變為時所倚重公薨後二十五年而隧道之碑未
立琬狀公勲績來請予雖不獲接公然慕公威望久
矣而與嗣侯文且久聞公性淳厚體貌豐偉平居謙
退如不能臨陣前奮勇敢前以一當百故起自徒步
走立殊勲追封三代列爵五等與國咸休也可不載
諸聲詩勒諸金石而使之顯示永久哉公初娶李繼
李皆贈封侯夫人子男五長義患足疾以琬封定西
侯後公七年卒次即雄次謙次讓次諫女五長適杭

州前衛指揮使李剛次適密雲衛指揮使劉容次適
後府左都督長子馮泰次適羽林前衛指揮使李秀
次適富峪衛指揮使張勇孫男五長璟早卒次琬曰
琰曰瑾曰瑜女五武強伯楊能會昌侯長子孫璉永
康侯長子徐昌遵化衛指揮使張璵其壻也銘曰皇
明開天六合重輝繫維蔣公世際龍飛起自淮甸繼
奮燕山義旗所指克濟于艱天位既正屢進其職從
定交南復征迤北蠢彼元孽擾我邦垆徃禦之西涼
以寧叢爾麓邦有固連蒙公復勦焉南荒以順爰自
左樞超登五爵貂蟬戔戔為時李郭龍章鳳誥三代
同封鐵券金書世永彌崇公之忠勇所向無敵三邊
之靖式詔帝極茂績方殷公忽長逝天子興嗟有贈
有謚有祭有莖有爵有嗣詒孫有謀以燕翼子生榮
死哀時孰儂焉公雖云歿遺風凜然榆河之鄉泥井
之里琢石刻詞以彰未竟裔

鎮朔將軍永寧伯譚公行狀

王偉

公諱廣字仲宏姓譚氏丹徒河門人也父諱添四當
太祖高皇帝起義濠梁居戎籍從大夫湯克金壇常
州攻取江陰又克蘇明等州遂晉禦明州收捕蘭秀
山以終時公年十四補父籍繼被選入補驍騎衛後
調府君軍為伍長帶刀宿衛誥授昭信校尉燕山中
衛百戶從征乃兒不花轉燕山左護衛又征驢駒河
黑松林朶燕山等處已而從太宗文皇帝奉天征討
上知公驍勇有謀命率百騎候東安涿州公生捕得
巡卒輒械以聞上益親信遂從攻真定取水平下大

寧還戰鄆村埧以功陞千戶又取廣昌克蔚州圍大
同戰白溝河攻濟南陞正千戶及破滄州戰東昌府
定州夾河轉進攻順德皆奇功因留守保定陞指揮
同知尋陞指揮使會都督韓觀率兵十二萬來攻公
以孤軍相四十餘日相且盡公嚙指裂背左區
右畫竟以飛礮擊走其衆陞大同都指揮僉事永樂
改元營建督殿才紫荆關七年入見留北京領神機
營從上征迤北封神機驍騎將軍由玄冥河追趕本
雅失里至靜虜鎮殺敗阿魯台復征擒胡山還守大
同十二年復從征九龍口胡騎數萬憑崖而陣勢張

甚公為前鋒以神箭手萬人射傷其衆賊驚潰顏坑
骨木死者殆萬計公乘勝揮兩翼以進夾擊之繼以
步刀斫其馬足賊大敗去比還上指謂廷臣曰廣之
勇智雲長敬德不足多也陞中軍都督僉事有白金
綵段駕馬襲衣之賜且俾中書護至其門仁宗嗣位
陞左都督制克總兵官出鎮宣府時冬寒上念公備
禦於外遣賜楮幣綵段即掛鎮朔將軍印暨于宣宗
尤加褒異勅曰念卿總戎據忠効謀躬勤夙夜有白
金綵段之賜逮今上皇帝既御大寶勅曰卿祗事祖
宗多歷年所出鎮邊疆厥績茂著特遣人諭意復賜

白金綵段正統六年以殺勦胡寇功詔封永寧伯七年給誥券意若曰爾中軍都督府左都督譚廣忠實能動材智有為事朕皇曾祖於藩邸翊靖內難後征北虜克振武威暨事皇祖皇考至于今日鎮守邊方幾二十載屹然長城之固疆宇晏然念勞動之既久宜息數之渙頒今特授爾奉天翊宣力武臣特進榮祿大夫柱國永寧伯食祿一千二百石仍與爾誓除謀逆不宥外其餘雜犯死罪免爾一死爾惟欽哉正統九年上聞公年老不可重勞以事命武定侯郭公徃代其任驛召公還未幾而告薨上哀悼為輟朝一日遣官祭弔申勅有司治塋喪事王公大臣咸有祭

公為人長身玉立膂力絕人忠義之氣大百餘戰必勝然未嘗妄殺愛人下士恒恐不及士卒勤勩不啻在已寒為之衣飢為之食故公之去也人慕之其薨也人哭之咸盡哀公初所統神機兵鮮明晃耀進止有度望見皆曰此譚家馬也上有所指揮亦曰譚家馬至胡虜相戒亦曰慎毋犯譚家馬迨今猶以為號所得祿賜一不以私贏均為學舍浮屠老子之營之用嗚呼若公者雖古之名將何以加茲公生于元至元年月日薨于正統九年月日曾祖諱祖諱考諱

添四皆贈榮祿大夫柱國永寧伯曾祖妣氏祖妣氏
妣氏皆贈太夫人配王氏封夫人子男三人長亨襲
永清衛指揮使次商次高孫男若干亨將以九年十
月日奉公之柩歸塋保定鄉之原泣請予狀公行實
用乞銘于太史氏某為公之門下士知公頗悉故不
辭而述其槩若此云

奉天胡衛推誠宣力守正文臣特進光祿大夫
柱國靖遠伯追封靖遠侯謚忠毅王公墓誌銘

彭時

公諱驥字尚德姓王氏其先本太原人自秦漢以來
為將相者踵接蟬聯族遠而分世次莫可考後有宦
游雲中者因家宣寧即公所自出也曾祖守道克世
儒業祖思宗仕元保定高陽尹父成以宦家子留居
于東鹿呂村里入國朝遂占籍焉成以讀書力農
為務里鉅族程子晉見而賢之妻以愛女是為公之
母夫人也公生而岐嶷警敏年十三游邑庠刻志問

學日記數千言識者咸以遠大期之永樂丙戌登進士第拜兵科給事中剛正敢言嘗奉命出鎮山西奏蠲徐溝鹽池虧課二十餘萬民困以蘇尋陞山西按察副使理冤獄戢姦盜風紀振肅入為順天府尹弛張得宜畿內稱治宣德丁未陞行在兵部右侍郎越九載遷尚書練達兵政得大臣體正統丁巳虜酋阿台朶兒只伯數寇邊甘涼數州驚擾尤甚朝廷患之命公西巡許以便宜行事公至稽閱邊備知守將法弛而令不嚴歎曰如此而欲虜無侵凌難矣翊日集衆轅門詢平日畏敵而不畏將者得都指揮安

敬即斬以徇曰自今畏縮者視此一軍震慄失色因簡閱戍兵以甘州戍兵冗濫乃定為去留使相更代於是兵得休息民減轉輸之勞虜嘗入莊浪公遣兵授以方畧使擊敗之虜乃引去及公還虜復窺邊公馳赴甘肅遣副將蔣貴率精騎出擊戒曰勉之去而不能成功無相見也貴感奮追敗虜衆於石城兒泉公計虜勢猖獗不一大搦刈無以示威既謀知虜巢穴所在復以貴為先鋒擣之自率驍騎與都督任禮等分道而出刻期夾攻轉戰二千餘里俘男女二千餘口虜酋走死西陲以寧捷聞上遣中貴勞以金

幣命兼大理寺卿支二俸明年還京辛酉雲南麓川
宣慰思任發叛亂擾邊 命公總督諸軍征之 陛
辭賜金兪鍤細鎧弓矢蟒龍緋袍以寵其行公至雲
南方盛暑衆謂進兵非宜公曰賊毒吾民行可緩乎
敢言不進者斬遂部分諸軍以進至金齒分為二道
徑抵上江上江者賊砦所在也夾攻三日不下會天
大風公命縱火焚柵因督衆乘勢力戰斬首五萬餘
級賊敗走保險為拒公益麾兵深入破連環七砦于
沙木籠山又破象陣于馬鞍山之陰死者十萬餘賊
首潛遁乃振旅而還先是維摩州賊常即羅僭稱廣
新王命公還師勦之至是公還雲南計曰此不足血
吾刃當以謀破之乃遣偏師抵其境聲言王尚書大
軍至矣賊黨聞而潰常賊計窮遁安南傳檄追之安
南懼斬其首并妻子來獻廣南與富州接境二土官
交惡十餘年公諭以禍福兩讎乃釋凱還 上遣官
迎勞數百里外 廷見宴賜甚厚特封靖遠伯食祿
一千二百石號推誠宣力武臣階特進榮祿大夫勲
柱國 賜誥券追封三代如其爵未幾聞麓賊思任
發羈于緬甸復以督軍往取之既至緬人懷詐黨惡
而不遣公縱兵攻緬緬破而麓賊遁去俘其妻子象

馬而還加祿三百石是年秋西巡寧夏甘涼申飭邊
備訓練士卒其於守戰攻擊俱有方法虜聞風畏避
不敢近塞戊辰春賊孽思機發復據孟養跳梁公復
督兵往征兵抵金沙江賊柵西岸以拒公作浮梁渡
兵一鼓破之賊退立三柵自保公督戰益急不日而
三柵拔賊孽殲焉西南自是悉平有苗虫富者偽稱
剗平王別將屢征失利命公掛平蠻將軍印總兵致
討卒檻送虫富京師餘黨悉降公還 詔增祿百石
令世其爵景泰初以南京根本重地委公守備公嚴
立禁宿弊一清不便者撼以流言乃解機務就閑天

順元年春 上復臨朝召公便殿慰諭以勲舊命兼
兵部尚書不數月軍政脩明 賜金織蟒龍衣二襲
尋以年邁請解部事從之特免常朝 賜誥加奉天
翊衛推誠宣力守正文臣特進光祿大夫勲爵世襲
如舊而 寵遇益加隆焉天順四年五月十一日終
于正寢享年八十有三訃聞 上嗟悼輟視朝一日
追封靖遠侯謚忠毅公初娶張氏子二人曰玉曰瑤
俱早卒繼娶劉氏子二人長曰瑞應襲次日珩勲衛
義子曰祥以征南功授錦衣衛指揮僉事孫男三人
女四人諸子扶匱歸東鹿以是年八月初八日葬于

邑之平原祖塋禮也公天資沉毅識量宏偉有文武
長才遇事剛果剴繁治劇不以為難行師征討用法
嚴明而料敵制勝雖老於軍旅者有不及故所至輒
能成功及其晚節保身全名守以謙虛而忠愛之心
始終如一誠一代之偉人也然所稟尤異年雖高邁
精力踰於少壯疾且亟神尤不亂遺言托冢宰王公
狀行而以墓銘屬時時謏材穉筆曷足以公不朽公
既有命庸可固辭銘曰

天佑皇明輔以忠良脩文立武咸展厥長於惟
王公挺生冀土河嶽孕靈才兼文武早游藝苑被

服書詩乃登黃甲給事瑣闥流譽蜚英踐敷中外
爰陟司馬式儀有位雍容殿陛正笏垂紳手提
樞軸潛斡化鈞視師三邊程勇戒怯兵將力齊虜
聞震疊其有狼噬輒彌以兵馘強俘弱西北用寧
蠢爾遠夷敢為民毒帝命師征惟公總督建牙
秉鉞令一而嚴兵威遠震如火斯炎挫銳摧堅勢
同拉朽止弗窮追懷以仁厚彼昏不知伺間竊發
公而再往根株悉拔和風甘雨妖疇清西南萬
里同我太平惟帝念功官賞是懋列爵䟽封寵
延先後人文出武邈乎無倫名昭宇宙允為元臣

天不怒遺而遽不起山頽梁傾朝野哀止爰稽
德烈著于幽堂於千百世赫其有光

奉天翊衛推誠守正文臣特進光祿大夫柱國
兵部尚書靖遠伯追封靖遠侯謚忠毅王公神
道碑銘

李賢

本朝之制文臣不許封爵邑惟有武功者不在令自
洪武以來蓋百年于茲矣文臣有武功而封爵邑者
始一人焉靖遠伯王公是已嗚呼休哉公諱驥字尚
德系出太原先世有宦遊雲中者因家宣寧高祖而
上多顯仕曾祖守道祖思宗仕元為高陽令有惠政
父成適元季兵亂因徙家東廡娶程氏生公公自幼
警敏年十三入邑庠為諸生即有遠大志未幾父母

相繼以歿公哀毀盡禮能自树立遂領鄉薦登永樂
丙戌進士第授兵科給事中尋出使山西見徐溝民
困奏免鹽池虧課二十餘萬時應天府缺丞務急且
冗委公署之立辦復署行在都察院事持正不撓陞
山西按察司副使洪熙改元 仁廟素知公才 召
為順天府尹畿甸大治特 賜誥以褒之 宣廟即
位之明年陞行在兵部右侍郎時慮南京根本重地
真定定州畿內要衝 秦蜀二王府護衛兵多兩遣
公分調屯駐公皆處之得宜宣德乙卯進兵部尚書
先是虜酋阿台朶兒只伯之軍猖獗塞下令 皇上
即位之明年特遣公往視師許以便宜行事公至見
沿邊城堡不堅將無紀律嘆曰邊防如此宜乎寇至
翊日大集官兵問曰往年出兵遇虜於魚兒海首先
退縮者為誰咸曰都指揮安敬即命左右引出斬之
一軍為之股慄又誓於眾曰自今遇敵有不前者罪
亦如之號令一新兵威大振既而虜酋把禿孛羅入
寇在浪公即遣都指揮魏榮授以方畧率兵勦之遂
擒其部落以還虜始知懼遁走公閱甘涼軍冗曰兵
貴精強乃退其三之一八月還京 上慰勞者久之
虜聞公還復入寇 上復勅公往公至遣大將蔣貴

率精騎數千出境且戒曰遇敵不捷無復相見也再遣偏將趙安率兵繼之公與太監魯安都督任禮分兵為殿遂擒阿台俘殺醜類幾盡邊境底寧捷聞上遣人賚金幣勞公加兼大理寺卿明年還京先是雲南麓川宣慰使思任發叛累征不利辛酉春復以蔣貴率諸道兵往討之仍命公總督軍務賜以明鎧雕弓蟒龍緋袍以壯其行公至聞賊在大候州即遣都指揮馬讓授成筭以往斬首數百級餘賊遁去是歲冬分道並進會于上江以夾攻之因風縱火斬獲無筭賊首父子僅以身免遂盪平其巢寨捷聞降

勅獎勞召公北還時蠻賊常即羅造釁於維摩州公遣指揮萬誠先聲率土兵討之賊潰散即羅逃之安南復傳檄諭之邊人遂斬其首來獻廣南富州土官儂即舉沈政讎殺十餘年公宣諭朝廷恩威兩讎頓釋至京上親宴于奉天門文武官僚以次陪宴士林榮之論功封公推誠宣力武臣特進榮祿大夫柱國靖遠伯食祿一千二百石特賜誥券追封三代曾祖考皆如其爵妣皆伯夫人未幾思任發竄入緬甸謀復叛上召公曰勞卿再一行耳公復總諸軍至金齒遣人促緬甸送思任發至軍前緬人佯

諾不遣公曰緬人黨賊不可不加兵乃至騰衝分為
五營公與蔣貴及都督沐昂分督以進木邦宣慰使
統兵萬餘駐於蠻江許觀我軍容公責以忠義賞以
牛酒遂感悅而退緬人擁衆大至公密令貴率兵匝
江而下焚其舟數百艘大戰一晝夜賊潰遁去捷聞
上召公班師慰勞益厚加祿三百石壬戌秋北虜
近邊上復命公出巡仍許便宜行事乃自寧夏抵
甘肅凡寨堡烽堠悉增修之仍授邊將以破賊及練
士方畧事竣還京麓川遺孽思機發思卜發復據孟
養以叛戊辰春上復命公總諸軍率兵往討之至

金沙江賊於西岸立柵以拒公伐竹為梁麾兵悉渡
一鼓破之賊又於鬼哭山顛立柵公與偏將親冒矢
石往拔之二孽死於亂兵南服遂寧景泰初都督宮
聚征湖貴苗賊失利乃以公佩平蠻將軍印代總其兵
遂大破苗賊獲其酋偽稱剗平王苗酋富檻送京師
餘寨悉平振旅而還復增祿一百石子孫世襲尋委
公總督守備南京壬申秋以衰老乞閑還京天順改
元皇上復位思用舊人召公慰諭良久賚以白金
文綺顧公精力尚健復拜兵部尚書再閱月兵政漸
有次第而公固辭不可強矣上亦念公重違其請

令朝朔望復賜誥加弭奉天翊衛推誠守正文臣
特進光祿大夫禮遇甚厚天順四年五月十一日以
疾薨于正寢公天資通敏遇事敢為正色立朝欲以
身徇天下每陳國家利害生民休戚辭氣懇切孜孜
不已襟懷開爽好賢樂善人有寸美必極口稱道見
人材沉滯必拔起任用始終成就之未嘗有德色與
人交不立崖岸循循和易雖位兼將相望重累朝曾
無一毫驕矜之意見於顏面體貌清臞風儀俊整尤
善談論見者為之懍然當大事屹若砥柱之在中流
功名事業視前古為無愧矣疾亟家人皆惶懼公曰
古人以死為歸何至是邪且對故人大理卿龔永吉
叙間濶神思如常客甫出門公就席而逝享年八十
有三上計聞哀悼輟視朝一日祭葬賻儀悉從典
禮追封靖遠侯謚忠毅士大夫莫不茹泣相弔公娶
張氏累封伯夫人生子二曰玉瑛俱早卒側室劉氏
生子二曰瑋嗣公爵曰珩為勳衛孫男二女二卜以
是年七月吉日歸葬于東廡祖塋之右銘曰
天生豪傑祚我邦家大其抱負弘彼聲華乃若
斯人世豈多有乃鳳乃麟出也非偶惟忠毅公間
氣所鍾紛紛茅蕞挺見孤松早奮于庠入奉廷對

羽儀公朝展也無愧歷試繁劇如劔斷犀佐持憲
節名震山西召尹京畿畿內安堵貳我夏官折衝
尊俎進大司馬出巡邊陲斬其怯將大振兵威于
甘于涼于彼沙漠矯矯強胡罔不就縛麓寇弗靖
以跳以梁公來督戰如鷹之揚殲厥渠魁盪其巢
穴滇南之境遺患斯絕報功有典迥出群沅河山
帶礪與國同休將相之才一代之望壽考哀榮孰
與公抗東廡之原卜此牛眠豐碑有銘百世之傳

柱國掌中軍都督府事定襄伯贈定襄侯謚忠
武郭公傳

表襄

郭登字元登直隸臨淮人營國威襄公英之孫也正
統七年征麓川靖遠王伯驥薦登為副分兵鎮臨安
檄召諸夷長宣布朝廷威德諸夷長帖服爭獻珍具
不受十四年七月也先入寇天子親征至萬全西寧
侯宋英武進伯朱冕相繼覆沒乃拜登都督僉事副
廣寧伯劉安鎮大同尋詔班師登語學士曹鼐張益
曰駕還宜從紫荆關鼐等入奏已得請從紫荆矣俄
折而東竟從居庸未入而天子蒙塵大同城門盡閉

軍士多戰死所存皆創殘登涕泣拊循之弔死問傷親為裹瘡傅以藥或謂登曰事已至此城旦夕且破何空自苦事登曰吾誓與此城存亡當不使諸君獨死也八月也先奉上皇至城下索金幣萬計約賂至即歸駕登閉門不納上皇傳旨曰朕與登有姻婭何外朕若此登傳奏曰臣奉命守城不敢擅啟閉竟不出校尉袁彬以頭觸門大呼劉安及給事中孫祥知府霍瑄乃出見納賂而也先實無歸駕意也登曰此給我耳莫若以計伐其謀劫其營奪駕入城此上策也因召壯士與之盟激以忠義曰事成當封侯受上

賞壯士皆踊躍願效死力將遣行或以危言沮之虜遂驚疑擁上皇去登大慟曰駕材果敗吾事時賊勢張甚而劉安借他故還京師獨登守城十月虜寇京師登率所部并糾集忠義從雁門入援先以蠟書馳奏其略曰胡馬長驅三關失險賊番連內地為患非輕臣今悉起官軍民壯入護闕廷京兵擊于內臣兵擊于外使賊有腹背受敵之患首尾不救之虞又曰忠誠切已敢忘報國之心成敗在天不負為臣之節奏至賊已退優詔褒答為登復上疏曰虜人雖回離邊不遠傳報有云黃河已凍且向延綏青草漸生再

侵京闕事雖未信情亦可疑又曰推誠待下不席求
賢擴天理克人欲以成聖學之功親君子遠小人以
收天下之望十二月虜將復犯京師登奏言京軍新
選不可輕戰宜分營犄角以逸待勞以主待客勿求
僥倖務出萬全虜自屢勝以來出入自由不聞有出
一兵拒之者登不勝憤晝夜以忠義激厲其軍定為
賞格期必殺賊謀報東驛賊入境登率兵躡之行七
十里至水頭日暮休兵夜二鼓謀報二十里外沙窩
有賊營十二登召將士問計皆曰賊衆我寡莫若全
軍而還登曰我軍已去城百里且疲困一退被賊以

鐵騎未追雖欲自全得乎即按劍起曰敢言退者斬
進薄賊營昧旦賊以數百騎迎戰登奮勇先登諸軍
繼進呼聲振山谷登射殺二人手刃一人賊大敗追
奔四十餘里至拷栲山共斬首捕虜二百餘騎奪回
人口牛馬弓械以萬計捷聞封定襄伯是役也以八
百騎破虜數千初至大同戰士僅數百馬百餘疋不
數年馬至萬五十疋精兵數萬人常恨馬少步卒追
賊不及乃以巴意設攪地龍飛天網等法鑿為深塹
覆以土木人馬通行如履實地賊入圍中令人發其
機自相擊撞頃刻十餘里皆陷又用砲石擊賊一發

五百餘步人馬死者數十畝大興屯田而苦乏牛種
乃上疏乞官為措置嘗憤賊吏病民疏論之其略曰
承平久日人心驕逸在官者既無廉耻之心蒞政者
惟肆貪婪之志釀成污濁之風致有夷狄之禍登廉
潔尚謀與賊大小數十戰未嘗挫衄善撫士卒有古
良將風吳廟復辟命掌南京中軍都督府事尋謫戍
甘肅憲廟嗣統復爵鎮守甘肅以薦召還總神機營
掌中府事尋命提督十二團營多所建明登工詩所
著有聯珠集謫甘州時有詩送岳正曰青海四年羈
旅客白頭雙淚倚門親莫道得歸心便了天涯多少
未歸人又曰甘州城南河水流甘州城北胡雲愁玉
關人老貂裘敝苦憶平生馬少游大學士李東陽評
其詩為國朝武臣之冠卒贈定襄侯表表曰郭定襄
以敗卒守孤城氣吞強虜竟立封侯之業觀其閉門
不出與城存亡募兵入援敵王所愾有國士之風矣
其所論建雖文士不如也豈獨武臣哉

奉天翊衛推誠宣力武臣特進榮祿大夫柱國

南和侯謚忠襄方公神道碑銘 李賢

公諱瑛字某姓方氏世居滁之全樹曾祖銘洪武中
驍將也官至留守衛太平門百戶祖信繼以戰功陞
濟陽衛千戶父政永樂中從文皇帝靖難累功陞
左軍都督府都督同知洪熙宣德間屢佩將軍印總
兵鎮守交趾開平大同正統初進右都督征麓川領
兵深入援絕而死追封威遠伯謚忠毅母陳氏繼萬
氏俱封夫人公以廕授金吾右衛指揮使論父死事
功陞都指揮同知麓川賊首思任發自忠毅沒後益

肆猖獗辛酉春上命定西伯蔣貴率師討之以公
故將子嘗從其父領支兵殺賊有膽氣且熟其鄉道
俾與貴同事公以此賊實所不共戴天者自誓必勦
滅以復父仇師環其境提兵先登一鼓而破之遂平
其地還進都指揮使人皆嘆羨以為方氏有子矣壬
戌秋復從靖遠伯王驥征貢章沙埧阿嶺諸蠻克之
進後軍都督府都督僉事丁卯春朝廷以公勇畧
無人命克叅將將兵鎮守雲南時賊子思機發復據
孟養以叛公自將精兵擊走之獲其妻子象馬而還
己巳夏師宗州羅羅賊首黑救番來等為逆公悉捕
擒之還京進都督同知賞賚有加景泰初貴州東苗
作亂圖平越興隆諸衛復命公將兵與兵部侍郎
侯璉往解之遂生繫渠魁斬首無算進充右副總兵
廷議以苗賊叛服不常必得名將以鎮之遂進公右
都督總兵鎮守貴州明年征香爐山諸寨悉平之復
進左都督癸酉冬合四川兵勦滅草塘叛寇斬首七
千級餘甲戌春大臣有言公之將畧堪掌禁兵者乃
召公還俾分總五軍營且論其前後平賊之功進
封奉天翊衛宣力武臣特進榮祿大夫柱國南和伯
食祿一千石子孫世襲給賜誥券追封曾祖銘祖

信皆為伯爵曾祖妣某氏祖妣湯氏生母黎氏皆為
伯夫人明年專總神機營未幾銅鼓五開諸苗復叛
僉謂非公不能靖乃命公佩平蠻將軍印總兵討
之公至賊境獎勵諸軍指授方略克平四百餘寨誅
擒八千餘衆餘賊屏迹遂留鎮湖廣貴州威德並行
苗蠻聞風納款者甚衆天順改元進封南和侯明
年東苗酋長干把猪僭稱偽號據險為患公分兵進
勦直搗其巢穴破六百餘寨斬首一萬餘級俘獲八
千餘人械送干把猪至京斬之又明年出勦都勻等
處克平二百餘寨擒斬三千餘人惡黨殆盡餘皆竄
伏內地悉平議者謂自前平苗之功未有盛於公者
朝廷方將論功行賞而公一疾逝矣訃聞上深
哀悼輟視朝一日謚曰忠襄祭禮賻儀悉從厚典復
命有司為營塚壙公生於永樂丙申某月某日卒於
天順庚辰十月二十八日享年四十有五配劉氏封
伯夫人子男二長曰毅次曰某寔公於都城西山之
陽從吉地也公天資英邁才識通敏凡古兵法雖皆
精曉而行師制敵不祖故常運用之妙恒出人意是
以所向克捷嘗䟽練兵法及圖諸陣勢以獻上深
嘉賞之其待裨將以誠撫士卒以恩接士大夫謙恭

而有禮是以上下無不得其懽心者回視古之良將豈多讓哉銘曰

赳赳方公出自將門鍾氣之秀迥然不群帥其父兵庸以自効究厥所存惟忠惟孝既平南徼復珍東苗威震殊方受帝之褒帝曰虎臣孰敢予侮南顧無憂功邁爾祖左右股肱是托是膺委之重鎮光此中興玉帶貂蟬金書鐵券報公之勛惟帝之眷公本武臣有禮有仁遇彼章縫益然生春在古或難于今乃見天不慙遺匪常斯變西山之麓有石戔戔有銘在刻千載不磨

奉天翊衛宣力武臣持進榮祿大夫柱國南寧

伯追封南寧侯謚莊毅毛公神道碑銘

李賢

將臣子孫能繼前人之烈而益振之以大其功至於都顯爵受重寄者必其才畧之過人乃克能之若南寧伯毛公其一焉公諱勝字用欽其先幽薊人曾祖教化在元有功封畿寧王伯父蠻子官至太尉祖父伯卜花中書右丞相父安泰國朝授昭勇將軍指揮使皆用貴追封南寧伯妣皆伯夫人公天資剛毅風神俊偉有膽氣善騎射於凡兵書悉通大義宣德辛亥以父廕陞都指揮使正統辛酉從征麓川入其

境賊首力招漢伏兵于路公將遊兵覘之射其象馬
應手而仆遂敗其衆督船濟江直抵其巢穴走其賊
首思任發破寨而還以功陞左軍都督府都督僉事
明年奉勅克右叅將將兵復征麓川公益思自效
勇氣當百平其寨柵而繫其黨與前後無筭還進都
督同知己巳秋大同有警公適以幹當遇寇于道生
致數人以歸尋復委公巡視邊城屢敗其衆朝廷
嘉其功進左都督復往紫荆倒馬諸關追殺虜寇累
有金帛之賚是歲冬奉勅克左副總兵往征湖廣貴
州苗賊凡下百十餘寨賊皆敗散景泰初重安江苗
寇復叛總戎者有難色公慨然當之即日以兵厭其
境既與敵遇公獨發一矢中其酋而斃餘賊驚潰由
是香爐山諸寨苗賊皆望風警服生擒偽王帝同烈
記哥等械送京師斬之西南夷之患遂息壬申夏朝
廷委公鎮守雲南金齒騰衝諸處論功封奉天翊衛
宣力武臣特進榮祿大夫柱國南寧伯食祿一千石
子孫世襲賜以誥券追封三代公在鎮號令雖嚴
而御軍撫夷率以仁恕酋長聞風歸嚮無梗化者明
年春將兵詣金沙江搃賊子思機發送京師又明年
冬餘寇乃放革復叛勢甚猖獗公率精兵突至騰衝

賊不暇為謀遂生繫刀放革餘衆悉竄伏事聞獎
勞有加蓋倚賴方殷而公已遘疾不起矣實天順庚
辰八月十四日也享年五十有八訃聞皇上震悼
輟視朝一日追封南寧侯謚莊毅遣官諭祭復勅工
部為營葬事親王以下皆行祭禮公為人孝友天成
遇士大夫有禮謙恭自卑皆出於誠無一毫虛假處
宗黨之間上下稱道無異辭平生不事華靡早有大
志卒能償之可以謂之將才也已配白氏繼姜氏皆
封伯夫人生男曰榮嗣伯爵曰倫錦衣衛指揮使女
適都指揮僉事沈英其次男三曰俊曰傑曰信女一
俱側室出也孫男二女一榮與諸弟扶襯自金齒至
南京卜葬于靜明山高家庫之原從吉兆也銘曰
嗚呼毛公猗將之雄赳赳之資建此武功官以廕
陞志乃自奮長驅滇南敵無堅陣再征而捷帝
曰汝嘉祿秩屢進賚予頻加惟彼朔方邊塵忽警
公徃巡之虜迹斯屏苗寇有作屬公徂征一矢中
首諸寨悉平遐邇南夷託公徃鎮遠人底寧不煩
血刃繼爾前烈益大其聲生有世澤沒有追榮懿
此將臣世濟其美堅石有銘終古無毀

奉天翊衛推誠宣力武臣特進光祿大夫柱國

文安伯追封文安侯謚忠僖張公墓誌銘

李賢

今世勛臣之盛無如張氏一門蓋永樂初靖難之臣
雖衆而功之著者河間定興兩王也天順初翊戴之
臣雖多而功之著者文安太平兩公也嗚呼張氏父
子兄弟四人咸建非常之功此所以享福祿榮名于
當世與國咸休也與文安之終其子斌前期來請葬
銘按狀公諱軌字文端河南開封祥符人父諱玉贈
奉天翊衛推誠宣力武臣特進光祿大夫右柱國榮國
公追封河間王謚忠武母王氏元判樞密院事執中

之女追封河間王夫人生三子長諱輔奉天靖難推
誠宣力輔理佐運武臣特進光祿大夫左柱國太師
英國公追封定興王謚忠烈仲即公天順初自太子
太保兼中軍都督府右都督進封奉天翊衛推宣力
武臣特進光祿大夫柱國文安伯追封文安侯謚忠
僖季諱軌奉天翊衛推誠宣力武臣特進光祿大夫
柱國太平侯追封禧國公謚勇襄公自幼聰穎動止
不凡六七歲時即能習禮儀讀書史悉通其大義稍
長益力于學不尚純穀之習河間王早已死國公不
及逮事事母夫人尤篤愉色婉容可方古之達者敬
禮其兄若嚴師於弟尤盡友愛之道親賢取友樂善
不倦由是上下皆得其懽心母夫人特鍾愛之永樂
中以勛臣子入見文廟竒之特授金吾前衛指揮
使歷長陵神策兩衛公益淵慎自將大獲時譽正
統初今上念公父兄之功且姻聯戚里進錦衣衛
都指揮僉事日侍經筵十四年以勞勩陞僉後軍
都督府事領禁兵宿衛蓋以公勛戚故託以心膂之
寄也尋加大子太保又進兼中軍都督府右都督公
益益懋小心夙夜在公務竭忠蓋所部將士咸畏愛
公而不敢犯天順改元上復位公首以翊戴之功

封伯食祿一千三百石子孫世襲賜以誥券仍典宿衛兼都督府事三年以老疾乞謝事上念公宿德特許優閑調攝且命醫專視賚予有加時致存問五年冬上思公欲一見特遣中貴人賚寶鏹三千緡及白粳羊酒等物往賜公且道意遂力疾強起入見上甚歡顧問良久命公仍典宿衛寵眷彌隆六年春忽疽發于背自謂不可復起乃上疏言臣本庸謬遭遇聖明安享高爵方圖報稱柰何大數止此惟皇上以宗社生民為念任賢治理用臻康泰臣瞑目於泉下矣他無所請上惻然以手詔諭公曰

覽卿所言忠愛可嘉今卿疾勢雖篤尚加調護以副朕意即日遣中貴人賚白金百兩往賜之命至而公薨矣實二月三十日也距生洪武庚午二月一日壽七十有三訃聞上震悼輟視朝一日追封賜謚及賻儀悉從厚典遣禮官諭祭工部治塋事公之死生可無憾矣公風姿清偉辭氣雍容接人謙恭絕類儒者暇則閉戶觀書為盆池聚石褰植花卉以自適賢士大夫至則倒屣出迎講說道義亶亶忘倦性不嗜酒而待客務盡款洽尤好吟詠於凡古詩無不熟覽亦敬禮方外之士內典丹書悉得其旨祭教子務

循禮法而治家尚儉所居賜第未嘗增新見孤貧者
必傾財以賙之俾得所而後已聞人之善稱道不釋
口有不善則避之以故人人企仰而被其容接者自
以為幸噫勛舊戚里門第之高爵位之隆求其清聲
雅望如公者豈多見哉公配侯氏有淵德累封文安
伯夫人子男四人曰鑑曰瑄早卒曰斌為勛衛即繼
爵者曰昌女三人一適後軍都督郭英一適保定侯
梁珪一適李玉孫男四人曰亨曰洪曰淳曰清斌等
以是歲某月某日奉葬于都城南盧溝橋之西從先
兆也銘曰

勛戚之家有美張氏父子弟昆以續以似惟忠僖
公志行尤敦不矜以驕侃侃王孫左公右侯惟我
同母篤是天倫惟孝惟友荐膺 帝眷時譽孔昭
帥兵宿衛遑恤其勞翊戴之功在公尤偉爵與功
崇介此繁祉公也危懼翼翼小心謝病歛迹深淵
是臨 帝起復公橐鍵甲冑相古先王人惟求舊
忠誠允蹈之死弗渝懿哉行實允宜特書泐泐武
臣公為稱首勒銘堅珉千載不朽

奉天翊衛推誠宣力武臣特進光祿大夫柱國

太平侯追封裕國公謚勇襄張公壙誌

李賢

公諱軌姓張氏河南開封之祥符人父榮國公王是為河間忠武王母王氏河間王夫人長兄太師英國公輔是為定興忠烈王文安伯輓其仲兄也永樂中公以勛戚侍太宗皇帝授錦衣衛指揮僉事洪熙元年仁宗皇帝嗣位恩賚有加特陞指揮同知宣德改元漢庶人作亂宣宗皇帝親率六師討平之公扈從有功賞予甚厚仍給世襲誥命正統甲子今上以北虜未靖命成國公朱勇徃征之

公為前行首敗虜於白城復追至檀帽山虜悉眾來
戰公奮擊之虜驚而潰斬馘甚眾凱還以功陞指揮
使又用薦陞都指揮僉事典禁兵未幾復署僉前軍
都督府事尋即真時麓川賊子思機發復為亂上
命將往討以公副之既至分道並進一鼓就擒師還
至荊州復命公移師貴州以討叛苗會景泰改元遣
使詔還以麓川功陞右都督總京營兵天順元年
上居南宮公奉上聖皇太后勅符與太監曹吉祥
忠國公石亨暨兄輓等協力擁戴迎上復位論功
行賞進封公奉天翊衛推誠宣力武臣特進光祿大

夫柱國太平侯食祿二千石賜以誥券寵賚之厚
莫與為比仍官子瑾為錦衣衛指揮同知是年冬公
上疏曰臣犬馬之年六十有五筋力日衰乞解兵柄
以全晚節上方倚公不允二年春公得疾上即
命御醫往療屢遣中貴人視公賚與頻繁已而疾愈
劇公復力疾上疏曰臣年命垂蹇藥不奏功旦夕待
盡惟聖明為宗社生民計選賢任能以圖至治臣
即瞑目地下矣他一無所請上覽之惻然復命公
勉進藥餌以副眷念命下而公已卒是年三月十六
日也距生洪武癸酉九月二十九日享壽六十有六

訃聞上深哀悼素服罷朝歛日即遣官諭祭喪塋
賻贈之儀悉從優等追封裕國公謚勇襄配劉氏繼
吳氏俱封太平侯夫人生男一瑾即卜塋都城之南
蘆溝橋之西徙先兆也公儀貌雄偉負氣剛直以智
畧雄人視古之名將不多讓也其勛績行實之大者
將刻銘神道而此特列其槩置玄堂云

宣城伯贈宣城侯謚壯勇衛公墓誌銘 李東陽

昔在英宗收攬天下材武之士自公侯伯逮于行
陳兼收博采罔有遺者正統之末遠邇雲集宣城衛
公實自山東勤王茂樹勲績歷事累朝進封伯爵
南北効用以老謝事壽考令終回視曩時諸傑挺然
若後凋之松栢而今亦已矣茲不重可惜哉公諱穎
字源正世為松江華亭人祖諱炳當元季以鄉兵歸
高皇帝從征伐長行隊考諱青代後授薊州衛百戶
從文皇帝靖難累官山東都指揮僉事平妖賊數
百輩上謂其有古名將風英宗即詐進左軍都

督府都督僉事有子十一人公行居次母周夫人獨異公曰是當興吾家公兄頤已嗣為濟南衛指揮使卒無子公竟代之蓋正統戊午也已未上京師太保成國朱公竒其貌選領山東漕兵又改領京營番上兵甲子朱公又試其騎射謀畧薦之朝擢山東都司署都指揮僉事己巳之變應詔之衛尚書于公謙以公名薦實授僉事進都指揮同知武清侯石亨又薦之擢後軍都督府署都督僉事領右哨兵時廷臣有異議者公從守議請募死士調諸藩兵以壯根本是冬虜酋也先入寇公帥兵邀擊于黃花鎮白羊口又分守西直門連戰累日久承勅副石亨總京營諸兵以功實授僉事虜既退進都督同知賜蟒衣玉帶又與都御史俞士悅稽兵籍收散卒遺械景泰壬申帥兵出駐宣府癸酉召還復督諸營兵天順丁丑英宗復辟進左都督掌前軍都督府事兼領禁衛日給酒饌賜寶刀白紵諸物與兵部會閱禁兵冬錄迎鑾功封奉天翊衛宣力武臣特進榮祿大夫柱國宣城伯食祿千一百石賜誥券追封三代戊寅佩平羌將軍印鎮甘肅戊寅抵河西虜大至議者謂不宜輕動公奮曰不奪賊氣城何能守鼓行而前連十二

戰破走之會廷臣議封爵有所釐正上以公方膺
邊寄特仍其舊辛巳公破諸番于涼州都督毛忠在
虜圍公冒矢石徃搏全師而返甲申西寧番把沙作
亂公帥衆深入擒斬俘獲共千七百餘人馬牛羊二
萬有奇器械甚衆又請立儒學建廟置田教人醫藥
皆舊所未有者西人至今德之不衰憲宗即阼召
公還成化乙酉命掌左府事調前府丙戌錄河西
功加歲祿百石賜世襲伯爵佩征虜前將軍印鎮遼
東女直毛憐犯塞公據險設伏追還其所掠若干
上降勅獎諭已丑公以疾請召還京第壬辰命

視後府事尋命守備鳳陽丁酉調掌南京後府事
協練京營兵兼督習水戰連上疏請老辛丑復召
還奉朝請後十有七年為弘治戊午正月二十八日
卒于正寢壽八十八矣上震悼輟視朝一日賜棺
槨一具米百石布百疋寶鏹萬緡命有司治葬遣官
諭祭者十有三皇太子及親王皆祭如制仍贈宣
城侯謚壯勇蓋優典云公廣穎豐頰警欬如洪鐘言
論英發意氣直遂而沉實有謀折節下物曲遵矩度
老益更事歛不世用雖達官貴人不復延接坐饗富
貴以終天年然深居燕坐聞四方警報則抵掌扼腕

若有馬伏波之志者蓋其性然也公元配嚴氏早世封伯夫人又娶金氏生三子長璋當嗣官次瑀先卒次瓚一女適豐城侯李勇卒五孫鎔銀鑑欽七女孫長適靖遠伯王憲次適金吾左衛指揮使楊瑄璋等卜四月七日葬公翠屏山之原奉翰林顧編修士廉狀請予銘河西之捷我外舅蒙泉岳公嘗製薄伐凱還圖贊予得而觀之壯公之功後又以外舅成國莊簡公故與聯姍姍接公言貌益信其賢不誣并據以銘銘曰

武功之爵五等斯極惟公父子再世而涉公起萬戶為萬人敵內衛京邑外捍羗狄摧堅破勅靡績弗成乃錫伯爵封于宣城茲矢彤弓 皇有大賜金書鐵券 國有明誓爰自正統以及弘治十八年壽考令終軫卹耆舊上履 帝衷帑物有賻幽堂有封贈侯定謚以表公功維時熙平公戢弗出少當其勞老饗其逸名我自取亦我能匿持所遺者以歸造物公子公孫守而弗失

豐潤伯儀真曹公墓誌銘

劉定之

國家開基創業之初能奮其智勇以際雲龍風虎之
會取功伐官祿吾聞之矣至於太平既久武節罕用
然而為世胄者尚能因時之任使以赴機會樹績勲
增先祖禰垂休胤嗣自非其材武曷異等倫疇克爾
哉若豐潤伯曹公吾所僅見者也公諱義字敬方先
世居揚州儀真曾祖花一祖勇燕山左衛副千戶父
勝指揮僉事皆以公貴贈奉天翊衛宣力武臣特進
榮祿大夫豐潤伯曾祖母黃氏祖母王氏皆贈伯夫
人母謝氏封伯夫人公弱冠襲父職扈蹕征虜至會

州時太宗方欲南清沙漠將士非遴選不得從宣德
初擢都指揮僉事江西梅花洞賊施州衛刺惹洞蠻
憑險竊藪公往捕撫咸底靖謐擢中府都督僉事今
上登極克遼東副總兵擊虜于寧遠至白雲山取其
輜重璽書賜征虜前將軍印為正總兵與成國公朱
勇會兵兩汭口襲虜公功尤多陞都督同知虜犯象
州戡之於羊腸河陞右都督正統己巳與虜戰遼河
摧其前鋒旋師至廣平山東川洲虜復踵至迴騎擊
破之陞左都督景泰初追虜至栗皮峪鷹湖東與叅
將胡原分左右翼夾擊幾殲焉巡視邊戍至仙靈寺

虜穿塞垣深入與副將焦禮等設伏以待薄暮虜至
奮擊大破之最其前後大小戰無慮數十所俘斬虜
衆七百五十餘人雜畜三千餘頭匹奪還所掠中國
人畜幾至八千他器械輜重無算於是虜畏公威名
不復敢盜東北邊矣屢賜金白綵幣上復大位之初
進公爵豐潤伯勲踰奉天朔衛宣力武臣階特進榮
祿大夫柱國祿一千三百石推恩三代子孫世襲賜
鈇券未幾以公年益高不欲使居極邊召還入見慰
勞甚至賜羊酒居京師奉朝請久之以疾卒時天順
庚辰正月二十二日也享年七十有一公為將踰令

嚴明賞罰必信與士卒同甘苦見敵則以身先故能
所向克捷平居樂觀書史考求古名将忠臣事蹟以
為法與士大夫論列意豁如也奉母孝季父歿撫其
孤子克盡息意元配李氏安平侯遠女贈夫人繼室
李氏豐城侯女封夫人公卒之日哀不自勝遂自盡
以從子男一人璘孫男二人振搗璘先公十二年卒
其婦故太保陽武侯薛祿女誓節以育振兄弟今當
襲爵者振也振卜葬公于宛平縣玉河鄉之原前期
奉大理左寺正張君祝所述事狀因尚寶司丞劉君
福來請予銘乃序而銘之曰中華艱隅獠鬻左臂控
山引海有險足恃偶失其防竊出吠噬曹公孔武莫
之敢干有來輒殪甲裳為丹風馳電追殲其却還遼
窟金巢洒掃閒淨咸奉寶琛來供帝命二十餘載邊
民安定惟皇念功曰爾來歸生入邊關不待爾祈甲
第歌鍾白首娛嬉公拜稽首臣荷天造得瞻龍顏樂
以忘老七袞全歸以從祖考爵傳祿襲孫曾綿綿丹
書鐵券玉帶金鑾幽室有詩青瑤是鐫

奉天翊衛宣力武臣特進榮祿大夫柱國東寧

伯追封東寧侯謚襄毅焦公神道碑銘東寧李賢

公諱禮字尚節山後人曾祖克赤祖苦馬父捌思台

俱以公貴贈東寧伯曾祖妣伯顏禿祖妣苦翠妣伯

氏俱贈伯夫人公天資雄偉有智畧善騎射累功至

通州衛指揮僉事永樂初屢從太宗皇帝北征戰

功居多宣德初以遼東寇邇諸夷命公往守適與虜

遇公當陣生致賊首忽失捌餘皆潰散陞指揮使辛

卯邊將以公才堪御衆薦陞都指揮僉事壬辰以征

哨功進都指揮同知威名大振正統辛酉用都督曹

義薦陞都指揮使壬戌海西虜寇邊公率兵禦之獲
士馬甚衆癸亥朝廷嘉公之能遣勅命守寧遠乙
丑以公多邊功進僉左軍都督府事仍守寧遠丁卯
公率兵襲敗虜于境外以奇功陞都督同知復有白
金綵幣之賚己巳復襲敗虜如丁卯獲馬牛軍器無
算勅陞右都督充左副總兵白金綵幣之賚甚厚景
泰甲戌公復率兵對虜生致渠魁一人獲馬牛尤衆
進左都督天順改元英宗皇帝念公久于邊遣勅
封奉天翊衛宣力武臣特進榮祿大夫柱國東寧伯
食祿一千二百石子孫世襲賜誥券明年召至京

師慰勞之陞辭降勅獎諭賜蟒龍衣并甲冑諸物公
至鎮感上知遇益竭力邊事未幾以疾卒天順癸
未正月十四日也距生洪武壬戌五月五日享年八
十有二訃聞上震悼輟視朝一日追封東寧侯謚
襄毅遣官諭祭復令有司營塋事公配程氏繼劉氏
俱封伯夫人子男一曰亮孫男四曰壽嗣封東寧伯
曰俊曰傑曰仁孫女三是年五月九日塋于順天府
通州祖塋之次公平生尚氣節識大義臨陣奮不顧
身善撫士卒人人樂為之用以故所至成功虜人畏
之時以比漢之飛將軍銘曰

桓桓焦公際我明代展也長城橫亘紫塞公在東
鎮帝顧無憂四十餘年礪爾戈矛獻馘之功幕
府屢上閩外威名如古飛將帝念公功報典異
常金書鐵券垂裕無疆壽考令終邊帥無幾帝
恤公亡篤是恩禮勒銘于石百世不刊芳躅偉烈
海內式觀

伏寇伯贈伏寇侯謚武勇毛公傳

鄧廷瓚

公諱忠字允誠姓毛氏先世蜀人曾祖始徙雍之武
威祖諱刺國初率衆歸附遂隸藉蘭州洪武丙辰歿
于王事考諱寶以雄勇選充總甲永樂癸巳收捕沙
州叛寇老的罕加伍長甲午集衆隨駕北征授昭信
校尉永昌衛百戶並贈右軍都督僉事祖妣都氏妣
皆氏並贈夫人公少膂力絕人善騎射年二十代父
領兵進征寧夏至賀蘭山後擒番王也先士于并部
衆馬駝以歸永樂甲辰復從北狩至半壁山荷脊與
回衛甘州操備宣德庚戌九月征曲先叛寇散即思

追至恰思擒斬鎖南朵兒只等陞武毅將軍永昌副
千戶癸丑八月征亦不刺山擒偽少師督卜至伯忽
偽知院乞察歹陞武節將軍正千戶甲寅七月脩禦
永昌考來口征哨哈喇脫歡山遇敵擒連賊首完者
帖木兒等陞宣武將軍本衛指揮僉事乙卯八月策
應鎮番等處九月涼州破阿台賊兵於三岔河擒偽
千戶土昇十一月黑山擒賜朵兒別台陞指揮同知
賞賚有加正統丁巳陞甘州右衛操備戊午二月連
賊朵兒只伯擁衆寇邊公從平虜大總兵蔣公征剿
追至兀魯乃遇敵當先交鋒以七騎破陣奇功陞昭毅

將軍陝西行都司都指揮僉事有銀碗文綺之賜誥
追封祖考如其官壬戌九月哨巡沙州繕脩城堡邊
民賴之甲子四月巡迤北天蒼毛目等處乙丑正月
朝廷念公勲績賜敕獎諭加陞都指揮同知仍舊操
備丙寅月哈密使臣朝貢歸過赤斤沙州罕東遇連
賊被掠朝廷以公素為邊夷信服命出罕東追撫公
至大集渠魁諭以恩威虜即羅拜悔罪盡還其所掠
時聞沙州都督喃哥偕弟却領占潛通瓦剌將謀內
寇其弟鎖南奔已密受偽封祁王逸去因令公覘之
廉得其實遂擒番僧加失領真并徵兵虜檄三紙械

送京師復領兵往沙州收捕喃哥等千二百人招降
赤斤達保帖木兒男婦四百餘口事聞陞都指揮使
且有白金文綺之賜戊辰三月奉敕征進罕東等處
至失刺哈真界夜集虜營生縛偽祁王鎖南奔并部
下二百餘人招降沙州等處土達七十餘人陞右軍
都督府僉事尋被誥命追贈祖考如其官乙巳七月
哨接叅將劉震軍馬至半截墩遇敵奪獲被虜人畜
甚衆勅充右叅將鎮守甘肅景泰庚午二月領兵繕
脩高臺城堡堅完有備人甚賴之公一日令男佺赴
京奏事蒙特授佺百戶令膏勅回諭父子務在同心
協力盡忠報國時英廟出狩虜廷公前所獲奸僧加
失領真因得不死遂投虜也先以師事之適朝廷遣
禮部侍郎李實為通好計至則奸僧加失領真欲圖
復仇中公以奇禍因設間告李實實遽以其言歸報
公將獲罪而甘之內外守臣及其邊人俱為公訟朝
廷亦知其偽置之不問適福建賊起命公馳往協守
公居閩七年天順改元英廟復辟即日召公於閩陞
都督同知賜白金三十兩紵絲二表裏慰勞有加時
公以勤勞膺疾上遣太監賜羊酒藥物及日遣御醫
診視公疾愈入謝上思甘涼為西北重鎮欲得老成

練達武臣乃命公協同總兵西寧侯宋誠鎮守迨行
前一日召至文華殿玉音下詢防邊之策公應對咸
稱旨上嘉歎良久從容諭曰卿為國老成舊在西陲
民情土俗諳練有素此行當宣布朝廷威德如意撫
輯人民俾知感恩報國遇有調發必得其用毋致乖
違有負委任之重諭畢上親授公以玉帶明日陞辭
復賜白金五十兩金織蟒袍尋召至文華殿面獎
丁寧賜重寶一錠蓋上在虜廷時極悉奸僧之間而
益信公之忠誠故恩遇之隆如此九月領兵昌寧等
處截殺鎮番等處隄備策應涼州哨至板井寇聞公

威聲皆遁去明年戊寅上遣使就鎮賜甲鳳翅盔
綉春刀以壯軍容仍降勅獎勵是年佺病卒公令次
男倣奏辭原授百戶有旨毛忠在邊効勞還着男毛
倣做百戶公受恩感激愈深每征伐罄竭心膂務圖
成功五月永昌黃成兒西石門六月山丹紅寺兒緄
水湖七月花寨寺溝凡三戰皆大捷擒斬賊衆并奪
獲人畜軍器不可勝紀己卯五月陞右軍左都督仍
舊鎮守公嘗護送都指揮馬雲奉使撒馬兒罕及程
俊使土魯番撒馬兒罕使回又護送之公威望素著
中外畏服所過畧無梗阻辛巳正月虜酋孛來擁衆

寇在浪公與總兵宣城侯衛穎分兵追擊之擒斬賊衆奪獲戰馬軍器人畜賊勢少却隨領騎士三千於涼州十二里鋪墩安塘衆方集適賊騎數萬突至公嚴將士併力拒敵自黎明至次日晡時士皆殊死戰凡百餘合賊應弦落馬者不計其數賊衆稍却虜酋復立陣前宣大言以惑我軍重圍愈固公單騎往見責其不臣之罪目皆皆裂援兵且俱至城遂解去全師而還八月虜完永昌公屢截殺或夜刦營壘以撓之斬獲首級戰馬軍器并奪回男婦三百餘牛羊驢騾以萬計癸未冬總兵衛安公與公計曰把沙巴哇

等族皆哱馬吉思冬沙思我思哥兒阿兒加倉等番夷久任在浪涼州永昌阻截搶刦殺害官軍不舉兵剿除深為地方患遂合奏刻日分兵攻之公分巴哇大族阿兒加倉小族至期拒者戮之降者撫之不旬日功成惟在浪軍馬進攻皆哱馬吉思冬沙等族不下公分兵攻之盡滅黨與各族良善番官酋長公與總兵撫按之按堵如故捷奏進公爵為伏羗伯食祿一千石協守如故成化戊子八月陝西固原州土達滿四叛聚衆萬餘據石城砲架山流賊鄰境震驚關陝其山七峰陝峻前此官軍追剿每失至是公奉勅

以行遂率并涼兵馬與總督項公會行自十月初九日發哨期以軍至放砲掣軍舉烟次日至石城門會議適遇賊迎敵時甘州軍馬在後遂以騎二百餘人衝陣至砲架山截山奪險敵後哨至賊已大敗礮石滾木至以車輪磨石俱盡公與孫鎧督我軍乘勝直搗七峰聞山上老稚皆踣泣奔走功垂成忽昏霧起他哨誤先舉烟掣軍賊遂乘風盡抽餘黨以死決戰公顧孫鎧曰勢急矣我受高爵厚祿職在滅賊誓不與賊俱生鎧亦顧衆曰我君我祖在上寧與賊同死遂首騎與祖破陣以進孤軍相持自己至酉陣凡十

餘合射矢皆盡拾賊矢射亦盡公遂中流矢鎧前翼救仍奮馬殺十餘賊賊執鎧斷指裂其額曰爾復能射否海亦赴救死之是月十一日也夜半風起折旗拔帳營中士卒皆聞甲馬聲幕下卒王寬夢公曰我必將滿四馬上活活擒來既覺驚愕御史鄧公本端隔帳聞之即起焚香祝曰公果有靈能助我擒賊當為具奏立廟祀公未幾滿賊就擒伏誅忠義所感天固有以相之耶計聞上震悼輟視朝一日且曰毛忠奮勇殺賊忠義可嘉其與堊祭給麻布一百疋齋糧一百石造瑩域明器錫以鉄券贈奉天翔衛宣力武

臣特進榮祿大夫柱國伏羌侯謚武勇食祿一千石子
孫世襲伯爵公體貌雄偉器量宏豁故人而望畏之
即而愛之性仁孝事先都督公盡色養母皆氏早喪
事繼母都尤孝謹能樂友士大夫習之古兵法料敵
制勝雖古良將不能過平居不喜遊畋不嗜貨利存
心一以忠義為主其訓子孫亦如之賞又賜五倫書
謂子孫曰忠義盡在是矣汝等奉誦之母忽待士卒
務察其饑寒勞苦惟恐有一人不得所故士卒樂為
之用嘗征甜水胡陣中一軍馬被馬被箭而仆公以
所從馬乘之其招來達軍新役者幼丁無倚悉汲殷
富軍家給其月糧冬布之半養之其半貯候長成為
婚娶之費凡士卒疾必與湯藥至公自省問如已子
其愛護軍士皆類此軍旅所至市不易肆農不輟耕
晏然不知有兵故喪還之日關中餽運道進行旅之
人雖非甘涼部屬而平日威信所感動者莫不揮淚
相吊至有迎襯而奠望門而哭者自公卿以及偏裨
將士吊奠賻祭相屬於路越數月不絕凡荷朝廷暨
親王賜祭無不嘉其忠義之節生榮死哀可謂至矣
是歲十一月二十八日奉塋甘州城南公生洪武甲
戌六月二十一日薨以成化戊子十月十一日享年

七十有五配真氏封夫人子男四長佺錦衣百戶贈
伏羗伯次曇事釋氏次俊甘州右衛百戶又次傲甘
州左衛指揮孫男九曰銳今襲伏羗伯鋼鑑鉞鑑鑄
釗鐸鐸甘州左衛百戶孫女二弘治乙卯七月朝廷
賜名其坊曰忠義以表厥宅里丁巳七月欽命所司
於甘州擇地建祠賜額曰武勇以春秋祭之公名著
華夷功施社稷侯封廟食金書鉄券輝映當時流傳
百世蓋原有生氣真宇宙間大夫也銳襲爵弘治元
年命掛平蠻將軍印充總兵官鎮守湖廣尋改命總
鎮兩廣信賞必罰威行惠施功高不居詩書禮樂念
念不置蓋有古卻穀之風得非乃祖積功懋德及庭
訓之所致歟

贈伏羌侯毛公忠義記

楊一清

我 憲宗皇帝在位之四年為成化戊子陝西固原
土達滿四據石城山以叛屬時承平將驕惰不律戰
數失利關輔震驚 詔三邊守將會兵討之伏羌伯
毛公以甘涼兵在行進攻砲架山率衆先登奪其險
俘獲甚衆賊勢大蹙悉力當我師矢石下如雨士殊
死戰巢且覆會天暮雪暝矢盡援兵不至公誤中流
矢歎曰吾平生誓以死殉國今得死所矣遂與其從
子海孫鎧俱大呼陷陣死之是夕烈風驟發營中若
聞甲馬聲有卒夢公與語曰吾當生擒滿四以來蓋

未幾而叛首授首矣守臣以計聞 帝若曰是惟奮
勇勦賊之臣忠義可嘉為輟視朝一日遣官諭祭工
部造塋域追贈伏羌侯謚武勇錫之誥券子孫世襲
伯爵逮我 孝宗皇帝因臣下建白即甘州家第樹
綽楔表之扁以忠義又建祠即謚為額所司春秋享
祀如儀皆 特恩也公之孫令總鎮兩廣太子太傅
總戎公間以書屬予曰惟先大父之歿立言君子以
死節故發休揚芳輝映琬琰伏念忠義之褒出自
帝旨宜有特書以示不泯願為書之嗚呼臣道莫大
乎忠義而莫重於死死生亦大矣視死如歸輕棄其

生不自惜豈不以天理民彝有重於死者邪夫所謂
忠臣義士非先取必於死而樂趨之也顧其所遭有
幸不幸不敢避死而逃之耳功成身全而吾之忠義
泯於無迹君子志也身與道不能兩全則死事以存
忠舍生而取義君子之不得已也世固有平居無所
擇於義而臨事能不爱其死者殆其天資近勇其諸
異乎偷生苟免者之所為矣公弱冠臨戎自永昌衛
百戶累功至左都督進封伯爵奉 勅充右叅將左
副總兵協守甘肅後先五十年北禦勁虜西征叛羌
南平通盜大小戰數百合所向克捷其間以寡敵衆

身臨不測之淵屢矣人未嘗見其色變卒收駿功為
一時名將石城之役乃其不幸英風凜凜至今生氣
可激懦徒若公者忠義根於天性不問夷險與身存
亡豈無所擇而徒冒一死以成名者哉自古有天下
者恒褒崇忠義以勵臣節而窒不軌傳曰姦鈇逆鼎
搏人而肆其毒然我一義士則四方解情故段秀實
之血未乾而朱泚之腦已裂顏杲卿之舌未斷而祿
山之尸已暴矣方滿四扇亂我賊我生人不可殫紀
比公死戰不待推卜而知亂流之當殲謂忠義非天
之所順人之所與而可哉我先朝卹典便蕃賞延
于世至列諸祀典以繫邊之人之思於無窮斯又前
代死節死事之臣所未有也今總戎以世胤承爵垂
四十載嘗典兵京營協守舊都兩佩將軍印符出鎮
南土才畧氣槩儼有祖風觀其所以圖公之不泯者
而其所存可知已公諱忠字允誠上世自蜀徙武威
國初隸籍蘭州卒葬甘州其履歷勲烈立言者著
之已詳予獨疏其大者為忠義記

太保兼太子太傅昌寧伯贈昌寧侯謚壯敏趙

公墓誌銘

尹直

國朝膺天御宇百二十載內安外攘豐亨熙豫固由
聖明繼作於上而亦文武夾輔於下之所致肆惟英
桓果毅之才瓌偉頎頎之資入則纓冠珮玉位保傅
儀百辟出則綰章持節總師旅敵王愾使朝廷有所
恃而安夷狄有所憚而不敢發者蓋世有其人焉若
太保兼太子太傅昌寧伯趙公其一也乃茲已矣嗚
呼惜哉公諱勝字克功姓趙氏系出漢克國之裔世
居河朔至伯父赤考再興國初始徙家永平之遷安

遂占藉烏太宗文皇帝靖難師興赤以謀略從征有功授永平衛百戶沒于戰陣無嗣再興襲陞千戶永樂庚寅北征大破虜酋本牙失里殺敗阿魯台餘衆陞指揮僉事洪熙改元復以征虜功陞指揮使尋卒公襲甫髫鬣賴母王夫人矢節育教底于成立恒念父遺言我生為壯士而志弗就爾長須努力報國充宗母負奇男子也由是刻志勵行事母極孝敬始終無遺禮正統己巳虜寇犯京畿公率兵出西直門扼其衝突躬履戰陣斬馘無算虜遂奔遼景泰庚子擢僉都閫名以發聞英廟復辟錄公舊勞加僉前軍都督府事佩刀侍衛天順戊寅選管三千營操辛巳秋曹孽叛逆公擒獲居多遷都督同知時虜寇深入陝西固原公叅將率師生剿敗之今上嗣統命兼勇營典操推恩給誥進祿大夫褒崇三代成化乙酉重建永天門公董軍應役既訖工適山西邊徼有警命公佩平胡將軍印統軍往援次鴈關報虜已遁乃還明年秋往延綏河虜酋聞風渡河趨大同納款入貢師旋即命典操耀武營戊子夏建州毛憐海西諸夷弗靖廷議請以公總鎮之乃佩征虜前將軍印杖節以征至則申嚴號令簡閱軍士調度有方屢奏克獲

賜勅獎諭辛卯春召回總典五軍營壬辰春調三千
營是夏至甲午秋兩奉制勅佩印總師北征虜輒遠
却丙申總督軍士濬築京城垣塹蕪葺西直門城樓
陞後軍都督府左都督戊戌冬加太子太保癸卯秋
勅封昌寧伯歲食祿千鍾丙午冬加太保兼太子太
傅丁未春皇貴妃萬氏薨奉勅董工造墳于天壽山
之西南朝夕督視觸冒寒暑遘疾輿歸遂不治是歲
七月朔也計聞當寧惻然嗟悼特賻鈔三萬貫給麻
苧白布差輟視朝一日勅所司為造塋域遣官諭祭
者屢追封昌寧侯謚壯敏卹典渥矣公生永樂庚子

後正月之朏享年六十有八曾祖寶山祖保洎父俱
贈榮祿大夫同知都督府事曾祖妣閔姚王及原配
李繼冉俱贈夫人先卒葬昌平縣太平鄉之原子男
一瑄以舍人選侍春宮詔賜冠帶先公一年卒女二
長適都指揮白璽次適定西侯蔣公仲子駿孫男三
長鑑恩授冠帶次鉞次錫女三曾孫女二俱在室鑑
卜以辛之秋八月日奉公柩啟夫人之封寔為前事
具公世出行實請予銘維公早襲勲階斃子乃克篤
志奮興閑習武畧涉獵儒書累膺簡命佩符建節東
征北伐英威勇譽聳聞夷狄所至虜輒聞風奔遁靡

敢抗逆乃不窮迨遠襲僥功啓釁所謂不戰而屈人之兵厥功懋焉矧平居總操督工簡教有方卹撫周至士卒感悅立朝行已慎重無違縉紳推敬朝廷倚重凡奉勅遣出辭還見輒有白金文綺寶鏹餼醴之錫蟒衣玉帶歲節恩意尤夥而卒也賻祔塋祭封爵加謚有隆無殺始終榮哀何其盛哉余與公同朝久知公深去秋舉典邦政兩偕公考閱武學官舍諸生相歡竟日益見公之忠亮端疑信為國之干城而於古之名將奚忝然則銘於予宜銘曰皇明奠安泰山盤石曰惟文武篤棊勵翼桓桓趙公系出克國世有

聞人儲休委澤粵若公考早世兄職從我文皇勛階累積公自幼孤式克修飭武畧究通體貌軒特虜寇薄郊慨然舉檄乃率虎旅乃肆鷹擊乃僉都聞英譽炫赫先帝錄勞崇登顯陟出則總操入則侍直今上倚毗寵恩彌益屢佩印符屢奉制勅東征之伐所向無敵或聞風遁或受俘馘恬不邀功邊不啟隙惠周司徒威讐夷狄帝曰汝勝久樹勛績予維汝嘉其進封伯公拜稽首曰敢忘德報德維何委身戮力營星俄隕尚勞敦役計聞九重良深痛惜卹典渥優永榮何極太平之原鬱鬱松柏寂跡勒銘永賁窀穸昌寧

之號於昭千億

公行狀

陽明先生王公諱守仁字伯安其先琅琊人晉光祿

大夫覽之後晉都江左覽曾孫羲之南父曠渡江家建

康義之不樂居京師徙百濟其後復徙剡之華塘自

華塘徙石堰又徙達溪有曰壽者仕至迪功郎乃徙

餘姚六世祖諱綱字性常博學善識鑑有文武長才

與永嘉高則誠宗人王元章括蒼劉伯溫友善仕國

朝為廣東參議死于苗賊之難五世祖諱彥達號秘

湖漁隱有孝德高祖諱與準號豚石翁精究禮易著

新建伯兵部尚書兼都察院左都御史陽明王

公行狀

黃綰

易微數千言曾祖諱傑號槐里子以明經貢為太學生以孫龍山公貴贈禮部右侍郎曾祖妣孟氏贈泚人祖諱天叙號竹軒封翰林院編脩贈禮部右侍郎祖妣岑氏封太泚人父即龍山公諱華成化辛丑以狀元及第仕至南京吏部尚書封新建伯妣鄭氏封孺人贈夫人繼母趙氏封夫人鄭氏德性淵靖慈孝與龍山公共起寒微躬操井臼勤事績紡奉舅姑既貴益恭儉孕十四月而生公將誕之夕祖母岑太泚人夢天仙抱一赤子乘雲而來導以天樂至屋簷呼岑與之岑失手墮地厥不能啼岑以生噓氣口少頃而啼岑驚寤即公初誕啼聲既誕果厥少頃岑以生氣噓之而甦鄭自乳之忽乳竭夢神女為乳乳遂溢龍山公以夢雲之祥故名之曰雲生六歲不能言一日出戲于門有老僧過以手摩其頂曰有此寧馨兒却被名字叫壞了鄭語龍山公改今名遂能言而穎異頓歲年十一竹輒翁之携上京過金山作詩曰金山一點大如拳打破維揚水底天醉倚妙高臺上月玉簫吹徹洞龍眠已而從塾師讀書出游市上與鬻雀者爭有相者目而異之以錢買其雀與公送公歸書館謂塾師曰此子他日官至極品當立異等功名

因遍閱館諸小生第其官崇卑顯若晦後皆悉驗年
十三龍山公為會試考官隨入試場即能閱卷評品
高下皆當性豪邁不羈喜任俠畿內有石英王勇之
亂久不能撲公歆以計令俠侶往擒之又湖廣有石
和尚劉千斤之亂輒為書歆獻于朝請往征之龍山
公皆力止之年十七至江西成婚于外舅養和諸公
官舍明年謂一齋婁先生異其質語以所當學而又
期以聖人為可學而至公由此遂毅然有學為聖人
之志然任俠之氣未能遽除弘治壬子年二十一中
浙江鄉試會試二科不第乃學兵往塞外觀山川學
騎射己未登進士第觀政工部乃與太原喬宇廣信
汪俊河南李夢陽何景明姑蘇顧璘徐禎卿山東邊
貢諸公以才名爭馳騁學古詩文欽差督造威寧伯
王公墳于河間造墳役夫一以什五之法取之暇即
以役夫演八陣圖識者已知其有遠志少日嘗夢威
寧伯授以寶劍及是既竣事威寧家以金幣為謝公
辭不乃出威寧軍中佩劍贈之道符其夢時有彗
星及韃虜猖獗上疏論邊務因言朝政之失辭極剴
切明年授刑部主事差往淮甸審囚多所平反復命
回部日事案牘夜歸必燃燈讀五經及先秦兩漢書

為文字益工龍山公恐過勞成疾夜禁家人不許置
燈書室公潛置俟龍山公寢又燃讀必至夜分因得
嘔血疾告養病歸越即陽明洞舊觀基闕為書屋覓
神仙踪跡及究仙經秘旨靜坐習導氣為長生久視
之道靜坐久能預知時坐洞中其友王思裕等四人
欲訪公方出五雲門公已知即命僕出山買果肴候
之且歷語其來跡僕遇四人于途語之悉合皆驚異
以為得道遂師事之甲子聘為山東鄉試考官至今
山東之士凡為海內所稱重者皆公所取士也因出
復授兵部武庫司主事明年白沙陳先生高第甘泉

湛公若水始為翰林庶吉士公一會而定交共為聖
學明年丙寅正德改元官官劉瑾竊國柄作威福差
官校至南京掣給事中戴銑等下獄公上疏乞宥之
瑾怒矯詔廷杖五十斃而復甦請貴州龍場驛驛丞
瑾怒猶未釋公行至錢塘度或不免乃托為投江潛
入武夷山中決意遠遊學道誓不得道不出山遇夜
至一山菴投宿不納公行半里許見一古廟四壁俱
頽時夜已深遂據香案而卧黎明道士特往視之公
方熟睡案上乃推醒曰汝異人也此乃虎狼之穴汝
何得無恙因詰出入公始為商人道士曰視汝丰神

决非商人若非道士之流决是廟廊清貴公乃吐實
道士曰如汝所志將來必有赤族之禍公問何以至
此道士曰汝既有名朝野若果由此匿跡將來竊發
之徒必假名以鼓舞人心朝廷必尋究汝家豈不致
赤族之禍公深然其言嘗有詩云海上曾為滄水使
山中又拜武夷君遂由武夷至廣信沂彭蠡歷沅湘
至貴陽龍場始至無屋可居爰於叢棘間遷於東峰
就石穴而居夷俗以蠱毒為事凡中土人至必下蠱
殺之及歎蠱公卜諸蠱神不恟於是龍場之民聞未
親狎以所居陰湿不可久乃相與伐木為驛樓及屋

公乃扁為何陋軒君子亭賓陽堂玩易窩以居之龍
場在萬山中書篋不可携止偕三僕以往諸僕歷險
冒瘴皆病公日夕躬為湯糜調護之瑾歎害公之意
未已公於一切得失榮辱之境皆能超脫惟生死一
念尚不能遣于心乃為石郭自誓曰吾今惟候命有
死而已他復何計日夜端居默坐澄心精慮以求諸
靜一中一夕忽大悟終夜不寐踴躍若狂者兩日夜
嗣後以所記憶五經之言證之一一相契獨與晦菴
註疏若相牴牾恒往來於心因著五經臆說時元山
席公官貴陽聞其言論謂為聖學復睹公因取朱子

大全集閱之見其晚年論議有自知其所學之非至
有誑已誑人之說迺自信曰晦翁亦已自悔矣日與
學者講究體察愈益精明而後游者衆時思州守遣
人至龍場稍侮慢公諸役夫咸憤惋輒相與歐辱之
守大怒白憲副毛公糾令公詣謝且喻以禍福利害
公致書以忠信禮義為解守遂釋然愈敬重公安宣
慰初聞公名使人餽米肉給使令公辭不受既又重
以金帛鞍馬復固辭不受及議減驛事則力折之且
申說朝廷威信令甲其議遂寢已而獯酋有阿賈阿
札者時出入剽掠為地方患公復以書詆諷之安悚
然操切其所部民賴以寧庚午陞廬陵知縣公至稽
國初舊制慎選里正三老委以詞訟公坐視其成因
園清靜是歲冬以朝覲入京陞南京刑部主事館于
大興隆寺僧房予時為後軍都事少嘗有志聖學求
之紫陽濂洛象山之書日事靜坐雖與公有通家之
舊實未嘗深知其學執友柴堯儲公囑與予曰近日
士夫如玉君伯安趨向正造詣深不專文字之學足
下肯出與之游麗澤之益未必不多予因而慕公即
夕趨僧房請見適湛公共坐室中公出見佛燈下與
語喜曰吾嘗聞子名不知子學乃爾此學久絕子何

所聞而遽至此也予曰雖粗有志實未用工公曰人
惟患無不患無工予由此益知公非常人公即問
予曾識湛原明否來日請會湛予以訂我三人終身
共學之盟明日公令人邀予至公館中會湛公共拜
而盟又數日湛公與予語欲謀白巖喬公轉告冢宰
邃菴楊公雷公北曹揚公乃擢公為吏部驗封主事
未幾為會試考官於是予三人者自職事之外稍暇
必共講飲食放居日必共之各相砥勵未幾公陞文
選員外即繼陞考功郎中而學益不懈士大夫之有
志者皆相率從游如此二年而湛公往使安南予與
公又共居一年壬申冬予以疾告歸公為文及詩送
予且托予結廬天台鴈蕩之間俟公而共老湛公又
欲買地蕭山湘湖之間結廬與公及予三人共之明
年癸酉公陞南京太僕寺少卿從游者日益衆甲戌
陞南京鴻臚寺卿公始專以良知音訓學者乙亥朝
廷舉考察之典公為疏自劾力乞休致以踐前言不
允八月又上疏力以疾甚乞養病又不允間聞迎佛
骨又為疏欲納約自牖勸為聖學不果上明年丙子
十月陞都察院右僉都御史撫鎮南贛汀漳等處先
是南贛撫鎮屢用非人山谷兇民初為偷竊攘奪以

至聚徒為盜漸至虜劫鄉村焚掠州縣肆無忌憚遠
近視效凡在虔楚閩廣接壤山谷無非賊巢小大有
司束手無策皆謂終不可理兵部尚書王公瓊獨知
公特薦而用之又懇疏以辭亦不允督旨益嚴公遂
受命既至南贛先嚴戰禦之法特龍南賊二千餘人至
信豐又糾合廣東龍川泃頭諸賊酋分隊以進勢甚
猖獗公於未戰之先令兵備官調兵斷賊歸路及委
官統領前後夾擊又曰此賊既離巢穴利在速戰又
令乘險設伏厚集以待及各鄉村往來路徑多張疑
兵使進無所獲退無所據不過旬日可以坐擒一違
節制當以軍法從事先時在官吏書門皂及在城軍
民陰陽占卜皆與賊通日在官府左右詞覘不惟言
出于口賊必先知凡意向顏色之間賊亦知之公知
其然意欲在此則示之以彼意欲在彼則示之以此
每令陰陽擇日日者占卜或擇卜已而不用或欲用
而中止每厲兵蓐食令俟期而發兵竟不出賊各依
險自固四路設伏公潛令三省兵備官各率兵從徑
道與賊交鋒前後大戰數合擒斬賊首俘獲無算餘
黨奔聚象湖山拒守公密諭令佯言犒軍退師俟秋
再舉密探虛實乘賊懈弛新陞廣東布政司邵蕢與

公同鄉將之任例發兵護送公乘此會選精兵一千五百當先重兵四千二百繼後軍約已定令送邵布政刻期還日度夜半至歛征賊巢山下公潛率數十騎亦至密使人招之未前令分作三路於夜半銜救直趨湖山搗其巢穴我兵奪據隘口賊猶不知各賊雖已失險其間賊徒類皆驍悍猶能凌絕谷超距如飛復據上層峻險四面飛打滾木礮石以死拒敵我兵奮勇鏖戰自辰至午三省所發奇兵復從間道鼓噪突登始驚潰大敗我兵乘勝追殺擒斬俘獲賊屬又無美墜崖壑而死者亦不可勝計餘黨復入流息

山岡等巢與諸賊合勢明日復戰賊又不利遂入廣東界上黃臘樟溪大山又賊酋詹師富等恃居可塘洞山寨聚糧守勢甚強固公命分兵五路攻擊迨襲與賊連戰又令知府鍾湘攻破長富村等處巢穴三十餘處擒斬俘獲益多其脇從餘黨悉願携帶家口出官投首聽撫安插公聽令委官招撫脇從諸賊安插復業四千餘人公又令兵僉事顧應祥等委官統領軍兵會同福建刻期進剿揚言班師出其不意從牛皮石嶺脚隘等處分為三哨鼓噪並進賊膽顧不暇望風瓦解攻破古村柘林白土村赤石巖等巢直

搗前灘及攻破水竹火重坑若宅溪清泉溪白羅南山等巢搗洋竹洞三角湖等處前後大戰十餘俘獲四千人有奇牛馬貨物無算公嘗上疏申明賞罰以勵人心因請勅便宜行事及請令旗令牌不報及是大康南康上猶三縣峯賊各散虜掠居民又廣東泫頭等處強賊池大鬻等三千餘徒突未攻圍南康縣殺損官軍兵與湖廣桂陽及廣東樂昌等巢穴相聯盤據流劫三省于時兵備等官請調三省狼達等兵與官兵夾剿公又上疏論狼兵所過不減於盜輸之若重困於民公仍請便宜行事其於成功不限以時則兵衆既練號令既明人知激勸事無掣肘可以伸縮自由相機而動日剪月削使漸盡灰滅復疏請添設清平縣治及疏通鹽法以足食會湖廣巡撫都御史秦公金奏請夾剿疏下公復上疏議處兵糧事宜是歲六月公召知府李燾縣丞舒富等密授方畧領兵分剿生擒賊酋陳曰能等搗其巢穴俘獲賊黨無筭公又上疏論三省文剿方畧先是公屢請勅便宜行事衆皆笑公為迂故屢不報惟尚書王公慨然曰朝廷此等權柄不與此等人用又與誰用我必與之故因公疏覆議奉旨改公提督南贛汀漳等處軍務

換賜勅書及前所請旗牌便宜行事俱得報可廷議以公前攻破長富村象湖山可塘洞諸處擒斬首從賊級數多仍降勅獎勵陞公俸一級賞銀二十兩紵絲二表裏時汀州左溪賊酋藍天鳳與贛南上新穩下等峒賊酋雷鳴聰高文輝等相結盤據千里荼毒三省公與諸從事議曰諸巢為患雖同事勢各異以湖廣言之則桐岡諸酋為賊之咽喉而橫水左溪諸巢為賊之腹心以江西言之則橫水左溪諸巢為賊之腹心而桶岡諸巢為賊之羽翼今不去先橫水左溪腹心之患而款與湖廣夾攻桶岡進兵兩寇之間腹背受敵勢必不利今我出其不意進兵速擊可以得志已破橫水左溪移兵而臨桶岡勢如破竹矣議既決乃命各官等帥兵由各道以入指揮郊文帥兵千餘自大庾縣義安入知府唐淳帥兵千餘自大庾縣聶都入知府季數帥兵千餘自大庾縣穩下入縣丞舒富帥兵千餘自上猶縣金坑入公親帥兵千餘自南康進屯至坪期直搗橫水以與諸軍會又使兵備副使楊璋分守叅議黃宏監督各營官兵往來給餉以促其後是月初七日各哨齊發初十日進兵至坪會間諜調知各險隘皆設有柵木礮石公度此時

賊已據險勢未可迫公自率兵乘夜遂進未至賊巢三十里止舍使人伐木立柵開塹設堠示以久屯之形復遣官分帥鄉兵及樵墾善登山者四百人各與一旗齎銃鉤鑣使由間道攀崖懸壁而上分列遠近極高山頂以覘賊張立旗幟蕪茅為數千竄度我兵且至險則舉砲燃火相應十二日黎明公進兵至十八面隘賊方據險迎敵驟聞遠近山頂砲聲如雷烟焰四起我兵復呼哨分逼銃箭齊發賊皆驚潰失措以為官兵盡破其巢穴遂棄險退走公預遣千戶陳偉高層分帥壯士數十緣崖上奪賊險盡殺其衣木礮石我兵乘勝驟進指揮謝景馬廷瑞兵由間道先入悉焚賊巢賊退無所據及大敗奔潰橫水既破遂乘勝進攻左溪擒斬首級無算俘獲男婦牛馬什物不可勝算會霧雨連日公令休兵犒勞是月二十七日官兵乘勝進攻桶岡公復議桶岡天險四面青壁萬仞中盤百餘里連峰參天深林絕谷不覩日月因詢訪鄉導賊所由入惟鎖匙龍葫蘆洞茶坑十八磊新地五處皆假棧梯壑寅懸絕壁而上惟上章一路稍平然深入湖廣迂回取道半月始至公令移屯近地休兵養銳振揚威聲先使人諭以禍福彼心懼

請服其或不從者乘其猶豫襲而擊之盍可以逞
使人招撫并縱所獲桶岡賊鍾景緘入賊營期以翌
日早使人於鎖匙龍受降賊方甚恐乃聚衆會議公
乃遣縣丞舒富帥數百人也鎖匙龍促使出降而使
知府邢珣入茶坑伍文定入西山界唐淳入十六嘉
知縣張戩入葫蘿洞皆於是月晦乘夜各至分地遇
大雨不得進明日早冒雨疾登賊酋藍天鳳方就鎖
匙龍聚議聞各兵入已險皆驚愕散亂猶驅其衆男
婦千餘人據內隘絕險隔水為陣以拒我兵渡水前
擊復分部左右夾攻賊不能支且戰且却及午雨霽

各兵鼓奮而前賊乃敗走桶岡諸寨遂皆悉平公以
暇親行相視形勢據險之隘議以其地請建縣治控
制三省諸徭斷其往來之路又進兵攻穩下朱坑等
寨又皆悉平公又以湖廣二省之兵方合雖近境之
賊悉以掃蕩而四遠奔突之虞難保必無乃番兵二
千餘分屯茶寮諸隘餘兵回頓近縣休息疲勞候二
省夾攻盡絕然後班師公驅卒不過萬餘用費不滿
三萬兩月之間俘斬六千有奇破寨八十有四渠魁
授首噍類遺無公又疏請三縣適中之處立崇義縣移
置小溪驛於大墩縣城內使督兵防遏湖頭賊酋池

大鬻等聞橫水諸寨皆破始惧加兵乃遣弟池中安等率老弱二百餘徒亦赴軍門投降求隨衆立功意在緩兵因而窺覘覘虛實乘間內應公逆知其謀乃陽許之及進攻桶岡使領其衆截路於上新地以遠其歸途十一月池大鬻等聞復破桶岡益惧為戰守備公使人至賊所賜各酋長牛酒以察其變賊度不可隱詐稱龍川新民盧珂等將掩襲之是以密為之防非虞官兵也公亦陽信其言因復陽怒盧珂等擅兵仇殺移檄龍川使廉其實且趣伐木開道將回兵溯頭取道往征之賊聞之且喜且惧有盧珂鄭志高陳英者皆龍川舊招新民有衆三千餘皆為池大鬻所脇而三人者獨深忌之乃來告變云池大鬻僭號設官及以偽授盧珂等金龍霸王官爵印信來首公先已諜知其事乃復陽怒不信公遂械繫盧珂而使入密諭以陽怒之意珂遂遣人歸集其衆待時而發又使人往諭池大鬻且密購其所親信頭目二恁陰說之同部下百八十人使自來投訴公還贛乃張樂大亨將士下令城中散兵使各歸農示不復用賊衆皆喜遂弛其備池大鬻乃謂其衆曰若要伸先用屈贛州伎倆亦須親往勘破遂其麾下四十人自詣贛

公使人探知池大鬻已就道乃密遣人先行屬縣勒
兵分哨道候報而設又使人督集盧珂等兵俱至而
令所屬官寮以次設羊酒日犒池大鬻以緩其歸會
正旦拜節又明日復設犒於庭先伏甲士引池大鬻
入并其黨悉擒之出盧珂等所告狀訊鞫皆伏遂寘
于獄皆斬之夜使人趨發屬縣兵期以初七日同時
入巢諸哨兵皆從各徑道以入公自率帳下官兵從
龍南縣冷水遙直搗下泃大巢與各哨兵會於三泃
先是賊徒得池大鬻報謂贛州兵已罷歸皆已弛備
散處各巢至是驟聞官兵四路並進皆驚懼分投出
禦悉其精銳千餘據險設伏併勢迎敵於龍子嶺我
兵聚為三衝犄角而前大戰良久賊敗復奮擊數十
合遂克上中下三泃各哨官兵遙聞三泃大巢已破
皆奮勇齊進各賊皆潰敗遂進攻九連山於是精選
銳七百餘人皆衣所得賊衣佯若奔潰者乘暮直衝
賊所據崖下澗道而過賊以為各巢敗散之黨皆從
崖下招呼我兵亦佯與呼應賊疑不敢擊已度險遂
扼斷其後路次日賊始知為我兵并勢衝敵我兵已
據險從人上下擊賊不能支公度其必潰預令各哨
官四路設伏以待賊果分隊潛逃皆邀擊而俘之前

後擒斬首級無算俘獲男婦牛馬器仗什物不可勝
計餘黨張仲全等二百餘人多係老弱及遠近村寨
一時為賊所驅徙惡未久之人勢窮計迫聚於九連
谷口呼號痛哭誠心投招公遣官驗實皆量加責治
遣知府邢珣往撫其衆藉其名數悉安挿於白沙公
遂相親視險易經理立縣設隘可以久安長治之策
番兵防守而贛歸人皆首戴香爐遮道而迎公為立
生祠又家肖公像而歲時祭禱公始上疏乞休致不
允公又以龍川諸處係山林險阻之所盜賊屯聚之
鄉當四縣交界之際乃一省閩餘之地政教不及人
迹罕到其間接連閩廣反覆賊巢動以百數據而守
之真足控諸賊之往來杜奸宄之潛匿遂疏請於和
平地方建設和平縣治以扼其要害公又以大賊首
龔福全高仲仁李斌吳玘等邀路劫殺軍民攻掠郡
縣公命三省將官征剿克平乃上三省夾剿捷音疏
朝廷論功行賞陞公右副都御史蔭子一人做錦衣
衛世襲百戶馮勅獎勵公懇疏辭免乞原職致仕温
旨慰番隨因奏報平定廣東韶州府樂昌縣等賊捷
音查例加陞本衛世襲副千戶公在贛雖軍旅擾
四方從游日衆而講學不廢褒崇象山陸子之後以

扶正學籟人初與賊通俗多鄙野公為立保甲十家
牌法於是作業出入皆有記又行鄉約教勸禮讓又
親書教誡四章使之家喻戶曉而籟俗丕變籟人多
為良善而問學君子亦多矣十四年正月再疏乞放
歸田里當路輔臣素忌公欲從其請兵部王公瓊逆
知宸濠濠必將為變王公一日召其屬本科主事應
典曰我寘王某於江西與之便宜行事者不但為溪
洞諸賊而已今溪洞已靖萬之一或有他變若無便
宜行事勅書旗牌將何使用時福建有軍人進貴等
之變王公曰此小事不足煩王某但假此以牽便宜
勅書在彼手中以待他變爾可為我做一題稿來看
稿成具題降勅與公曰福州三衛軍人進貴等脇衆
謀反特命爾暫去彼處地方會同查議處置衆奏定
奪時宸濠陰謀不軌亦已有年一日令安福舉人劉
養正往說公云寧王尊師重道有湯武之資欲從公
講明正學公嘆曰殿下能舍去王爵否既而令門人
冀元亨先往與宸濠講學以探其誠否元亨至語茅
盾宸濠怒遣還密使人殺元亨於途不果於是公以
六月初九日自籟起行欲往福建勘事十五日至豐
城縣界先有典史郵人來報宸濠狀反繼而知縣顧

必來具言其詳公度單旅倉猝兵力未集難即勤王
亟欲溯流趨吉安可以集兵觀其動靜以圖萬全時
正夏南風方盛欲南至吉安則風逆聞宸濠亦發千
餘人來迎公欲發舟舟人畏不敢發乃以逆流無風
為辭公乃密禱于舟中且誓死以圖報國無何而北
風大作舟人猶不肯行公乃拔劍馘其耳遂發舟薄
暮公度勢不可行乃潛覓小漁舡以微服作繹夫下
舡急去番麾下人服公冠服在舟中已而宸濠兵
果犯舟而公不在欲殺其代公者或曰殺之何益遂
捨之追公不及是夜舟至臨江知府戴德孺聞公至

喜甚番公入城調度公曰臨江居大江之濱與省城
相近且當道路之衝莫若抵吉安為宜又以三策籌
之曰宸濠若出上策直趨京師出其不意則宗社危
矣若出中策則趨南都大江南北亦被其害若出下
策但據江西省城則勤王之事尚易為也公行至中
途恐其速乃為間諜假奉朝廷密旨先知寧府將反
行令兩廣湖襄都御史楊旦秦金及兩京兵部各奉
密旨命將出師暗伏要害地方以俟寧府兵至襲殺
獲取僇人數輩各與數百金以全其家令其至伏兵
處所飛報竊發日期將公文各縫置箬于袷衣絮中

將戮間又捕捉偽太師李士實家屬至舟尾令其覘
知公即佯怒令牽上岸處斬已而故縱之令其奔報
宸濠邏獲優人果於袷衣中絮搜得公文遂疑不敢
即發十八日公至吉安知府伍文定出迎甚喜軍民
皆遮道呼號公遂入城撫慰軍民兩上疏飛報宸濠
於是月十四日謀反擅殺都御史孫燧副使許達并
執縛巡按與都布按三司官及府縣等衙門大小官
員不從其囚之盡收在城各衙門印信及搬搶各庫
藏一空釋放在城各司府縣見監重囚舟楫蔽江而
下聲言直取南京又差儀賓校尉人等持檄至各府
州縣曉諭收取印信驅截水陸糧舡請命將征討以
解東南倒懸奏至王公瓊揚言於朝曰王某南贛必
能擒之不久當有捷報至但朝廷不命將出師則無
以壯其軍威時寧王蓄養死士二萬招誘四方盜賊
渠魁亦萬數舉事之日復驅其護衛黨與并協從之
人又六七萬雷焰張熾公以百數從卒退保吉安遙
為牽制之圖遠近軍民劫於宸濠積威道路以目莫
敢出聲公督率知府伍文定戴德孺邢珣徐璉等調
集軍民召募四方報効義勇會計一應解番錢糧賞
造作軍器戰船奏番公差曰任御史謝源伍希儒分

職任事約會鄉官致仕右副都御史王懋中養病編脩鄒守益郎中曾直評事羅僑丁憂御史張鰲山赴部調用僉事劉藍依親進士郭持平致仕副使劉遜叅政黃繡閑任知府劉昭等相與激勸忠義曉諭禍福又恐宸濠知其調度覺其間諜之謀發兵順江速出又密使偽國師劉養正家屬及平日與宸濠往來鄉官陰致歸附之意以緩其出直俟調度已定乃移檄遠近宣布朝廷仁德暴露宸濠罪惡於是宸濠始覺為公所欺亟欲引兵而出公度兵家決勝之道急衝其鋒攻其有備皆非計之得我姑示以自守不出之形必俟其出然後尾而圖之先復省城以搗其巢穴彼聞必回兵來援我則出兵邀而擊之此全勝之策也宸濠果使人探知公未出乃先發兵出次南康九江諸處猶自居省城以候禦公至七月初二日宸濠又使人探知公兵不出乃番兵萬餘屬其腹心宗室及儀賓內官并偽都督都指揮等官使守江西省城自乃引兵向安慶公又令人探知其出遂馳促各府兵期以本月十五日會于臨江樟樹鎮身督伍文定等兵往下於是知府戴德孺引兵自臨江來知府徐璉自袁州來知府邢珣自贛州來通判胡光元童

琦引兵自瑞州來通判談儲推官王瑞徐文英新淦
知縣李美太和知縣李楫寧都知縣王天與萬安知
縣王冕亦各以兵來赴十八日遂至豐城分哨道
使知府伍文定為一哨攻廣閏門入知府邢珣為二
哨攻順化門入知府徐璉攻會民門入知府戴德孺
攻永和門入通判胡克元童琦攻章江門入知縣李
美攻德勝門入都指揮余息攻進賢門入通判談儲
推官王瑞知縣李楫王天與王冕等各以其兵乘七
門之釁從旁夾擊以佐其勢是日又探得宸濠伏兵
千餘於新舊墳廠以備省城之援公乃遣奉 知縣

劉守緒典史徐誠領兵四百從間道夜襲破之以搖
城中十九葢市以公乃大誓各軍申布朝廷之威再
暴宸濠之惡約諸將一鼓而附城再鼓而登城三鼓
而不克誅其伍四鼓不克斬其將已誓莫不切齒痛
心踴躍激奮薄暮齊放二十日黎明各至信地是城
中為備甚嚴滾木灰瓶火砲石弩撓毒之械無不畢
具及我兵已破新舊墳廠敗潰之卒皆奔告城中城
中已驚惧至聞我師四面驟聚皆震駭奪氣我師呼
譟並進梯絙而登城中之兵皆倒戈退奔城遂破擒
其居守宜春王拱樛及偽太監萬銳等千餘人宸濠

宮中眷屬縱火自焚延燒居民房屋公令各官分道救
火撫定居民釋散其脇從封其府庫搜出原收大小衙
門印信九十六顆其脇從布政使胡廉叅政劉裴叅議
許效廉副使唐錦僉事賴鳳都指揮王玘皆自首投罪
公先上江西捷音疏仍分兵四路追躡宸濠是時宸濠
攻圍安慶未下親自督兵運土填塹期在必克及聞公
兵至豐城大恐即歛回舟因僞太師李士實阻勸以為
必須徑往南京既登大寶則江西自服宸濠不應次日
遂解安慶之圍移兵泊阮子江會議歸援江西先是公
兵至豐城衆議安慶被圍宜引兵直趨安慶公以九江
南康皆已為賊所據而南昌城中數萬之衆精悍亦且萬
餘食貨充積我兵若抵安慶賊必回軍死鬪安慶之兵僅
僅自守必不能援我於湖中南昌之兵絕我糧道而九
江南康之賊合勢撓躡而四方之援又不可望事難圖
矣今我師驟集先聲所加城中必已震懾因而併力急
攻其勢必下已破南昌賊先破膽奪氣失其本根勢必
歸救則安慶之圍可解宸濠可以坐擒既而果如公料
及議所以禦之之策衆謂宜歛兵入城堅壁自守以待
四方援兵公獨謂先出銳卒衆其情歸要迎掩擊一挫
其鋒衆將不戰自潰所謂先人有奪人之氣攻瑕則堅

者瑕矣是日撫州知府陳槐引兵亦至公遣知府伍文定邢珣徐璉戴德孺共領精兵五百分道並進擊其不意宸濠亦先使精悍千餘人從間道欲出公不意攻收省城偶遇於某處遂交戰我兵失利報至公怒甚欲以軍法斬取伍文定邢珣戴德孺徐璉等首自欲帥兵親戰或以敵鋒交臨若即取首恐兵無統領而亂俟各奮勵以圖後効明日各帥兵奮死以戰其兵大敗公又遣都指揮余恩以兵四百往來湖上以誘致賊兵知府陳槐通判胡堯元童琦談儲推官王睟徐文英知縣李美李楫王冕王軾劉守緒劉源清等各使領兵百餘四面

張疑設伏候伍文定等兵交然後四起合擊分布既定公大賑城中軍民慮宗室郡王將軍或為內應生變親慰諭之以安其心又出給告示凡協從皆不問雖嘗受賊官爵能逃歸者皆免死能斬賊徒歸降者皆給賞內使外居民及鄉導人等四路傳布以解散其黨二十三日宸濠先鋒已至樵舍風帆蔽江前數十里公乃分督各兵乘夜趨進使伍文定以正兵當其前余恩繼其後邢珣引兵繞出賊背徐璉戴德孺張兩翼以分其勢二十四日早賊兵鼓譟乘風而前逼黃家渡其氣驕甚伍文定余恩之兵佯北以致之賊爭進趨利前後不相及邢珣之兵從後橫

擊直貫其中敗賊走伍文定余息督兵乘之徐璉戴德孺合勢夾攻呼譟並起賊不知所為遂大潰奔走十餘里擒斬二千餘級落水死者以萬數賊勢大沮引兵退保八字腦賊衆稍遁散宸濠震惧身自激勵將士賞其當先者以千金被傷者銀百兩盡散九江南康守城之兵以益師是日建昌知府曾興引兵至公以九江不破則湖兵終不散越九江以援我南康不復則我兵亦不能踰南康以躡賊乃遣知府陳槐兵四百合饒州知府林城之兵乘間以攻九江知府曾興領兵四百合廣信知府周朝佐之兵乘間以取南康二十五日賊復并力盛氣批戰而

風勢不便我兵少却死者數十人公急令斬取先却者頭知府伍文定奮督各兵殊死並進砲及宸濠舟宸濠遂大敗擒斬二千餘級溺水死者莫計其數賊復退保樵舍聯舟為方陣盡出其金銀以賞士公乃夜督伍文定為火攻之具邢珣擊其左徐璉戴德孺出其右余息等各官兵四伏期火發而合二十六日宸濠方朝群臣拘集所執三司各官責其間不致死力坐觀成敗者將引出斬之爭論未決我兵已奮擊四面而集火及宸濠副舟衆遂奔散宸濠與嬪妃泣別宮人皆赴水死遂執宸濠并其母子郡王將軍儀賓及僞太師國師元帥參贊尚書都

督都指揮千百戶等官李士實劉養正劉吉屠欽王
倫熊瓊盧珩羅璜丁贖王春吳十三凌十一秦崇葛
江劉勛何鏗王信吳國七大信等數百餘人被執脇
從官太監王宏御史王金王事金山按察使楊璋俞
事王疇潘鵬叅政程果布政使梁辰都指揮郝文馬
驥白昂等擒斬賊黨三千餘級落水死者約三萬餘
棄其衣甲器仗財物與浮尸積聚橫亘若洲餘賊數
百艘四散逃潰遣官分路追剿毋令逸入他境為患
二十七日及之於樵舍大破之於吳城又破之擒斬
復千餘級落水死者殆盡宸濠既擒衆執見公呼曰
王先生我欲盡削護衛所有請降為庶民可乎公對
曰有國法在遂抵首無言公令送至囚所行數步回
向公曰妾妃常勸我不要為此事是曰謹領乃為收
葬婁妃之祖諒與妣祖諒皆吳康齋門人諒即所謂
一齋婁先生語公以聖學者是也故其子孫皆有祖
父風如諒少子忱謙孫瑜尤知學問自立但諒長子
性中成化辛丑進士喜急功利不守其家學諒嘗之
預料必覆其宗及為郎中以不謹考察去官不耐涼
薄故以女為宸濠妃倚此凌暴鄉里忱因閉戶獨居
小樓終日讀書不下樓其他子孫皆不為患雖性諸

子只二子共其父惡其他子亦皆自守故公於叛逆擒執之日原其有辜非辜國法只行于性子其他族屬皆不及雖性于無辜者亦縱之使逃他如李士實劉養正王春等族屬亦多原情而宥之可謂行法之恕得聖賢之道矣婁氏家族有三人為監生者持引至省城給文赴京聽選因見宸濠為亂避回進賢縣舟中知縣劉源清并商人数十擒而殺之劉養正舊從公游至此母死未葬公為之葬又為文祭之曰吾不敢宥汝之生以葬汝之母可謂故舊不遺情法兩盡孔明之處馬謖異世而同符也先是宸濠以賄結朝廷左右及大小遠近臣僚自輔臣以下皆有交賄實跡與徃私書皆記于藉公得於其宮中悉焚之其為掩惡安人如此及都御史孫燧副使許達被宸濠殺棄其屍首公為具衣祔棺擲欵之諭令各屬及耆民里老人等各致祭又與委曲奏保以表其忠節皆獲卹典之優皆公之德也公既擒執宸濠并各偽官李士實等將欲令人獻俘慮有餘黨沿途竊發欲親解赴闕因公初在吉安兩上疏飛報乞命將出師朝廷差安邊伯朱泰即許泰為總督軍務充總巡官平虜伯朱彬即江彬為提督官左都督朱暉即劉暉為

總兵官太監張忠為提督軍務太監張永為提督督
畫挽密軍務并體勘宸濠等反逆事情及查理庫藏
官眷等事太監魏彬為提督等官兵部侍郎王憲為
督理糧餉徃江西征討行至中途間宸濠已擒捷報
至京計欲奪功乃密請武宗皇帝親征武宗皇帝遂
自稱為總督軍務威武大將軍總兵官後軍都督太
師鎮國公欲徃江西親征在廷大臣皆不諫臣僚皆
力諫不聽有被杖而死者既而江彬許恭劉暉張忠
張永魏彬等皆先領兵由大江至江西入居城中人
馬填溢巷街至不可行彼輩乃福言誣公始同宸濠謀
反因見天兵猝臨征討後始擒宸濠以為功脫罪欲
并擒公各為已功公初見其兵馬之盛意有不善乃
托疾不出公為餉以銀犒各京邊官軍以慰勞之有
病者為之醫藥死者為之棺斂又親自行撫衆心皆
悅公度其無可為然後出見忠永彬恭彬輩輩彼皆
設席于傍欲令公座其側公乃為佯不知先坐上席
令轉傍席于下請彼自坐彼乃出語誚公公以常行
文際事體諭之左右皆為公解遂無言盖公非爭一
坐恐一受其節制則大事之機皆將聽彼而不可為
故為此爭彼乃諭公以武宗皇帝將欲親征之意欲

將宸濠放置城中待武宗皇帝駕至與彼輩列陣重
擒之以為功公乃語之曰逆黨潛伏尚多萬一疎虞
變生不測則事勢不可救矣公即欲將宸濠并眷屬
黨與交付與彼彼又不可公欲解見武宗皇帝彼又
行牌止之公又托疾不出張永乃暮夜訪公排闥入
公卧内語以衆人欲功之意公乃備以盡忠為國及
募兵征剿之詳永始知公之忠與功私與衆語公之
忠以陰懈其謀彼乃訪公所原宥如婁氏家屬之類
悉擒而殺之以為功又逮捕冀元亨誣以同反遂各
引兵至南京候武宗皇帝公乃為疏力止聖駕親征
以為宸濠睥睨神器陰謀久蓄招納叛亡探輦轂之
動靜日無停亦廣置奸細臣下之奏曰百不一通散
謀之始逆料大駕必將親征先於沿途伏有奸黨為
傳浪荆軻之謀今逆不旋踵遂已成擒法宜解赴關
門式昭天討欲付部下各官押解恐舊所潛布衆隙
竊發或致意外之虞臣死有遺憾况平賊賊俘固國
家常典亦臣子職分臣謹於九月十一日親自量帶
官軍將宸濠并宮眷逆賊情重人犯督解赴關行至
廣信聞報知疏上武宗皇帝不聽又聞道路傳云欽
差總督軍務威武大將軍鎮國公朱帶領安邊伯朱

太監張左都督朱提督等官司禮監太監魏平虜伯
朱并督理糧餉兵部左侍郎王領兵將南京欵赴江
西征剿繼奉欵差總督軍務軍門鈞帖及續准欵差
總督軍務充總兵官安邊伯朱各差官齎手本至中
途阻公又要將所解宸濠等逆犯回至江西省城聽
候會審公謂既奉總督軍門鈞帖自合解赴南京面
受節制若復退還江西省城坐待總督軍門駕臨恐
涉遲疑且誤奏過程期又復扶病日夜前進行至浙
江杭州府又遇欵差提督贊畫密軍務御用監太
監張永又准總督軍門鈞帖開稱宸濠等待親臨地
方覆審明白具奏軍門定奪公因度病勢日重未愈
前進既有不能退回愈有不可若再遲延必成兩誤
乃暫番浙江館于西湖淨寺慈調治俟痊可復回江西
省城案行浙江按察司轉呈欵差提督軍務贊畫密
密軍務御用監太監張請會同監軍御史公同當省
都布按三司等官將見解逆首宸濠及逆黨劉吉等
各犯并宮眷馬足等項一文查明白仍請張永徑自
另委相應官員兵快管押帶回江西省城從宜審處
未及交公復上捷音以為宸濠不軌之謀已踰一紀
今旬月之間遂克堅城俘擒元惡是皆欵差總督威

德指示方畧所致以此歸功總督軍門以止武宗皇
帝江西之行初公在江西於江彬許恭張忠諸人既
去之後即欲將宸濠由九江安慶解至南京見武宗
皇帝自慮江彬之徒必將復來奪俘以致踈虞遂解
由廣信之浙江而江彬許恭張忠之徒又至武林要
奪公聞知將宸濠監櫃浙江驛自詣北新關見彬忠
恭等仍請浙江三司面交付彼轉解赴闕公復慮彬
忠恭等害已乘夜渡江過越一見祖母岑太夫人與
父海日翁泣別即日至浙江驛款回江西初江彬許
恭張忠謀欲奪功實款誣公於武宗皇帝反坐公為
將叛逆擒而誅之并為已功張永知其謀又聞公與
語之詳乃私與家人謀曰王都御史乃忠臣為國今
欲以此害之天理何在我不為一明其寃何可當
也他日朝廷有事何以使子之忠及復命先見武宗
皇帝備言公盡心為國之忠之功且言彬等款加害
之意既而江彬許恭張忠等果誣公無君款叛武宗
皇帝皆不信乃謂之曰王都御史乃我家忠臣你等
如何好這等說江彬許恭之謀遂不行張忠因公
在杭言不至南京見上又言此既不信試召之必不來
則可知其無君矣武宗皇帝乃召公公即奔南京龍

江閔將進見張忠等皆失意又從中沮之使不見公
乃以綸巾野服入九華山歆為道士張永聞知又力
言于武宗皇帝曰王守仁實忠臣今聞衆歆爭功歆
并棄其官入山出家為道士由是武宗皇帝益信公
之忠公乃出山至江西省城視事由是江西按堵人
皆深感家肖公像歲時報祀猶夫賴焉十五年閏八
月公四乞省筮節奉武宗皇帝聖旨王守仁奉命巡
視福建行至豐城一聞宸濠反叛忠憤激烈即便倡
率所在官司起集義兵合謀剿殺氣節可嘉已有旨
着兵督討賊無巡撫江西地方所奏省親事情待賊
平之日來說公復領巡撫事江西兵殘之餘宗室人
民凋敝之甚官府衙門居民房屋燒毀殆盡公為之
賑恤綏勞撫定又為奏免百姓租稅又將城中官民
沒官房屋及宸濠違制宮室與革毀一應衙門皆修
改為公廨又以宸濠占奪民間田地山塘房屋遵奉
詔書給還原主管業其餘照依時估變賣價銀入官
先儘撥補南新二縣充軍淮安京庫折銀糧米及王
府祿米餘羨收貯布政司官庫用備緩急是年月武
宗皇帝晏駕今上皇帝登極特降璽書慰勞行取馳驛
赴闕宴賞於六月十六日奉今上皇帝勅旨以爾昔

能剗平亂賊安靖地方朝廷新政之初特茲召用勅
至爾可馳驛來京毋或稽遲於二十日公馳驛起程
為輔臣所忌潛諷科道建言以為朝廷新政武宗國
喪資費浩繁不宜行宴賞之事行至中途而返道經
錢塘上疏懇乞便道歸省朝廷准令歸省陞南京兵
部尚書叅贊機務公又具疏辭免慰旨益勤本年十
二月內部題為捷音事議封公伯爵給與誥券子孫
世世承襲賜勅遣官獎勞慰諭錫以銀幣犒以羊酒
乃封公新建伯奉天羽衛推誠宣力守正文臣特進
光祿大夫柱國兼南京兵部尚書叅贊機務歲支祿
米一千石三代并妻一體追封公累疏辭免欵朝廷
普恩賞於報效諸臣及極言舉人冀元亨因說宸濠
反為奸黨構陷竟死獄中以忠受禍為賊報仇抱冤
齋恨欵盡削公官職移報元亨死又為移文湖廣兩
司優卹其家屬嘉靖改元公丁海日翁憂四方來游
其門講學益衆科道官逆當路意首以偽學劾公服
闋例該起復輔臣忌公才高望重六載不召御史石
金等文章論薦皆不報禮部尚書席公書為疏特薦
公及石淙楊公曰生在臣前見一人曰揚一清生在
臣後見一人曰王守仁時江西輔臣嘗有私憾於公

乃密讒於上曰王守仁將宸濠犯二人取歸為妾致
上疑以珥公之進公初無子嘉靖丙戌始舉子嘉靖
六年廣西思恩府田州府土官知府岑猛之亂提督
都御史姚鎮不能成功兵部侍郎張公字敬拉禮部
侍郎桂公夢同薦桂公不得已勉張公薦公堪任此
事朝廷俞允於本年六月初六日兵部奉欽依差官
持檄授公總制軍務督同都御史姚鎮勘處彼中事
情公上疏辭免請舉尚書胡世寧李承勛自代朝廷
不允上與閣老楊公一清曰若姚鎮不去王守仁決
不肯來遂令姚鎮致仕又降旨督趨赴任旨云卿識
敏才高忠誠體國今兩廣多事方藉卿威望撫定地
方用舒朕南顧之懷姚鎮已致仕了卿宜星前赴
節制諸司調度軍馬撫剿賊寇安戢兵民勿再遲疑
推諉以負朕望還差官舖馬裹齋文前去敦取赴任
行事該部知道予時為光祿寺少卿具疏論江西軍
功及薦公才德堪任輔弼上喜親書御劄以疏付內
閣議楊公一清忌公才閣與之同列乃與張公字敬
謙具揭帖對曰王守仁才固可用但好古服衣冠喜
談新學人頗以此異之不耳入閣但可用為兵部尚
書桂公知大_遂怒詈予潛進揭帖毀上意遂止公遂於

九月初八日扶病起程至十一月二十日始抵梧州
蒞任代其總制四省軍務事公沿途涉歷訪諸士夫
詢諸行旅皆云岑猛父子固有可誅之罪然所以為
亂者皆當事諸人不能推誠撫安以致之公上疏謝
息極言致亂之由平復之策十二月楊公一清與吏
部尚書桂公夢謀恐事完當回京復命見上予與張
公又薦之上必留用故題命公兼理巡撫題奉聖旨
王守仁暫令兼理巡撫兩廣等處地方寫勅與他咨
到公文力疏辭免舉致仕都御史伍文定刑部左侍
郎梁材自代不允公遂兼巡撫之職進至平南地方
與都御史姚鏞交代公建議大約以為進兵行剿之
患十罷兵行撫之善十與夫二幸四毀之弊時布政
使林富紀功御史石金皆以為然公遂至南寧府乃
下令盡撤調集防守之兵數日之內解散而歸者數
萬有餘湖兵數千道沮且遠不易即歸仍使分番南
寧賓州解休養待間而散初思田二府目民廬蘇王
受等聞知公來知無必殺之心皆有投生之念日夜
懸望惟恐公至之不速公既至又見防守之兵盡撤
其投生之念益堅乃遣其頭目黃富等十餘人於明
年正月初七日先赴軍門訴告願得歸境投生公諭

以朝廷威信及開示更生之路蘇受等既得公諭羅拜歡呼隨撤盜備盡散其衆掃境來歸二十六日俱至南寧府城下分屯為四營明日蘇受等皆因自首縛各與其頭目數百人赴軍門投見號哀控訴且言蘇與受等久欲挺身投訴見得四方軍馬把截無問陰使盧蘇圖殺王受王受圖殺盧蘇反覆難信以比連年抱苦控訴無由公復諭以朝廷恩德既赦爾等之死寧肯誘爾至此於是下盧蘇王受於軍門各杖一百衆皆合辭叩首為之請命乃解其縛諭以今日宥爾一死者是朝廷好生之仁杖爾一百者乃我等人臣執法之義於是衆皆叩首悅服公隨至其營撫定餘衆莫不感泣歡呼感恩誓以死報乞殺賊立功以贖前罪公復諭以朝廷惟願生全爾等今爾方來投生豈忍又驅之兵刃之下爾等逃竄日久家業破蕩且宜速歸完爾室家及時耕種脩復生理至於各處盜賊軍門自有區處不須爾等剷除待爾等家事稍定徐當調發於是又皆感泣歡呼公遂委布政林富總兵官張祐分投安插督令各歸復業既而公上疏處置平復地方以圖久安宜仍立土官以順其情分土目以散其黨設流官以制其勢公猶以為土夷之心

未必盡得而窮山僻壤或有隱情則又備歷田州思
思之境按行其村落而經理其城堡因以處之之道
詢諸其長目率皆以為善又以詢諸其父老子弟又
皆以為善然後信其可久行而反覆其辭更互其說
以請田州仍立岑氏後為土官知州以順土夷之情
特設流官知府以制土官之勢分設土官巡檢以散
各夷之黨又以田州既設流官宜更其府名為田寧
蓋取田石傾田州兵田石平田州寧之謠至於思思
則岑濬之後已絕不必復土官之設矣公又按視斷
藤峽諸處徭賊上連八寨下通仙臺花相諸同連絡
數十餘葉盤亘三百餘里彼此犄角結聚憑險流劫
郡縣鄉村被害軍民累奏請兵征剿國初以來屢征
不服乃檄叅將張經會同守巡各官集議停當於是
潯州衛指揮馮文瑞等永順統兵宣慰彭明輔官勇
彭宗舜保靖統兵宣慰彭九霄及辰州衛指揮彭飛
等各分兵布哨以永順土兵進剿牛腸等賊葉保靖
土兵進剿六寺等賊葉以四月初三日取齊抵葉先
是賊酋訶知公任劄南寧寂無征消息又不見調兵
集糧遂皆怠弛不以為意至是突過官兵四面攻圍
各賊倉惶失措擒斬賊酋及黨與頗多餘賊退敗復

據仙女大山憑險結寨我兵追圍拔木緣崖仰攻復
大破賊寨乘勝復攻破油磑石壁大陂等寨餘賊奔
至斷藤峽橫石江邊因追兵緊爭渡覆溺死者無算
并斬獲首從賊徒賊級俘獲男婦牛畜器械等項不
可勝計乃令收兵潯州府住劄復命各官兵移兵進
剿仙臺諸賊巢諸軍吏各率永順保靖土兵爭先陷
陣賊又大敗奔入永安邊界地名丘山恃險結寨公
摘調指揮王良輔并目兵彭愷等於二十四日分路
並進四面仰攻賊乃敗散公命布政林富副總兵張
祐分投密切調各目兵盧蘇王受等分定道進剿八
寨前後生擒斬獲并俘獲男婦頭畜器械始盡公以
八寨之地據其要畝移設衛所以控制諸蠻復於三
里設縣送相引帶親臨相視思思府基景定衛縣規
則蓋南丹衛舊僻在廣西極邊之地非中土之人所
可居者於是移築於周安堡正當八寨之中以阻扼
其道路之衝則柳慶諸賊不必征剿皆將效順服化
思思舊治原在寨城山內尚歷高山數十餘里公令
移出橋利六十里外地名荒田四野寬衍之處開闢
立里用漢法以治武緣之衆夷夏交和公私兩便復
移鳳化縣治於虞鄉為立縣宇屬之思思又於宣化

思龍地方添設流官縣治是皆保治民之要也又增築守鎮城堡於五也以壯武威設險仍選取協守諸兵及附近土寨目兵擇委智畧忠勇官一員重任而專責之使之訓練撫摩務要地險既設而士心輯和又令叅將守備等官不時親至其地經理而振作之賊則勢自摧公又將思田分設九土巡檢司各立土目衆所信服者管之節次具疏奏請定奪奉旨王守仁受命提督軍務蒞任未久乃能開誠宣慰處置得宜致令叛夷畏服率衆歸降罷兵息民奇功可嘉馮勅差行人齎去獎勵還賞銀五十兩紵絲四表裏布政司買辦羊酒送用九月初八日行人馮恩齎捧勅書并銀幣行之廣城是時公卧病床褥已餘一月扶病具疏謝恩而病勢日篤猶力懃視事先是公年十五歲時夢中得嘗句云卷甲歸來馬伏波早年兵法鬢毛皤莫知其謂至是舟至烏蛮灘舟人指曰此伏波廟前灘也公呀然登廟禮拜如夢中所見因讀夢中詩且嘆人生行止之不偶云乃於十月初十日復上疏乞骸骨就醫病因薦林富自代公病革以又一月乃班師行至大庾嶺謂布政使王公大用曰爾知孔明之所以付托姜維乎大用遂領兵防公乃為敦

匠事於舟中命家童陳歛具本月二十九日未時行
至南康縣將屬續之際家童在傍問何所囑公曰我
他無所念平生學問方纔見得數分猶未能與吾黨
共成之為可恨耳遂屬續而逝舁至南安府公館而
歛柩經南贛雖深山窮谷男女老弱皆縞素出迎道
左匍匐哀號若喪考妣凡所過江西地方行道之人
無不流涕撫棺慟哭而去江西巡按御史儲良才奏
公計至吏部尚書桂公夢欵因公乞回藉就鑿養病
疏叅駁害公令該司匿其計不舉乃叅其擅離職役
及叅其處置廣西思田八寨事息威倒置又詆其擒
宸濠軍功冒濫乞命都官會議先此因閣老張公孚
敬見公廣西所處思田岑猛諸子及盧蘇王受經畫
得宜并征剿八寨有方奏至甚善極口稱嘆謂予知
人明又述予在南京與言惓惓欵用公之意曰我今
日方知王某之不可及我即為揭帖薦于朝廷取來
作輔我情愿事之為師讓之當事共成天下之治桂
公揚公聞之皆不樂而益恐乃嗾錦衣衛都指揮聶
能遷誣奏公用金銀百萬舡載至京托予過送與張
公故薦用公于兩廣予疏辨其誣奉旨黃綰學行才
識衆所共知王守仁功高望隆輿論推重聶能遷這

廝捏詞妄奏傷害正類都察院便照前首一體嚴加
審問務要逐一追究與他代做奏詞并幫助奸惡人
犯來說黃綰安心供職不必引嫌辭避上怒下能遷
于獄杖之而死時予為詹事桂公揚公討上欲害公
恐予在朝乃與楊公謀欲擯予適南禮侍有缺即推
予補之予遂南去明年春上將出郊桂公密具揭帖
奏上云云上遂允命多官會議削公世襲伯爵并朝
廷常行卹典贈謚皆不霑被至人以為恨公生而天
資絕倫讀書過目成誦少年任俠長好詞章壯好仙
釋既而好學以斯道為己任以聖人為必可學而至
實心改過以去己之疵奮不顧身以當天下之難上
欲其以學輔吾君下欲以其學泐吾民惓惓欲人同
歸于善欲以仁澤覆被天下蒼生人有宿怨深仇皆
能忘之而不較雖處富貴常有煙霞物表之思視棄
千金猶如土芥藜藿稱昂錦衣錦袍大厦窮廬視之
如一真所謂天生豪傑挺然特立於世求之斯世及
近古誠未見有其人如公者也公配諸氏乃江西叅
議養和公諱某女公初未育子諸氏撫養族子一人
曰正憲諸氏卒側室張氏方育一子初名正聰後避
今上御名改名正億室予女所謂丙戌舉子是也鞠

于側室李氏僅二週而公卒李氏哀惻後事過傷亦繼卒因予許室故鞠於予今補台州郡庠生公孫男孫女二公所著有陽明集居夷集撫夷節畧五經臆說大學古本旁註及門人所記傳習錄所纂則言皆傳於世誦而習者可知其學術之造詣矣宸濠之變蓋非一日其烝淫奸暴腥穢彰聞賊殺善類剝害細民招亡納叛誘致劇賊渠魁如吳十三凌十一之屬率引數千餘衆召募四方武藝驍勇力能拔樹耕閔者亦萬有餘徒又使其黨王春等分齎金銀數百萬及造奇巧器玩賄結內外大小臣僚至有奏保其仁孝者有復其護衛者有備其官僚者有為潛布腹心於各省鎮守及畿內各處要地復陰置奸徒於滄州淮揚山東河南之間亦各數千比其起事之日號稱一十八萬從之東下者實不下八九萬非公忠義智勇誓不與賊俱生奚旬月之間遂得克復堅城俘擒元惡以成宗社之無疆哉然不特此南贛等處賊巢蟠據三省積數十年其賊如池大鬢謝志珊藍天鳳高快馬之儔皆勇力機智絕若非公先此悉除之使皆在宸濠呼召而翕合之其為天下之禍當何如也且八寨之為害積幾百年及思田之擾攘不息公一

且除而安之當武則武當文則文處置經畫皆得安
固久遠之圖但惜後先當路皆深忌公南北言臣皆
承風旨不為薦舉反為彈劾雖平日有與公至厚方
公江西成功時在南京亦懷執忌及在吏部當考察
之歲承輔臣意如力戰擒宸濠知府邢珣徐璉陳槐
等及叅謀御史謝源等方及論功皆假考察黜之則
國典之所以議功議能何在哉又予以女許室公子
憫其孤而撫之吏部汪尚書鏞因子諍張公大同之
征言當別其善惡不當玉石俱焚張公怒汪迎張公
意劾予回護屬官鄒守益難居大臣調予邈方叅政
聖明知番復職汪為又疏論公偽學及指予許婚携
子皆為黨邪不忠又調予予廼為疏明諍大同之心
又明公之學術之忠國及予所以憫子許婚携撫皆
非得已疏上深蒙聖明察予忠悃拔之富穽因察公
與守益之無辜於乎公既困屈沒齒尚尤不免則公
與予平生所期何如而皆僅止此者豈非天與命也
悲夫謹狀

陽明先生墓志銘

湛若水

甘泉子挈家閉關於西樵烟霞之洞故友新建伯陽
明先生之子正億以其岳舅禮部尚書文菴黃公之
狀及書來請墓銘曰公知陽明公者也非公莫能銘
甘泉子曰吾又何辭焉公知陽明公者也非公莫能
狀公狀之吾銘之公狀其詳吾銘其大吾又何義之
辭焉乃發狀而謹按之讀世系狀云云曰公出於龍
山狀元大宗伯公華大宗伯公出於贈禮部侍郎竹
軒公天敘竹軒公出於太學生贈禮部侍郎槐里公
傑槐里公出於遯石公與準厥有禮易之傳遯石公

出於秋湖漁隱公彥達秋湖出於性常公綱有文武
長才與括蒼劉伯溫友善仕為廣東叅議死難也推
其華胄遙遙遠派於晉高士羲之光祿大夫覽馬曰
公其有所本之矣夫水土之積也厚其生物必蕃有
以也夫讀誕生狀云云曰祖妣岑太淑人有赤子乘
雲下界天樂尊之之夢公乃誕焉是名曰雲蓋徵之
矣神僧言之遂改今名曰然則陽明公殆神授歟其
異人矣六年乃言十一年有金山之詩十七年間
又一齋聖人可學之語曰其有所啓之矣讀學術狀云云
曰初溺於任俠之習再溺於騎射之習三溺於辭章
之習四溺於神仙之習五溺於佛氏之習正德丙寅
始歸正於聖賢之學會甘泉子於京師語人曰守仁
從宦三十年未見此人甘泉子語人亦曰若水泛觀
於四方未見此人遂相與定交講學一宗程氏仁者
渾然與天地萬物同體之指故陽明公初主格物之
說後主良知之說甘泉子一主隨準體認天理之說
然皆聖賢宗指也而人或舍其精義各滯執於彼此
言語蓋失之矣故甘泉子嘗為之語曰良知必用天
理天理莫非良知以言其交用則同也讀仕進狀云
云曰初舉己未禮闈第一徐穆爭之落第二然益有

聲登進士試工部差督造王威寧墳辭却金幣獨受
軍中佩劍之贈適符少時夢蓋兆之矣疏邊務朝政
之失有聲授刑部主事審囚淮甸有聲告病歸養起
補兵部主事上疏乞宥南京所執諫官戴銑芳母使
遠道致死朝廷有殺諫官之名劉瑾怒矯詔廷杖之
不死謫貴州龍場驛萬里笑而公不少休甘泉子贈
之九章其七章云皇天常無私日月常盈虧聖人常
無為萬物常往來何名為無為自然無安排勿忘與
勿助此中有天機其九章云天地我一體宇宙本同
家與君心已通別離何怨嗟浮雲去不停游子路轉
賒願言崇明德浩浩同無涯及居夷端居默坐而夷
人化惡為善有聲人或告曰陽明公至浙沉于江矣
至福建始起矣登鼓山之詩曰海上曾為滄水使山
中又拜武夷君有徵矣甘泉子聞之笑曰此佯狂避
世也故為之作詩有云佯狂欲浮海說夢痴人前及
後數年會于滁乃吐實彼誇虛孰有以為神奇者烏
足以知公者哉復起尹廬陵卧治六月而百務具理
有聲取入南京刑部主事留為吏部驗封主事有聲
陽明公謂甘泉子曰乃今可卜鄰矣遂就甘泉子長
安仄厰右隣居之時講于大興隆寺而久庵黃公宗

賢會為三人相懽語合意久庵曰他日天台鴈蕩當
為二公作兩草亭矣後合兩為一焉明道一也明年
甘泉子使安南後二年陽明公遷貳南太僕聚徒講
學有聲甘泉子還期會于滁陽之間夜論儒釋之道
又明年甘泉子丁憂扶母柩南歸陽明公時為南大
鴻臚逆吊于龍江閔尋遷南贛都憲矣讀平贛之狀
云云曰夫倡三廣夾攻之策收橫水左溪桶岡剏頭
之功用兵如神矣甘泉子曰雖有大司玉馬晉谿之
知請授之便宜旗牌以備他用亦以陽明公素養銳
士於營以待不時之出也迅雷呼吸之間也又以身

先士卒以作軍器也讀平江西之狀云云曰甘泉子
先是在憂致書於公幸曰閩行之使以去也蓋公前
有宰相之隙後有江西未萌之禍不去必為楚人所
矜而不報未幾有寧府之變公幾陷於虎口然而贛
兵素振既足為之牽制而倡義檄諸府縣興兵會豐
城誓師分攻七門七門大開遂除留守之黨封府庫
之財收劫取之印安協從之民釋被辜之囚表死難
之忠據省城絕其歸路直趨樵舍曰成擒賊之功是
水也泚淺見測淵謀也然始而翕然稱為掀天揭地
之功矣既而大吏妬為內幸爭功者附焉輾轉殫力

竭精矣僅乃得免或未嘗不思前慮也所以危而不
死者內臣張永護之也於大吏門列不亦愧乎由是
遂為先與後擒之言上下騰沸是不足辯也夫陽
明逆知宸濠有異志劉養正來說必得公乃發公應
之曰時非桀紂世無湯武臣有伏節死義耳其猶使
翼生元亨往與之語者實欲誘其善不動干戈潛消
莫大之禍也使陽明公而實許養正則宸濠殺孫都
憲許副使必待陽明至乃發陽明未至而發者知絕
意于陽明之與已矣使陽明實許之必乘風直抵南
昌必不與豐城聞顧泌告變即謀南奔以倡大義奪

漁艇使如漁人然以奔吉安矣其宸濠兵校追公者
非迎公也將脇公也且宸濠之上不能直趨中原以
北中不能攻陷金陵以據者以陽明為之制其尾兵
威足以累之使不前也又取據省城絕其資重與歸
路也功莫大焉者也若夫百年之後忌石者盡死天
理在人心者復明則公論定矣已而該部果題賜
勅錫勞封新建伯奉天湖衛推誠宣力守正文臣特
進光祿大夫柱國兼南京兵部尚書叅贊機務歲支
米一千石于時天其將定矣而置之南者有人焉以
叅乎其間矣公丁父憂而四方從學者日衆有迎忌

者意致有偽學之効者人其勝天子或以浮語沮公
六年不召尋以論薦命為兩廣總制軍務平岑猛
之亂或曰其且進且沮使公不得入輔乎讀思田之
狀云云曰公奏行剿之患十行撫之善十乃撤防兵
解戰甲諭威信受來降杖土目復岑後設流守而思
田平夫陽明公不革岑猛之後之土官以夷治夷也
盧蘇芽杖之百而釋之置流守以制焉仁義之術也
人知殺伐之為功而不知神武不殺者功之上也仁
義兩全之道也讀八寨之狀云云曰檄衆將會守巡
命指揮馬文瑞永順宣慰彭明輔保靖宣慰彭九霄
分兵布哨擒斬賊酋黨與遂破諸巢移衛所制諸蠻
貫八寨之中扼道路之衝設縣治增城堡皆保安治
民之要或曰八峒掩襲村落以為功無破巢之功也
無功以為有功也何則辯之曰夫陽明之貪功當取
岑猛盧蘇之大功而不取焉不宜捨其大者取其小
者其亦不智不武也謂陽明公為之乎夫宣慰諸哨
之兵可襲則襲出其不意兵法之奇不可預授者也
而以病陽明為將使為宋襄陳儒之愚已耶非馭戎
不測之威矣事竣而請歸告病危矣不待報而遽行
且行且候命其卒於南安途次而不及命下亦

命也江西輔臣進帖以諸公上革之恤典人衆之
勝天也亦命也百年之後天定將不勝人矣乎甘泉
子始召入禮部面叩輔臣曰外人皆云陽明之事乃
公爲之乎輔臣默然然亦不以作怒加禍猶爲有君
子度量爲可尚也公卒之日兩廣江西之民相與吊
于途曰哲人其瘞矣士夫之知者相與語於朝曰忠
良其逝矣四方同志者且與吊於家曰斯文其喪矣
久庵公爲之狀六年而後就慎重也甘泉子曰吾志
其大義銘諸墓將使觀厥詳於狀也銘曰南鎮嶙
嶙在浙之濱奇氣鬱積是生異人生而氣靈乘雲降

精十一金山詩成鬼驚志學踰二廣信館次婁公一
言聖學可至長而任俠未脫舊習馳馬試劍古文出
入變化屢遷逃仙逃禪一變至道丙寅之年邂逅語
契相期共詣天地爲體物莫非已抗疏廷杖龍場
烟瘴居夷何陋諸蠻歸向起尹廬陵卧治不庭六月
之間百廢具興入司驗封衆志皆通孚于同朝執經
相從轉南大僕鴻臚大畜遂巡南贛乃展驥足涖頭
桶岡三廣夾攻自先士卒屢收奇功蓄勇養銳隱然
有待云胡養正陰謀來說詐言尊師公明灼知異子
往化消變無爲閩道豐城及變未萌聞變遂返心事

以明旌旗蔽空聲義下江尾兵累之北趨不從乃擒
巨賊乃親獻敵爭功欲殺永也護翊彼同袍者反戈
不怙隱之于心以莫不戚憂居六年起治思田撫而
不戮夷情晏然武文兼資仁義並行神武不殺是稱
天兵凡厥操縱聖學妙用一以貫之同靜異動

卷十一
...

